

**NATIONAL ASSEMBLY OF
SEYCHELLES**

Wednesday 27th January, 2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Mersi. Bonzour tou Manm Onorab. E bonzour nou lodyans a lekout. Nou'n ariv lo bann *double Ws*. Onorab Waven William. *Sorry*, wi?

HON SANDY ARISSOL

(Off-Mic)

MR SPEAKER

Ok. Nou al lo Onorab Wavel Woodcock.

HON WAVEL WOODCOCK

Mersi Mr Speaker. Bonzour tou koleg Onorab. E tou dimoun a lekout. En bonzour spesyal pou bann zabitan mon distrik Grand Anse Praslin. Mr Speaker, se avek gran latansyon ki mon ti ekout

ladres Prezidan Ramkalawan lo Leta nou Nasyon, lo leta nou pei Sesel.

Selman 3 mwan apre ki Prezidan Ramkalawan in ganny elekte, i ti son responsabilite pour premye *annual seating* Lasanble konman Prezidan Larepiblik pou donn en kontrandi Lepep Seselwa lo Leta nou Nasyon, lo sityasyon ekonomik, sosyal e menm politik nou pei.

Fodre note Mr Speaker, ki premye fwa dan listwar nou pei ki en Prezidan i konmans son premye manda par bwat vote, me non pa atraver pas baton! Sa i en laviktwar pou nou la demokrasi!

Mr Speaker, Prezidan Ramkalawan pa ti vin fer en ladres avek bann retorik bon marse e bat latet parey bann Prezidan dan le pase ti fer. Ti napa bat latet dan son ladres. I pa'n vin avek bann fantezi parey *DATA* dan *TATA*, *LNG* ouswa parey zot kontan dir sak fwa ki eleksyon pe aproz, ki delwil in ganny dekouver Sesel!

In realis dan son ladres e in koz fran e laverite. I pa'n fer bann promes kase ki apre in vin en kales kase. Laverite parfwa i ofans son met, me nou bezwen tande.

Prezidan Ramkalawan in pran labar dan en moman pli

difisil dan listwar nou pei. Kot nou pei pe fer fas avek pandemik *COVID-19*, en kriz lasante e osi en kriz ekonomik ki pe menas vant Lepep Seselwa.

Ozordi plis ki zanmen nou bezwen solider avek kanmarad, travay ansanm pou nou kapab sirmont sa defi ki devan nou. Mon annan lespwar ki nou pou sirmont tou defi, sirtou ler mon vwar zefor eksepsyonnèl ki nou bann travayer Lasante pe fer pou konbat sa pandemi. Pou sa Lepep Seselwa i dir sa bann travayer Lasante en gran mersi.

Mon annan lespwar ler mon vwar zefor ki nou Prezidan ek Minis pou Zafer Etranzer, Minis Radegonde in fer pou fer sir ki nou ganny ase vaksen pou donn nou sitwayen. Ki ozordi Sesel i dezyenm mondyal pou lakantite sitwayen ki'n ganny vaksinen. E yer dan nouvel ti dir ki i annan plis ki 20mil Seselwa ki'n fini pran vaksen.

Mon annan lespwar ler mon vwar bann endividi, bann biznes pe kontribye finansyelman dan zefor pou siport program vaksinasyon Minister Lasante. Pou fer sir ki par lafen Mars plis ki 70 pousan nou popilasyon in ganny vaksinen.

Me i malere Mr Speaker, kan lamazorite Seselwa pe fer

zefor pour redres nou lekonomi, i annan en pti group ki olye ede zot pe zis kritike san ofer okenn solisyon pou apiy nou pei. E ed li re debout lo son lipye, kan an realite sete zot menm ki'n ede pour anmenn nou pei lo son zenou.

Mr Speaker, *Leader* Lopoziyon yer atraver ou, ti koz labous plen pou dir ki gras a bon zesyon nou larzan Labank Santral in nobou annan en rezerv \$448 milyon. Me sa ki *Leader* Lopoziyon pa'n dir, se ki si pa ti sizyenm Lasanble Nasyonal sepa si ti pou annan en sou dan rezerv.

Gras a en Lasanble Nasyonal avek en mazorite Manm *LDS* anba direksyon *ex-Leader* Lopoziyon, ozordi Prezidan Wavel Ramkalawan ki nou pei in kapab annan en rezerv ki kapab soutenir nou pei pour 18 mwan.

Se aköz *LDS* in vey kont piblik, ki'n ede koup gaspiyaz e koripsyon dan plizyer Minister, departman e Lazans Gouvernman, ki ozordi nou kapab annan sa kalite rezerv.

E menm si ozordi nou rezerv in ariv \$448milyon, Labank Santral fek pret nou en serten sonm larzan, mon plis ki sir ki si Prezidan Ramkalawan ti'n pran labar depi 2015, nou rezerv ozordi ti pou bokou plis.

Listwar in montre ki move zesyon nou larzan ek bann labi ki Gouvernman *SPUP/SPPF/Parti Lepep/US* in fer dan le pase in kout nou pei ser.

Pa ni bezwen al lwen Mr Speaker, le 8 Avril 2020, Lasanble ti vot pour en Bidze Siplemanter R1.2 bilyon, pou pey saler bann travayer dan sekter prive. E osi pou asiste bann ki pli vilnerab dan bann program sosyal anba Lazans Proteksyon Sosyal.

FA4JR ti ganny kree pou zer larzan ki ganny peye avek bann biznes e lakonpanyen. Ki nou'n vwar Mr Speaker, labi. Kot plizyer biznes ki pa ti merit ganny asiste ti a pe ganny asiste.

Ler Lasanble ti demann rapor lo depans *FA4JR*, Prezidan Faure ti dizourd Lasanble. E bal ti konmans ganny donnen dan sa larzan e dan larzan *welfare* pou konpany eleksyon, ki'n fouy en pli gran trou dan kont piblik.

Finalman, apre ki nouvo Lasanble ti ganny elekte, nouvo Gouvernman anba direksyon Prezidan Ramkalawan ti bezwen anmenn en lot Bidze Siplemanter R1bilyon devan setyenm Lasanble Nasyonal pou re aziste depans an plis ki Gouvernman *US* ti'n fer. E osi pou *sustain* program *FA4JR* e

lezot program Sosyal Gouvernman.

Gouvernman *US* in netway kof Leta e ozordi nou bezwen pret avek Labank Santral.

Menm avek sa pandemik *COVID-19*, si larzan Leta ti'n ganny zere dan en fason pli responsab e pli byen, nou ti pou dan en pli bon pozisyon ki nou ete ozordi. Ler Prezidan i dekrir sityasyon ki nou pei i ladan konman en kales kase. Bann Manm lo lot kote latab i le ankoler, zot bezwen ankoler akoz se zot parti ki'n kas sa pei.

Mon kontan tann zot pe koz lo ogmant lentansite program vaksinyasyon, me sa ki enteresan Mr Speaker, ler Minis Lasante ti lans sa program, ti napa en Manm *US* ki ti vin lansman sa program, pou ankouraz Lepep Seselwa pou pran sa vaksen. Pourtan zot *ex*-Prezidan ti la pou montre zot legzanp.

Pa fini, parey en lisyen koup lake ler Seselwa ti saboul zot, *Leader* Lopozisyon ti donn en *interview* avek en leskiz mansonzet, akoz ki zot pa ti vin inogirasyon program vaksinyasyon. I ti dir sepa i pa'n ganny lenvitasyon spesyal, vaksen pa'n ganny laprouvasyon, ti annan tro

bokou dimoun e en trale lezot leskiz ankor.

Mr Speaker apre sa, lasezon kominike lapres in re fleri. Enn ler mon krwar ki *United Seychelles* i merit sanz son non pou apel Parti Kominike Lapres! Finalman nou'n vwar enn de veteran Parti US ek *Leader* Lopozisyon dan en *Press Conference* kot zot in may zanbek kanmarad. Zot in konfiz zot lekor, me erezman Seselwa pa'n anval sa bann labwet pouri.

Ti annan en dokter, ki dapre konpran prosen *Leader* Parti US. Enn ler i dir vaksen pa bon, en lot kou i dir *amp up* program vaksinasyon, patati patata. Mr Speaker, fodre zot pran zot en desizyon.

Olye ed sa pep, fer bann kritik konstruktif, siport zefor ki Gouvernman pe fer, zot zis opoz tou keksoz. Pa akoz ki ou dan lopozisyon ki ou bezwen kont, ki ou bezwen opoz tou keksoz.

En senp legzanp Mr Speaker, pou Vandredi pase ou ti donn en direktiv pour nou gard en serten liniformite dan Lasanble. Pou gard en serten standar pou SONA, Ladres Leta Lanasyon. Mr Speaker ou ti demann nou tou pou nou met en palto. Tou bann zonn met palto.

Zour SONA ler mon ti debarke dan *parking* deor mon ti war mon konpatriyot Onorab Churchill Gill. Ki mon annan bokou respe pour li, debarke dan son transpor, dan son palto, byen sanze. Ler Lasanble ti konmanse mon war mon koleg san palto, e mon prezimen zot in dir li tire. Akoz ti napa enn zot lo lot kote latab ki ti'n met palto! Enn ler mon en pe per pou mon frer i pou pas parey Onorab William. Zot pou fer li pas par lafnet.

Menm parey, Prezidan fer demars pou ganny 60mil paviyon Sesel pou distribye avek nou popilasyon konman en zes senbolik e patriyotik dan sa moman difisil, ki nou pei pe pas ladan. Bann *MNA US* ki sipoze *Leader* Prensipal dan zot distrik, in refize pran sa bann paviyon ki'n *stack up* anba lavarang an deor Lasanble pou zot kolekte. Prezidan i annan rezon dir zot, zot fer onte! Sa i bann latitid anfantil.

Mr Speaker atraver ou, Onorab Pillay ti dir ki Prezidan ti ankoler ler i ti per fer son Ladres. Be pa zis Prezidan ki ankoler, Lepep Seselwa osi i ankoler. Zot ankoler avek sa ta vol, koripsyon e gaspiyaz ki'n arive pandan sa dernyen 43an!

Mr Speaker, pou plizyer lannen Sesel in annan en *top*

heavy Government. Avek 108 *Board* ki nou pe pey anviron R36milyon par lannen. En bon pe sa bann *Board* nou okouran ki zot pa pe zwenn parey zot merite. Konmsi Kreol i, annan bann ki zis zwenn pou bwar dite e manz gato.

Nou bezwen en *lean Government*, avek bann travayer serye e efikas, ki konnen ki zot pe fer. Fodre donn bann zenn profesyonnel plis loportinite pou zot progresse dan zot karyer. Ki nou'n vwar dan le pase, se ki plizyer pozisyon in ganny kree dan Gouvernman pou met bann politisyen ki'n *fail* dan eleksyon, ouswa ki'n sorti konman *MNA*.

Petet i annan enn ou de ki konpetan, me plizyer fwa nou'n vwar kot plizyer sa bann endividi zot napa sa konpetans ouswa kalifikasyon pou fer sa louvraz, e zot in bar plas en lot ki pli konpetan. E in menm annan en bann pozisyon ki'n ganny kree zis pou donn zot dalon en tit ek en gro saler. Parey sa ta *Advisers* ek *SS* ki nou'n vwar dan Gouvernman lepase. Tou sa la sa nouvo Gouvernman pou bezwen met en lord ladan.

I annan bann ki dir pran larzan ki nou pou servi pou bann *capital project* pou pey saler travayer. Mon asire ki

Gouvernman pe fer tou posib pou fer sir ki tou Seselwa i annan manze lo son latib. Me parey serten gran savan ti dir dan en *Press Conference*, ki sa larzan *Grant* ki *UAE* in donner pour fer Lopital La Digue fodre ki Gouvernman i servi sa larzan dan en lot fason olye fer en Lopital.

Mon krwar ki zot in bite. Ou pa kapab servi en larzan ki en lot pei in donner, in donn ou pou en proze spesifik pou en lot depans. Si ou fer sa, sa Gouvernman pa pou zanmen annan konfyans dan ou ankor. Zis parey sa \$50milyon ki ti sipoze aste manze pour Lepep Seselwa ki nou ankor pe rode kote i ete ozordi.

Ti enteresan Mr Speaker, pou mon ekout deba lo sityasyon *IEA*, *Industrial Estate Authority*. Lo sa fame *master list*. Mr Speaker annou pa bliye dezord ki ti pe arive *IEA*. Kot Lasanble ti bezwen *freeze* en porsyon larzan dan Bidze *IEA* pou lannen 2019 akoz zot ti annan tro bokou *arrears*. Zot pa ti pe kolekte reveni lo bann later ki zot ti'n *lease* avek plizyer biznes lo bann *Industrial Estates*.

Mon'n travay pros avek 2 *CEO IEA*, sirtou kot i konsern Ile Eve Praslin. Ozordi nou annan nou plis ki 49 bout later

ki nou pe espere pou ganny debloke pou deservi bann biznessmenn Pralinwa. E mon konnen ki Gouvernman anba Ladministrasyon Prezidan Ramkalawan pe met lanfaz pou met sa bann lenfrastruktir nesese an plas pou larg sa bann kare later. Akoz pou *survival* en pei nou bezwen pare pour relans nou lekonomi, relans nou bann diferan lendistri e met divan anba lezel bann bizness Seselwa.

Zot merit realize ki *COVID-19* i serye, pa fer parey sa Manm lo lot kote latab ki ti dir ki *COVID-19* i en senp *flu* parey nenport ki *flu*.

Wi ozordi nou annan drwa koze, i annan en lot Onorab lo lot kote latab ki'n annan lodas pou dir ki Prezidan pe anpes zot koze, ki si zot koze Gouvernman pou met zot dan kaso. Ase zwe la, pa manz zot bannann parey zot abitye fer e apre sey anvoy zot lapo lo nou. Seselwa i konn tre byen lekel ki'n met dimoun dan kaso pour zot lopinyon politik dan lepase.

Ozordi nou pep Seselwa pe respir en ler laliberte, kot zot kapab eksprim zot lekor san lafreyer ki zot pou disparet ouswa ganny met dan kaso. Sa se gras a *LDS*. Menm zot lo lot kote latab ozordi zot annan laliberte pou koze. Selman zot

pa le nou koz lo *mismanagement*, zot pa le nou koz lo labi le pase. Nou bezwen koz lo la, e pran aksyon pou li, pou sa bann keksoz pa repet ankor dan nou pei.

Mr Speaker, kot i konsern *Air Seychelles*. Mon rekonnent ki i en size delika. Plizyer dimoun i emosyonnel lo sa size. E i annan divers lopinyon lo si Gouvernman i merit aret fer vol Enternasyonal e konsantre zis lo domestik ek *ground handling*. Mon'n koz avek plizyer *staff Air Seychelles*, i annan ki mon zanmi avek. Mon'n koz avek plizyer dimoun dan sa lendistri, e osi avek detrwa ekonomis.

Wi, in annan *mismanagement* dan loperasyon Enternasyonal dan le pase. In menm annan plizyer labi, kot bann lazans voyaz ti pe fer plis larzan ki *Air Seychelles* ti pe fer lo lavant syez lo zot prop avyon. Ler *Air Seychelles* ti pe fer \$500 lo en syez, en lazans voyaz ti kapab pe fer \$1000 ou plis par syez.

In annan alegasyon ki ti annan plizyer O Zofisye dan Gouvernman e lo *Board Air Seychelles* dan le pase ki ti annan *shares* dan sa bann *travel agencies*.

I annan ki pe dir ki fodre met restriksyon lo lakantite vol ki bann lezot *airline* i fer Sesel,

e ki *Air Seychelles* i merit antre dan lezot *market* enternasyonal e pa zis rezyonal. Me lo lot kote i annan bann ki pe dir ki i annan *uncertainty* dan *market* global an vi pandemik *COVID-19*. Ki Lendistri Touris pa pou retourn parey avan e i napa garanti ki *Air Seychelles* pou profitab dan fitir pros.

Air Seychelles i en biznes apre tou. I parey nenport ki biznes e fodre i profitab. An se moman *Air Seychelles* i annan en det anviron \$142milyon, e sa lannen nou bezwen pey en *loan* R800milyon.

An plis ki sa *Air Seychelles* pe demann Gouvernman R109 milyon pou pey saler son travayer. Pandan sa dernyen 12 a 13an Gouvernman in *subsidize Air Seychelles* anviron \$200milyon.

E kestyon ki pe ganny demande, eski i vo lapenn pou gard *Air Seychelles*, si i pe kontinyen fouy en trou dan kof Leta? Ouswa eski nouvo *Board e Management Air Seychelles* i kapab trouv en solisyon pou fer *Air Seychelles* vin profitab?

Eski koup vol bann lezot *airline* pa pou afekte lakantite touris ki pou vin Sesel? Eski nou kapab ranpli bann lasanm lo later ek lo lanmer, lo bann yot, si nou limit lakantite *flight* bann lezot lakonpanyen?

Eski nou pou kapab tap dan sa bann *market e network* ki sa bann lezot *airline* i annan? Konbyen pou koute pour *lease* sa bann avyon? Konbyen i pou koute pou fer *marketing* dan sa bann nouvo destinasyon, sirtou la ki reveni i vremen ba? Eski nou pou kapab *sustain* nou *operational cost* e fer en profi?

Tousala i bann kestyon ki pe ganny demande. Ki fodre nou annan en diskisyon pli aprofondi lo la. Mon propoze ki Gouvernman i fer plis konsiltasyon avek tou bann *stakeholders* avan ki zot pran en desizyon lo sa size.

Mr Speaker, Prezidan Ramkalawan in met bokou lanfaz lo travay dir, bann ki kapab travay pa merit pe depan lo *welfare*. *Welfare* i merit ganny servi pou asiste bann ki merite, bann ki vremen bezwen. In annan labi dan le pase, e fodre koup tou labi.

Yer swar dan *News Extra*, nouvo *CEO* pour *ASP* ti pe donn detay lo bann labi ki pe arive dan sa lazans. I annan dimoun ki'n lo *welfare* pou plis ki 10an, kan zot ti sipoze lo *welfare* tanporerman ziska ler zot ganny en louvraz.

CEO Morin ti servi legzanp Prezidan, pour dekrir sityasyon kot Lazans Proteksyon Sosyal. I

ti dir ki ASP i en kales kase, ki robinen in ganny kit tro ouver.

Mr Speaker, kot i konsern *partial rent* mon santi ki pou annan enn de Seselwa ki pou war li difisil pou zot pey zot *rent*. Alor mon pe fer en lapel avek Gouvernman pou konsider bann ki vreman merit lasistans.

Kot i konsern mon distrik Grand Anse Praslin e nou zil Praslin, depi ki nouvo Gouvernman in ganny elekte, plizyer visit in ganny fer par Prezidan ek son bann Minis lo nou zil.

Mon'n ganny sa privilez ansanm avek Onorab Churchill Gill e Onorab Doyace Porice, pou nou met nou bann konsern devan e vizit plizyer *site* e proze ki Gouvernman presedan ti a pe trenn lipye lo la. Mon'n met devan plizyer konsern zabitan mon distrik Grand Anse Praslin ki Gouvernman pe adrese.

En *ice plant* pe ganny enstale kot Pti Ron dan 6 mwan. *Pontoon* pou ganny enstale kot vye lasose pou deservi bann peser. Vye bazar pe al ganny aranze pou deservi bann ferme ek peser. En *MOU* in ganny sinyen ant Lasosyasyon Lagrikiltir Praslin avek Lazans Lagrikiltir, e sa bazar pour anba responsabilite Lasosyasyon Lagrikiltir Praslin.

Prezidan Ramkalawan in montre nou son fason travay. Sa bann zafer bann proze ki pou fini dan lannen '2000 zanmen' in fini! E in reasir nou dan son vizit Praslin ki Gouvernman pou met lanfaz lo bann proze ki priyorite pour devlopman nou zil.

Dan vizit ki mon ti fer avek Prezidan ek lezot Minis Grand Anse Praslin, mon ti ganny lasirans ki nouvo Gouvernman pou get dan sa sityasyon lerozyon lakot. E en travay pour konmanse pou agrandi *rock armoring* Amitie vizavi *Airport* ziska Ros Korbizo pou protez semen e later ban zabitan dan sa rezyon.

E pou ed bann pti biznes epanouir espesyalman bann *craftsmen* e artizan. Sa landrwa kot vye *warehouse* STC Amitie i ete in ganny *earmark* pou met bann lenfrastruktir nesese an plas.

Kot i konsern Fond Ferdinand, mon koleg Onorab Porice in tous en pe lo la. Mr Speaker, *US* ti depans bokou larzan pou drafte en *Framework Management Plan* ki mon annan en kopi avek mwan. Pou devlop sa rezerv pou ki i anmenn plis reveni pou Praslin e pou Sesel. Mr Guy Morel ki ti konsiltan lo sa proze, e mwan avek Onorab Gill dan sizyenm

Lasanble nou'n al plizyer *meeting* regardan devlopman sa rezerv.

Aprè ki sizyenm Lasanble ti ganny dizourd, zis mon'n tande ki *SIF* in *takeover* Fond Ferdinand. An Septanm 2020 Fond Ferdinand ti ganny transfer anba *SIF* san okenn konsiltasyon avek pep Pralinwa.

Deza zabitan Praslin pa ti pe benefisye avek larzan ki Vallee De Mai i fer, tou larzan i ganny servi lo Aldabra. La ankor en lot rezerv ki zabitan Praslin ti annan lespwar ti kapab fer en pe reveni pou benefisye zabitan Praslin, sa rezerv in ganny transfer anba *SIF*.

Gouvernman *US* in depans bokou larzan pou rod en konsiltan, fer en *Framework Management*, la i la avek mwan Mr Speaker. En *Framework Management Plan*, *business plan* pou Fond Ferdinand ki finalman in zis en gaspiyaz larzan. E fodre note Mr Speaker, dan en vizit ki ansyen Prezidan Faure ti fer Fond Ferdinand, dan son prop parol i ti dir, "*We are sitting on a gold mine*". Onorab Gill i kapab konfirm sa.

Fodre note ki ansyen *Management* Fond Ferdinand in transfer plis ki R2.4milyon dan

kont *SIF*. Ki'n arive avek sa larzan? Fodre Minis ki responsab pour Lanvironnman i get ladan.

Mr Speaker, mon bezwen dir ki mon apresye lafason ki nou bann Onorab Praslin i travay ansanm enkli mon koleg Onorab Gill lo lot kote latab. Nou annan en bon lantant, e nou tou le 3 nou pe travay pou byennet nou zil e tou zabitan Praslin.

E sete sa fason ki mon avek Onorab Gill ti travay ansanm dan sizyenm Lasanble. Nou ti met nou kouler politik de kote e met Praslin premye. Malerezman mon pa kapab dir parey pou nou vwazen Onorab Uranie Manm Elekte pou La Digue.

Ler mon ti tann li dir ki Prezidan Ramkalawan pa'n pran La Digue an konsiderasyon, kan bann premye deklarasyon ki Prezidan ti fer, sete konsernan La Digue. I konfiz mwan en pe.

Nouvo Gouvernman in fer demars en *Grant* avek Gouvernman *UAE* pou donn La Digue en nouvo Lopital. Ki sa Onorab ti fer Mr Speaker, i ti organiz en petisyon kont sa lopital. Premye vizit ofisyel ki Prezidan ek en delegasyon Minis ti fer sete La Digue.

Onorab Uranie atraver ou Mr Speaker, in koz lo respe ek savwar viv. Selman Mr Speaker, sete son prop siporter ki ti ensilte Prezidan ler i ti fer vizit la Digue!

Ladan menm apre ki Prezidan ti tann lapel bann travayer esansyel lo Praslin, ki zot bezwen *mask*. Prezidan ti fer donasyon plizyer kartron *mask* pou donn sa bann landrwa travay esansyel parey Klinik Grand Anse Praslin, Lopital Baie Ste Anne Praslin, SCAA, *SPTC*, *Fire Brigade* ek lezot parey servis Lapolis Praslin.

Se mon menm ki ti fer distribisyon sa bann *mask* pou ede dan sa lalit kont viris *COVID-19*. E nou'n idantifye lezot landrwa travay pou fer ankor donasyon plis *mask*. Me ki nou'n vwar Mr Speaker, Onorab Uranie in fer teat lo la. Sanmenm sa ki li i apel respe ek savwar viv. Zabitan Zil Pros pe note.

Mon anvì osi profit sa lokazyon pou remersye tou bann biznesmenn Pralinwa. Bann endividi ki'n fer plizyer donasyon Lopital Baie Ste Anne pou ede dan sa batay kont *COVID-19*.

Mon osi anvì remersye tou bann Pralinwa ki'n kontribye dan sa fon pou *rollout* sa program vaksinasyon Sesel. Ki

Bondye i beni zot tou. Plis ki zanmen konman en pti zil nou bezwen ralye ansanm, nou bezwen siport kanmarad. Nou annan en gro defi devan nou, me mon annan lespwar ki si nou travay ansanm nou pou sirmonte sa defi.

Mr Speaker, konman Manm Elekte pou Grand Anse Praslin, mon envit mon frer e koleg Onorab Churchill Gill ek Onorab Doyace Porice, pou nou kontinyen travay ansanm pou byennet nou zoli pti zil Praslin.

Annou siport demars Gouvernman dan sa lalit pou sirmont sa kriz lasante e kriz ekonomik pour byennet nou zil ek nou pei. Avek sa de mo, mon dir ou Mersi bokou Mr Speaker.

(APPLAUSE)

MR SPEAKER

Mersi Onorab. Onorab Arissol wi eksplik mwan lo Onorab William.

HON SANDY ARISSOL

Mr Speaker bonzour. Bonzour bann Manm. Eskize taler mon'n koz *off-mic* Mr Speaker.

Mon ti a kontan prezant en leskiz lo lapar Onorab William. In ariv en pti ensidan kot li, sanmenm sa ki'n fer li ganny sa retar bomaten. Selman dan son plas an vi ki

lalis ti pou koz 2 nou, nou annan en Manm ki'n pare pou ranplas li ankor. Ziska i ava ranplas sa Manm taler ler i ava retournen. Si i *ok* avek ou lofis.

Mersi bokou. Sa se Onorab Kelly Samynadin ki ava koz dan sa letan la. An vi ki ti annan 2 nou ki sipoze koze. Mersi Mr Speaker.

MR SPEAKER

Mon ti a kontan ganny en lesplikasyon avek Onorab William silvouple. Pou li eksplik mwan ki in ariv li. Pou mwan konnen son rezon.

HON SANDY ARISSOL

Wi letan i ava retournen mon a fer li pran kontak avek ou lofis. Mersi.

MR SPEAKER

Ok. Ale avek sa Madanm... wi?

HON SYLVANNE LEMIEL

Bonjour Mr Speaker. Bonjour tou dimoun a lekout. Tou mon bann koleg Manm Onorab. Mr Speaker, i annan en keksoz ki pe pase la. Konmsi sa zafer paviyon ti a bon nou klersi en.

Tou bann *MNA US*, mwan avek lezot *MNA Elekte*, fini pran paviyon. *Ok?* Akoz in ganny fer resorti la poudir nou pa pe pran, nou'n kit la deryer. Nou'n pran paviyon.

I reste 2 *MNA* pe fer laranzman zot transpor pou vin kolekte. I napa okenn retisan atraver paviyon. Nou tou nou'n pran nou paviyon. Petet ti a bon nou pa tro fer politik ek paviyon! Mersi Mr Speaker.

MR SPEAKER

Mersi Onorab. Wi Onorab Georges.

HON BERNARD GEORGES

Mersi Mr Speaker. Mr Speaker mon pou anmenn nou en pti pe an deor Lasanble bomaten. Akoz mon'n ganny enn de dimoun ki'n pran kontak avek mon lofis pou dir ki zot byen apresye ki lafason ki vaksen pe pase.

Me zot ti ava swete si Minister Lasante, si i pa pe fer li deza, ti a kapab pran konsiderasyon ki bann dimoun ki vremen en pe pli vye, e bann ki annan en dezabilite kelkonk. Ti ava ganny en pe priyorite dan laliny olye zis pas parey tou lezot. Akoz i paret ki enn de landrwa zot pe ganny sa difikilte. Mersi Mr Speaker.

MR SPEAKER

Mersi. Zot a rapel Onorab Pillay ti lev sa pwen yer. Mon apresye. Selman mon a kapab dir zot mon annan kominikasyon avek Minis Lasante. E dan zot kote

osi zot annan serten difikilte avek dimoun respekte lord ki zot devret vini. E zot in sezi le sesite pou plis kominikasyon. So mersi bokou. *Ok.* Avek sa nou a pas Onorab Kelly Samynadin.

HON KELLY SAMYNADIN

Mersi Mr Speaker. Mr Speaker. Tou Manm koleg Onorab, zabitan Au Cap, e Lepep Seselwa an zeneral a lekout, bonzour.

An vi ki sa i mon premye diskour, mon pou komans mon lentervansyon lo repons diskour lo Leta Lanasyon par premyerman felisit nou Prezidan, Son Ekselans Mr Wavel Ramkalawan, pou son diskour ki mon konsider koman enn fran e realis.

Mersi pou vin devan sa pep dan en fason onnet e brav. San vin pas dimyel o bor nou ver. Fer nou tann zoli parol apre pli tar pou fer nou bwar vineg an esperan ki bann fo promes i ganny realize parey ou bann predeser in fer plizyer fwa dan lepase.

Mr Prezidan ou'n plito met devan nou vre sityasyon ki nou pei i ladan. I pa'n fasil pou dizere, me mon konnen ki avek ou lo labar, nou pou war rezilta move zesyon kof Leta anba Ladministrasyon Gouvernman

US. Finalman Sesel in vin pou tou son zanfan. En ler mon le krwar mon ankor pe reve. Sa moman ki nou ti pe espere in anfen arive. Wi Mr Prezidan la i ou letan.

Mon pe pran sa loportinite pou mwan osi salye tou bann ki pe pran zot responsabilite personnel, pou swiv bann mezir sekirite ek lizyenn ki'n ganny met an plas par Minister Lasante. pou asire ki zot pa kontrakte viris *COVID-19* pou ede dan son propagasyon.

Lo sa not, mon ti a kontan felisit zabitan mon distrik ki pe azir dan en fason responsab pou asire ki zot pe protez zot lekor.

Mr Speaker, sa mo responsabilite i en mo ki nou tann ase souvan. Me pa nou tou ki ase matir pou konn son bann enplikasyon. I fer lapenn pou vwar ki serten nou bann swadizan Dirizan politik pe pran li zot responsabilite personnel pou senm lafreyer ek panik parmi nou popilasyon. A dizan tou sort kalite mansonz. Dan en bi pou met an kestyon kredibilite sa nouvo Gouvernman.

Gran lengwis e filozof Noam Chomsky ti dir e mon site, "*C'est la responsabilité de intellectuel de dire la vérité et de dévoiler le mensonges*". An dot

mo, i responsabilite bann entelektyel pou dir laverite e pou devwal bann mansonz.

Mr Speaker, si nou ti annan en Lopozisyon ki responsab dan plas pou senm lenformasyon ki pa korek e ki ensernten, zis pou kre doutans parmi popilasyon, zot ti ava fer li zot responsabilite pou ed Gouvernman dan son demars pou trouv solisyon, pou sa sityasyon ki nou ladan.

Zis parey mon bann predeser lo mon kote latab dan sa sizyenm Lasanble ki ti dan Lopozisyon sa letan ti fer. Me ki malerezman zot bann rekomandasyon pa ti ganny pran kont.

Erezman, nou en Nasyon ki pe kontinyelman ganny beni par nou Bondye tre o. E pou li mon annan gran gratitud, akoz mon konnen ki par son lentervansyon divin tou bann lasenn malisyè ki pe ganny vize ver sa Gouvernman, pou ganny kase dan son gran non.

Nou Prezidan in koz tre fortman lo sa lalit ki pe al ganny anmennen kont trafik drog dan nou pti pei. E mon distrik Au Cap pa'n ganny eparnye. Kot nou pe war bann pti *ghettos* ki pe komans leve.

Koman en zenn Manm Lasanble, mon pe pran li mon responsabilite personnel pou

asire ki lazènes mon distrik pa kontinyelman ganny anpwazonnen dan sa fleo. Nou tou nou konnen ki se lazènes ki ganny afekte an mazorite par fleo drog dan nou pei. Se pou sa rezon ki mon osi mon pe get onboard dan sa lalit.

Lo sa not, mon ti a voudre dir en gro merci zofisyè ANB ki reste an kontak avek mwan, pou ed mon dan sa demars. Merci pou reponn mon lapel e pou reazir vitman. Mon konnen ki i pa en travay fasil, me mon konvenki ki atraver sa korperasyon mityel pou annan rezilta. E nou pou kapab retablir en lafors travayer lazènes konpetan, parey nou ti annan lontan.

Mr Speaker, prezidan Larepublik in koz fortman lo *rule of law*. Sit web linguee.fr i eksplike ki "*La règle de droit va souvent de pair avec la démocratie*".

Sa i fer mwan demann mon lekor en kestyon. Eski pandan sa dernyen 43an Larepublik Sesel ti pe egzers vre la demokrasi? Larepons i kler, e sa i non.

Akoz mon pe dir sa? Se atraver komisyon *Truth, Reconciliation and National Unity*, en platform ki ti ganny kree pou anket lo bann ka disparisyon e viktimizasyon

depi lepok Koudeta, ki nou'n kapab dekouver tou bann form entimidasyon e pinisyon ki ti ganny egzerse lo bann ki pa ti pe konform ek sistenm o pouvwar.

Set akoz sa ki mon pou segonn Prezidan Ramkalawan ler in ensiste ki napa plas pou politik dan rekonstriksyon nou pei. E osi anver son lapel pou tou travayer pou silvouple kit politik an deor landrwa travay.

Dan nou demars pou re etablir en pei ki ekonomikman sen, e pou ki prodiktivite i pran plas, i enportan ki nou tou anplwayer koman anplwaye, nou koz menm langaz. Si nou divize kales pou kas plis!

Mr Speaker, lanplwa i reste toultan en konsern parmi nou popilasyon. Espesyalman pou bann ki pe trouv li difisil pou kapab fer de bout zwenn dan sa moman difisil ki pei pe pas atraver.

Koman en mwayen pou annan kontrol lo lakantite travayer etranze ki antre dan pei, Prezidan pe ensiste ki Minister Lanplwa i angaz plis dan sa demars. Alors, mon pe demann nou lafors travayer ki swa dan servis piblik ou dan sekte prive, pou demontre plis responsabilite e devosyon dan zot travay.

E parey nou Prezidan in toultan dir, annou pran nou travay parey nou ti pou pe okip en biznes. Akoz se sa ki nou dipen toulezour. A lafen sak lazournen annou demann nou lekor kwa ki nou'n *achieve* personnelman dan en konteks profesyonnel. E osi ki nou pei pe gannyan an retour atraver sa ki nou pe prodwir.

Me parkont Mr Speaker, mon krwar tou anplwayer i devret konsernen anver byennet zot travayer. Akoz apre tou, zot form parti enn bann faktor motivasyon afen ki sak travayer i trouv li pe prodwir o *maximum* ki i kapab.

Ler en travayer i santi li pe ganny abize oubyen pe ganny *bully* dan son lanplwa. I annan mekanizm an plas kot i kapab al anmenn son ka pli devan. Afen ki i kapab trouv en remedyasyon pou sa sityasyon ki i pe pas ladan.

Me parfwa serten endividi dan Departman Lanplwa i trouv li neser, ki swa par malis ou akoz petet sa anplwayer i son dalon, pou li fer konnen ki entel in vin fer konplent. E finalman, sa anplwaye i war li pe fer fas avek plis difikilte ki i ti pe fer fas avek lo komansman.

Sa i en mannev ki pe arive depi dan dernyen Ladministrasyon. E i vreman

entolerab lo lapar sa bann endividi dan a departman. Mon pe demann avek Minister Lanplwa pou met en lizye lo sa sityasyon. Akoz dan plas kalmi soufrans en travayer nou pe ede pou fer li pli grav. Dan plas war son sitasyon amelyore, i war li pe ganny forse pou *resign*. Oubyen i ganny met a laport.

Sa i en mantalite ki bezwen sanze. E *monitoring* pli ferm dan sa departman i bezwen ganny fer. Enn bann lobzektif Gouvernman se pou travay pou tou Seselwa. Afen ki pei i kapab kre plis larises posib.

Me Mr Speaker, mon pa krwar ki sa i depan antyerman zis lo Gouvernman. I responsabilite tou Seselwa pou kontribye o *maximum* ki i kapab, pou ede pou remet nou pei lo son 2 lipye.

Se pou sa rezon ki mon pe demann avek tou anplwayer, pou zot pli byen valoriz zot bann travayer. Annou donn zot sa sipor e lankourazman ki zot bezwen, pou ki zot ava kapab delivre e prodwir o *maximum* ki zot kapab. E pran zot responsabilite profesyonnel pli o serye.

Sa i bann fakter esansyel pou ki nou kapab annan en lafors travayer pli efikas.

Mr Speaker, ledikasyon i en domenn ki tre pre ek mon leker, akoz avan ki mon'n vin en Manm Lasanble, mon en ansenyan par profesyon. Enn bann langazman prensipal ki mon ti pran o moman mon ti ganny elekte, sete pou debout e lager pou drwa mon bann koleg ansenyan.

Mon'n toultan tann dir ki ansenyan i pilye lasosyete. Me eski ou bann ansenyan i ankor annan sa valer ou standar ki i ti annan parey 15 ou 20an pase? Larepons i non. Akoz ki sa i le ka?

Sa set akoz zot in toultan ganny demande pou donn rezilta san okenn sipor ou form motivasyon. Mon pa pe koz zis an term saler. Ki byensir i enn bann fakter pou ankouraz plis Seselwa pou angaz dan sa profesyon. Me plito an term formasyon e lankadreman. Akoz se sa ki pou ed zot pou kontinyen ou pli byen kapab zer zot bann laklas. Devlop bann pli bon stratezi lansennyman ki a lafen pou relev lentere zot bann etidyan. E plis ankor ankouraz laprantisaz.

Mon pe lans en lapel avek Minister Ledikasyon pou met en lizye pli ouver lo nou bann ansenyan. Annou ankadre zot plis. Pou ki lansennyman pli o nivo e pli a zour i ava pran plas.

I osi enportan pou asire ki sifizaman sipor i ganny donnen an term *workload*, pou ki zot ava kapab pli byen ekilibre zot letan, an term preparasyon, lansennyman, koreksyon, e *re teaching*.

Mr Speaker, resours in toultan en konsern dan lansennyman. Mon rapel en fwa ki mon ti pe ansennyen, en livreson 30 liv ti ganny fer pou en nivo partikilye ki kontyen anviron 100 etidyan. Eski sa i normal Mr Speaker?

Mind you, sa letan bann laklas pa ti *stream*, e sak nivo ti fer menm size alafwa. Ou kapab zis mazinen ki martir nou ti pe pas ladan. Fotokopi lo fotokopi gaspiyaz papye.

Mr Speaker, en nivo laklas an antye ki elektrisite pa marse. Pa i poz en presyon lo lansennyman e laprantisaz? Vantilater pa fonksyonnen pou donn nou bann ansenyan ek etidyan en pe ler fre ler lasaler in a pir kote. Lalimyer pou ekler zot ler sa gro nyaz nwar in bar laklerte soley dan letan lapli. Ou menm ler etidyan i bezwen fer aktivite *listening* dan lakas.

Lalis i long. Be mon pe zis nonm enn de ka pertinan. Wi Mr Speaker, sa i leta aktyel serten nou bann lekol ki sa nouvo Gouvernman in vin zwenn. E ki i pou bezwen al get

ladan pou soulaz nou bann ansenyan ek etidyan.

De lot kote mon ti ava osi demann nou bann ansyen pou annan en pe plis sans responsabilite anver nou travay. Annan en lespri pli inovativ. Pa akoz nou napa akse avek serten resours ki nou pou bes lebra. Akoz ler nou pe fer sa, se nou bann zanfan ki e perdi.

Onnetman Mr Speaker, mon soulaze pou konnen ki dan Departman Ledikasyon osi pe al annan restriktirasyon lo nivo *curriculum*. Me osi lo kote pastoral. Akoz i vre ki sityasyon disiplin dan lekol i enn ki tre alarman. E ki pou bezwen ganny en latansyon imedyat.

Sa i donn nou bann ansenyan e nou bann paran egalman en nouvo lespwar. Ki sa pou ede pou relev nivo ledikasyon dan nou bann lekol. E pli tar rezilta i ava ganny demontre dan performans.

Bann paran, mon konnen ki la zot pe trouv zot dan en sityasyon kot zot pe bezwen pran sa rol ansenyan dan lakour. Annou pran an kont ki nou bann zanfan nepli an vakans. Alors i enportan ki dan lakour zot pe asire ki zanfan pe dedye plis letan anver zot letid.

Malgre ki zot a dan en striktir edikasyonnel dan

prezans en ansenyan. Apre tou ledikasyon nou zanfan i nou responsabilite. E nou bezwen asire ki dan sa sityasyon pandemik nou pa pe ankouraze ki nou zanfan i neglig zot letid.

Annou sezi tou loportinite ki Minister Ledikasyon in met devan nou. Tel ki *websites* kot nou kapab ganny akse avek travay lekòl. Ou menm pa ezite pou kontakte zot bann ansenyan ki mon konnen pe fer zot lekòl aksesib pou okenn konsern ki zot kapab annan.

Mon osi anvi demann nou bann etidyan pou azir pli serye anver zot letid. Lavi pli ale pa pe vin fasil. Alors nou bezwen pran loportinite ki a nou laporte o serye. Pa espekte ki keksoz pou parey avan. O kontrè i pe vin pli difisil. Zot paran i lite nwit e zour, pou reisi kapab met manze dan zot lasyet, en resanz lo zot lapo, e en labri lo zot latet.

Pran zot koman legzanp pou ki zot osi demen zot a kapab annan en metye. In nepli tan pou nou sifok ou reponn en ansenyan, akòz i pe remontrans nou pou nou move konportman. I nepli tan nou pou pas nou letan desin ou desir paz dan liv lekòl. I nepli tan pou ou kas meb dan laklas. I nepli tan pou kas sa lafnet laklas pou antre akòz laport i

take. E in nepli tan pou nou sov laklas oubyen sov lekòl.

Sa sityasyon ki nou ladan i devret en *wake-up call* pou tou bann paran, pou pran li zot responsabilite pou re enstri nou bann zanfan lo lenportans ledikasyon. Lo zot rol koman etidyan e akòz ki i nepli tan pou nou antre dan baro lekòl pou al donn mal.

Mr Speaker, nou lazenes se nou lavenir. Mon vreman apresye letan mon'n tan prezidan dir ki zot bezwen pli ganny ankadre. Akòz larealite se ki zot in ganny kit deryer pandan plizyer lannen.

Tou resaman *SBC* ti pe televiz bann programm avek bi pou atir nou bann dimoun pou al travay lo nou bann zil elwanye. En kantite nou bann zenn i enterese pou al viv en tel leksperyans. Mon ti swiv sa bann programm tre pre. E parey nenport ki mon ti rekonforte pou vwar ki nou bann zenn i ankor kontan lavi lo zil.

Me letan nou pe koz leksperyans, nou bezwen konpran ki tou keksoz i annan en komansman. E se atraver sa premye zour, sa premye kontak ki leksperyans i vini.

Enn mon ansyen etidyan ki'n termin son letid kot lekòl *SHTC* lannen pase, ti met mon okouran ki ti *apply* pou plas

fermye lo zil. Me malerezman i pa ti ganny aksepte. Rezon, akoz i tro zenn.

Mon ti a vremen kontan konnen oli problem si en zenn garson 18an i deside pou kit son fanmir, son bann zanmi. Son lavi sosyal pou li al pourswiv en karyer lo en zil? Sa se pa lot ki en zenn anbisye, dinamik e patriyotik. Akoz son lanmour pou son pei, e anver travay i fer li anvi eksplor nouvo lorizon lwen avek son *zone* konfor.

Mr Speaker, ou annan en par pou kontribye pou fer Sesel monte. Sa i parol en vers dan sa sanson entitile “Sesel pou tou son zanfana,” ki Mr Georges Payet ti sante zour linogirasyon nou Prezidan.

Nou bezwen donn nou lazenes loportinite pou epanouir profesyonnelman. Si vremen nou anvi ogmant larises dan nou pei. Akoz zot osi zot zanfana Sesel, e zot pa merit ganny kit deryer.

Mon konpran ki avek sityasyon ki nou pei pe pas atraver, pa tou zenn ki pou kapab eksplor sa domenn ki petet in etidye ladan. Se pou sa rezon ki Prezidan in lans enn lapel pou tou bann ki pe aktyelman rod en lanplwa. Pou pa fer preferans louvraz. Akoz lenportans se ki ou pe ganny en

saler ki pou kapab soutenir ou avek ou fanmir malgre ki i pa dan ou domenn spesyalizasyon.

Mr Speaker, mon pa pou kapab termin mon lentervansyon, san koz lo *Air Seychelles*. I enportan ki Gouvernman i annan en apersi lo kwa ki bann travayer sa lakonpanyen pe pas atraver.

I annan plizyer sizesyon ki serten ki reste dan mon distrik in met anver mwan, pou transmet avek Gouvernman akoz pou zot fermtir sa lakonpanyen i pa devret premye solisyon pou rezourd sa problem. Me par trouv lezot alternativ ki an retour i ava ede prezerv nou laliny aeryen. E osi anmenn reveni dan pei san ki zot perdi zot plas travay.

Premyerman, pou ki sa lakonpanyen pa fermen, son bann anplwayer ki pe ganny en saler par lao R30mil in pare pou kontinyen fer sakrifis ki zot ti pe deza fer. Sa i atraver koupir dan zot saler pandan sa letan pandemik.

En lot sizesyon ki pe ganny fer, se par lentrodiksyon fre pou kargo. Sa i kapab ganny fer depandan lo pei lorizin sa bann kargo. E an retour reveni sibstansyel i ava pe ed sa lakonpanyen osi byen ki lekonomi pei.

Mr Speaker, tou an prenon kont kontribisyon mon bann lezot Manm koleg, sa i 2 solisyon ki mon pe met devan ki'n ganny sizere par serten travayer *Air Seychelles* dan distrik Au Cap. E mon swete ki Gouvernman i ava donn konsiderasyon neserer dan son desizyon ver lavenir nou laliny aeryen.

Mr Speaker, avan mon konklir, mon pou donn en apersi zeneral lo mon distrik Au Cap. Au Cap i pa zis enn bann pli zoli distrik dan Sesel. Dan lefe ki son bann lans i enn ki pli ganny frekante par touris e menm rezidan lokal. Me i osi enn bann pli gran distrik an term popilasyon, avek en pe plis ki 4mil zabitan.

Malgre sa Mr speaker, ziska prezan in napa preski ditou fasilite debaz ki sipoze a la porte son bann zabitan. Tel ki en klinik. En lanmwaye zabitan Au Cap i deservi fasilite Anse Aux Pins ansanm avek Point Larue. E menm en bout dan Cascade. E lot lanmwaye i deservi fasilite Anse Royale.

En bazar: Nou bann peser e ferme i bezwen enstal zot bann pwason dan kwen semen pou vann. Letan mon pe dir sa, mon mazin Mr Desaubin Point Au Sel ki'n pran sa linisyativ pou met en pti bazar lo son

propriyete pou vann son bann prodwir. Ki tre byen e mon felisit li pou sa. Sa i montre nou ki bann dimoun dan Au Cap i inovativ e zot anvi progresse.

Mr Speaker, i pa fasil pou admit, me apart lekol, en *daycare*, e en nouvo *housing estate*. Devlopman dan Au Cap in preski inekzistan.

Letan mon pe koz lo nouvo *housing estate*. Onnetman mon pou dir ki sa ti zis en proze politik. Akoz mon dir sa? Mr Speaker, sa proze lakaz i pirman rezilta move planifikasyon. Zis pou fer alokasyon avan eleksyon.

Ki mannyer en *housing estate* i kapab ganny konstri avek en miray ki pa konplet? E ki an rezilta sa, droger e delenkan i servi sa *estate* koman en *shortcut* pou traverse. E tranzaksyon drog i ganny fer lanmenm, menm dan prezans zanfan.

Septic tank i reste *overflow*. *Bins* pa'n zanmen ganny mete. E menm lalimyer pa'n ganny enstale. Mr Speaker, lalimyer i preski inekzistan dan distrik dan distrik Au Cap. E la mon pe koz osi dan bann, lo nou bann sou distrik kot souvan nou bann zabitan i mars dan fernwar.

Mon ti a voudre profit sa lokazyon pou remerisi sa group

dimoun ki'n zwenn ansanm dan sa letan difisil ki nou pe pas ladan. Pou enstal lalimyer dan zot kanton. Sa i montre nou ki vre nou Seselwa i solider, e pare pou travay ansanm pou byennet nou distrik e nou pei. San bezwen neserman depan lo Gouvernman.

Mr Speaker, drenaz i enn bann pli gro kontrent dan mon'n distrik. Sak fwa gro lapli delo in ranpli serten landrwa. Tel ki Turtle Bay kot detrwa lannen pase proze ti'n aprouve pou rezourd sa sityasyon, me malerezman sa bann zanmen ganny materyalize.

I enportan pou note ki pou sa proze ti osi annan en fon ki ti ganny kree kot serten zabitan sa landrwa ti fer donasyon finansyel afen ki sa proze i kapab demare. Me ziska ozordi ni van, ni nouvel.

Mon swete ki lotorite konsernen i pran aksyon neser pou remedye sa bann sitasyon afen ki nou bann dimoun i kapab viv zot lavi dan plis konfor.

An konklizyon mon ti a voudre premyerman, ofisyelman remerci tou zabitan Au Cap ki'n kontribye pou mon kapab re prezant zot ozordi dan Lasanble Nasyonal, espesyalman mon bann aktivis ki'n travay san ses pou nou

ankor enn fwa raport laviktwar. Pou mwan i en loner e en privez pou deservi koman zot lavwa.

Dezyenmman, mon anvi remersye Lepep Seselwa an antye ki'n pran li koman zot responsabilite personnel, pou donn sa pei en dezyenm reyon lespwar. E sa se par elekte en nouvo Gouvernman anba direksyon Son Ekselans Prezidan Wavel Ramkalawan.

E anfen, mon oule salye tou nou bann travayer Lasante, servis esansyel, an prensip tou bann ki lo fron batay dan sa lalit kont pandemik COVID-19.

Mon anvi dir zot ki zot dan nou lapriyer toulezour. Nou rekonnnet zot zefor e ki Bondye i gard e protez zot tou. Mersi.

(APPLAUSE)

MR SPEAKER

Mersi Onorab. Nou ava ekout Onorab Wallace Cosgrow.

HON WALLACE COSGROW

Mr Speaker, tou Manm Onorab, tou Manm piblik ki a lekout, bonzour. Dabor mon anvi raport mon soutyen a tou bann travayer Lasante, bann ki lo *frontline* dan sa lalit kont COVID-19 dan nou pei. I pa en latas fasil mon rekonnnet sirtou la ki dan lespas, 1mwan edmi

nou rikord en logmantasyon enkrwayab dan to lenfeksyon e ki nou dan en leta *full community transmission*.

Mon priye ki zot ava ganny sa kouraz pou kontiny sa latas nob ki devan zot e ki Bondye i a gard zot sen e sof.

Mr Speaker, diskour Leta Lanasyon i en diskour tre prestizye. E enportan pou o mwen 2 rezon. Enn, i diskour ki lans sesyon travay brans Lezislatif pou lannen. Me petet pli enportan i etabli Leta nou Nasyon o komannman lannen, sityasyon bann sekter kle nou pei. E en direksyon ki mannyer Gouvernman dizour pou travay pandan lannen, atraver bann gran laliny Polisi pou ganny elabore.

Mr Speaker, dan mon pwennvi e swivan enteraksyon ki mon'n gannyen avek bokou lezot dimoun ki'n analiz diskour Prezidan, nou'n konstate ki Prezidan in mank en loportinite dan son premye diskour pou tous bokou size ek sekter kle nou pei. E pou donn nou en kontrandi lo zot leta.

In mank loportinite pou elabor lo bann gran laliny Polisi, ki ti kapab ganny diskite pli an detay dan prezantasyon ki pe vin devan nou prezantasyon Bidze. Annefe menm lo bann size ki in touse, in plito fer

komanter, blanm ladministrasyon avan, e pwen, se tou.

Napa propozisyon ki mannyer nou bouz de lavan. Mon'n ekout en diskour ki mank vizyon ek lenspirasyon sirtou pou en dimoun ek en parti ki'n esper sitan lontan pou pran labar direksyon.

Diskour lo Leta Lanasyon enn ki mank, ki ganny met dan rikord, ganny fer referans avek. Se sa ki i prestizye. I sipoze en ladres prezidansyel.

Mr Speaker, ki sa diskour pa sipoze ete. Se en dispit avek pep Seselwa ek bann langaz ki nou servi dan semen. Se sa ki nou'n tande Vandredi. E bokou dimoun pe koz lo la. Ziska ozordi, lo *Facebook page State House*, ni en kopi an ekrir sa *speech*. E se selman dan Nasyon yer nou Zournal Nasyonal, ki nou'n ganny en versyon an ekrir.

Personn pa rode aköz en diskour sitan prestizye pa'n aparet dan en laform ekrir? Mon dediksyon lo la se ki napa en *speech* striktire. In plito *bullet points*. Aköz mon dir sa? Menm dan son salitasyon, Prezidan i bliye si *Attorney Zeneral* ti prezan. Me apre pli tar ler i get anler dan diskour i rekonnet e i salye *Attorney Zeneral*.

Mr Speaker, nou'n ganny en diskour Leta Lanasyon, me nou pa'n vreman ganny dir ki Leta nou Nasyon. Tre dezapwentan. Tou sa bann Onorab ki'n reakte lo sa diskour, ou a krwar zot pe reponn diskour Bidze. Zis konplent lepase ki zot pou dir ankor dan 2 semenn? Zot ki dan Gouvernman, *move on* e propoz nouvo Polisi e donn lespwar sa pep sirtou dan sa moman difisil.

(APPLAUSE)

HON WALLACE COSGROW

Mr Speaker, Leta Lanasyon Seselwa ozordi i enn ki tre kritik. Nou dan en kriz Lasante piblik ki an retour in met nou dan en kriz ekonomik. Avek bann restriksyon ki'n bezwen ganny ranforsi. Aktivite ekonomik in kotidyen redwir. Biznes preski pa pe opere. Touris pa pe vini, bokou bann biznes ki profit ek bann retonbe Sekter Tourism, i plat ater.

Bokou in ganny fer *redundant*, e mannyer keksoz pe ale, si napa okenn aksyon konkret tre vit par sa nouvo Gouvernman. ki ti swadizan annan tou solisyon, bokou plis dimoun pou perdi zot lanplwa. I regretab, me se sa ki mon pe war pe al arive Mr Speaker.

Malerezman dan diskour Prezidan in napa okenn direksyon ouswa Polisi ki pe adres sa sityasyon seryezman. Pe zis koupe parti koupe. Ki nou'n tande, se ki sa soutyen ki bokou biznes ti pe depan lo la *FA4JR*, i garanti zis pou 3 mwan. Napa gidans kler ki pou arive apre.

Tro bokou lensertitid dan pei. Sa diskour Prezidan in kree plis konfizyon ek lensertitid ankor. *URS* parey Onorab Zialor atraver ou Mr Speaker in elabor lo la, ti ganny kree avek en bi. Sityasyon ekonomik an 2018 ti konpletman diferan avek sityasyon ekonomik an 2020. Avek pandemik *COVID-19* mondyal e ki'n osi pa'n eparnye Sesel.

Scheme URS in bezwen ganny re aziste pou dil avek sityasyon di zour. Bokou bann dimoun ki ti dan sekter formel e ki pa ti pe kapab debourye ek sa kriz ekonomik in war en alternativ avek *URS*.

Ozordi, Onorab Zialor atraver ou Mr Speaker, i konn tre byen. Akoz i ti parmi bann zofisye ki ti ganny en syez kot *Ocean Gate House* koman zofisye Lanplwa pou kordin program *URS*. Mon pa pou al pli lwen ki sa.

Parkont nou'n tande Lendi swar ki lafen Fevriye *allowance*

URS pou koup par lanmwatye, pou vin R3500. Mwens, mwens ki *minimum wage*. Nou'n tann osi en madanm, en zenn madanm, en zenn manman dir ki malgre sa pou koupe i pou kontinyen travay 8er-4er.

Nou'n tande osi ki lafen Mars sa *Scheme* pou nepli egziste. Yer nou'n war atraver reportaz *SBC* ki kantite konfizyon ek lensertitid ki'n ganny kree par lanons Prezidan lo sa program.

Mr Speaker, plis ki 1800 dimoun pou war zot san en reveni lafen Mars. 1800 dimoun ki annan fanmir, ki annan en lakour, ki annan depans, ki annan zanfan. Zot lavi i dan en lensertitid terib ki difisil pou eksplike. Silvouple annou aret zwe avek vant nou pep.

(APPLAUSE)

HON WALLACE COSGROW

Mon'n ekout atantivman pandan sa bann dernyen semenn. E osi dan diskour Prezidan bann diferan komanter e largiman ki mon kapab dekrir koman bann latak lo nou sistenm sosyal.

En sistenm ki'n ganny etabli diran bokou lannen. An mezir ki sosyete in evolue, sistenm in bezwen ganny aziste

pou met azour avek legzizans en sosyete modern.

Les mwan eksplik sa nouvo Ladministrasyon kote striktir sipor sosyal ki nou Gouvernman avan ti met an plas i sorti. Pou bann ki metrize byen zot Konstitisyon. Zot a konn tre byen sa parti preanbil nou Konstitisyon. E mon pou site an Kreol,

“Devlop en sistenm demokratik ki ava asir en striktir adekwat e progresiv ki ava garanti manze, lenz, lozman, ledikasyon, lasante, ek en standar lavi progresif pou tou Seselwa”.

Sa i sorti direk dan Lalwa Siprenm nou pei Mr Speaker. Dan en langaz tre senp e tre kler. Program Sosyal ki nou'n met an plas se senpleman lenplimantasyon provizyon nou Konstitisyon, ki reprezant vizyon nou pep.

Mr Speaker, tou resaman Minis in aprouv avek Konsey Minis in target reform *across system* Proteksyon Sosyal. E yer dan Nouvel nou'n tande ki sa reform i atase ek en promes \$30milyon koman sipor bidzeter sorti kot Labank Mondyal.

Mwan mon enn Mr Speaker, ki konpran nesosite sipor bidzeter, sirtou dan sa sityasyon kot nou ete ozordi.

Me fotespere Mr Speaker, ki sa sipor pa vin avek bann sanzman radikal, ki pou afekte negativman kous pli vilnerab dan nou sosyete.

Nou'n tann en kantite latak lo sistenm Proteksyon Sosyal, ek bann lezot program ki pe ede soutenir serten kous nou popilasyon ki dan sityasyon vilnerab. En latak lo sistenm sosyal, se en latak lo provizyon nou Konstitisyon.

En kestyon, eski sa Gouvernman pe anvizaze fer sanzman dan nou Konstitisyon li menm? Nou sistenm sosyal i al bokou pli lwen ki benefis finansyel. E parey mon'n eksplike i ankre dan nou Konstitisyon. I en sistenm entegral ki garanti ledikasyon nou zanfan a tou nivo, san pran kont son stati sosyal.

Lasante nou pep e lezot ankor. Ler Prezidan ek son bann Minis i koz direk lo sistenm sosyal, e zot anvoy bann sinyal negativ anver nou pep, i fer mwan e bokou Seselwa mazin bokou. Eski nou pe al war en remaniman dan bann lenstitisyon sosyal? Eski, mon poz sa, eski lekol pou peye? Eski lasante pou peye?

Tousala i bann kestyon ki mon poz la. I pou sertenman bann topik ki mon plis ki sir

nou pou retourn lo la tre byento diran sesyon nou Lasanble.

Servis piblik Mr Speaker. Mr Speaker servis piblik in osi en size ki'n ganny aborde dan diskour Prezidan. Ozordi plis ki zanmen lenkyetid en lensertitid i bokou dan servis piblik. Sirtou parmi bann profesyonnel dan bann pozisyon *Management*.

Bokou pa konnen kot zot *stand* avek sa nouvo Ladministrasyon. I annan ki dir ou napa direksyon e gran laliny Polisi. I reste parey. I pli enkyetan Mr Speaker, ler Prezidan i monte e dir ki napa *file* ek *institutional memory*.

Mon rekonforte deklarasyon ansyen Prezidan Faure, kot in met en pe laklerte lo sa deklarasyon. Tou *PS* ek tou *CEO*, *well* lamazorite i ankor la ziska prezan. Zot ki diriz bann departman ek lenstitisyon sekter piblik. I sifi ki nou senpleman zwenn ek zot, ekout zot. Tou *file* administrativ i dan bann Minister ek bann lazans. Fer *Cabinet Policy meeting* parey ti egziste avan. E nou avan ganny *institutional knowledge*. *Knowledge* fodre rode pou gannnen. Sirtou ler nou nouvo.

Lekonomi Mr Speaker: in annan bokou lesplikasyon lo sityasyon leta lekonomi Sesel. Onorab Clifford Andre atraver

ou Mr Speaker, in sey eksplik diferans ant larzan dan kof Labank Santral e larzan ki Gouvernman i servi pou fonksyonnen.

Onorab avek tou respe, ou en Avoka, silvouple pa *mislead* Lepep Seselwa! Sa lesplikasyon in resaman vin avek en fo lenformasyon kot Gouvernman e bokou Manm lo lot kote latap pe dir ki zot in vin zwenn en kof vid! Sa i en fo lenformasyon ki devret byen ganny eksplike.

Onorab Woodcock atraver ou Mr Speaker, in osi sey senm en fo lenformasyon dan son lentervansyon bomaten. In vin dir nou ki gras a Lasanble mazorite LDS ki nou annan en rezerv. Rezerv Onorab, in gradyelman ogmante depi 2008! Baze lo en program ekonomik ki Gouvernman US Lepep US ti met an plas!

(APPLAUSE)

HON WALLACE COSGROW

Mon pa krwar i pou konnen aköz sa bann letan si mon pa tronpe i ti Paster.

(laughter)

HON WALLACE COSGROW

Premyerman Bidze Gouvernman i en prozeksyon lo

en baz anyel, baze lo bann reset reveni, sorti prensipalman dan nou rezim *tax* e bann lezot *fees* ki ganny enpoze.

Lalwa pa permet Gouvernman akimil sirplis e met dan en kof imaziner. Parey bokou i le fer nou pep krwar. Okenn sirplis ki ganny fer - e la mon le fer resorti tou le lannen depi 2008 Gouvernman i *set* en *primary surplus target*. Sa sirplis i ganny konverti pou pey det pei. Se pou sela rezon ki an 2021 nou *target debt to GDP ratio* ti pou ariv 50poursan.

Se aköz bon zeran lekonomi par Gouvernman o paravan ki ou war ozordi nou'n ariv avek sa rezerv ki nou annan. E nou'n nobou pey nou det.

En deskripsyon pli enkyetan Mr Speaker, se ki nou pei i en kales kase. Zot souvan fwa pran kredi o swadizan zot, zot in vey depans Gouvernman. Be ki zot in fer pandan sa dernyen 4an? Bidze ti vin devan zot, zot pa ti war kales i kase?

Statistik 2019 lo koneksyon reveni, lo *tourism arrival*, lo leksportasyon, lo to somaz, savedir kantite dimoun ki pa dan lanplwa. Lo lakantite lenvestisman par Seselwa e etranze. En *average primary surplus* an mwayenn 2.5

poursan par lannen, i penn en portre diferan ek sa enn ki Prezidan in penn Vandredi.

2020 ti pou en lannen rikord dapre tou lendikasyon ekonomik. Malerezman pandemik *COVID-19* in afekte tou nou lakonplisman ekonomik pandan 2008. Ki nou'n fer depi 2008.

Mr Speaker, pou sey zistifye tou sa bann koupir ki pe vini tre byento dan Bidze 2021, Prezidan in donn nou detrwa statistik lo depans, lo Kontra sekirite pou protez bann *asset* Gouvernman. lo Kontra netwayaz pou *LWMA*. E lo *rent* ki Gouvernman i peye pou bann lokasyon prive.

Mr Speaker, Prezidan in deklar sa koman en sirpriz e alarman. Me pandan sa dernyen 4an, lekel ki ti aprouv Bidze pei? Lekel ki ti annan kontrol *FPAC*? Me sa pa ti vin devan Lasanble kontrole par *LDS*?

(APPLAUSE)

HON WALLACE COSGROW

Sa i zis bann lentrodkasyon pou zistifye koupir ki pe vini. Mon repete ankor, lensertitid ek konfizyon i bokou parmi bann lakonpanyen sekirite ki annan Kontra ek Gouvernman. mazorite sa bann Kontra i lo en

baz lonterm. Tou *tender* in kennsel la. E an se moman mon konpran ki mazorite lakonpanyen pa ankor ganny peye pou servis.

Kontrakter i enkyet pou ki pe arive ek zot Kontra. Pareyman bann pti kontrakter netwayaz ki fek ganny zot Kontra 3an lannen pase, pe santi zot vreman konfize ek sa ladres lo Leta Lanasyon.

Mr Speaker, *Air Seychelles*: Permet mwan koz briyevman lo lanons Prezidan apropo *Air Seychelles*. Premyerman sa lanons parey bokou lezot in kree bokou konfizyon parmi *Management* ek bann *staff Air Seychelles*. E sa in ganny resorti parey nou tou nou'n war dan bann diskisyon swa lo TeleSesel, swa lo *SBC*. swa lo rezo sosyal. E menm, e mon kapab konpran sa reaksyon.

Zot in fer anvole *The Creole Spirit*. E *Air Seychelles* i lafyerte tou Seselwa. I nou *airline* sa. I nou *pride* e i nou lidantite! Dan en letan kot Lendistri Lavyasyon in tonm net ater aköz pandemik *COVID-19*, e loportinite lanplwa lokal i tre limite, e lefe ki bokou zot, zot bann profesyonnel tre spesyalize, zot pe fer rezon ki zot pou fer.

Zot in solider zot. Zot in pran *pay cut*, zot in *work from home*, zot in rod tou sa zwen pou *cut cost*. E zot in rod tou sa loportinite pou anmas reveni. Me bann *staff* i osi soke akoz zot konnen ki lakonpanyen ti an 2018, travay lo en plan restriktirasyon ki met sa lakonpanyen operasyonnelman lo en semen profitabilite, baze lo en diferan *business model*.

Prezidan in dekrir sityasyon *Air Seychelles*, in propoz en restriktirasyon ki kas *Air Seychelles* dan 3 diferan antite. *Ground handling Services*, domestik ek kargo ki an zeneral ler ou get li bann diferan *cost centers* ki vyab. E dan mazorite ka profitab.

E propoze pou retir sa bout enternasyonal ki dapre analiz i pa profitab. Prezidan i apre poz sa la avek Lasanble e demann nou, nou pwennvi lo la, pou li kapab fer desizyon. San ki mon al konplik keksoz, e dabor pou bann ki'n swiv aktyalite, in annan bokou lesplikasyon ki'n ganny donnen.

Det i enn ki tre o, me i pou reste pe enport ki arive avek *Air Seychelles*. Retonbe ekonomik ki *Air Seychelles* i anmennen, lakantite *staff* ki posibleman

kapab ganny fer *redundant*. Eksetera, eksetera.

An dizan tousala Mr Speaker, mwan mon enn ki krwar ki nou bezwen kontinyen fer anvole nou *Air Seychelles*. E mon pou donn tou mon sipor pou rod en solisyon. Mon pou donn tou mon sipor *Management* ek *staff* lakonpanyen pou rod en solisyon.

Mon krwar ki zot plan *going forward* i enn ki bon. E ki merit tou konsiderasyon nouvo ladministrasyon *LDS*.

Drog Mr Speaker. Mr Speaker, mon enn bann dimoun ki anvi war en lafen avek sa fleo drog dan nou pei. Prezidan ti pran en lapros diferan dan son diskour kot in demann bann azan *unit* ki lit kont drog *ANB*, pou prezant zot demisyon ek Komisyoner Lapolis Lendi pase, si zot enplike dan bann akt koripsyon.

Mon demann mon lekor si Konmisyoner Lapolis in ganny okenn let *resignation* Lendi? Ki'n arive an rezilta sa bann *statement* lo drog dan diskour Prezidan? Se ki nou'n war en bann lalis ki pe ganny sirkile partou ek portre dimoun. Ki pe ganny akize *left*, *right* and *center* enkli azan *ANB*.

E la mon mazin en zanmi ki dir mon nonm son non, me solman mon pa pou nonm ou non, mon frer. Mwan si mon ti dan plas Prezidan, mon ti pou *call* Komisyoner Lapolis demann li *nominal roll ANB*. Organiz en *meeting* ouswa de, avek tou son rekomandasyon *social distancing* avek sa bann azan. E met mon pwen anver zot. Mon ti pou servi diskour Leta Lanasyon pou met devan mon stratezi pou lit kont fleo drog.

Mr Speaker, an terminan, mon anvi eksprim mon dezapwentman anver sa diskour Leta Lanasyon Prezidan. Bokou sekter kle prodiktiv dan nou lekonomi tel ki lapes, lagrikiltir, Sekter Finansyel, e lalis i long, pa'n ganny touse.

Alors nou pa konn vreman zot sityasyon aktyel. Se vreman bann sekter ki nou'n depan lo la pandan letan pandemik. Se zot ki'n soutenir nou lekonomi. An zeneral in en diskour tre siperfisyel kot menm bann *issues* ki'n ganny touse in vreman a la lezer.

Mr Speaker, malgre tou mon kontinyen reste angaze pou travay atraver Lasanble Nasyonal, pou ede tir nou pei dan sa kriz finansyel. E lasante piblik, e pou tourn nou pei

byenneme Sesel lo en semen prosperite desito posib. Avek sa Mr Speaker mon a remerci ou pou laparol. Mersi.

(APPLAUSE)

MR SPEAKER

Mersi Onorab. Mon santi mon bezwen fer en pti klarifikasyon. Lo size *Attorney General*. Akoz Prezidan pa ti rekonnnet li dan komansman son diskour. Zis les mon dir ki lo lalis envite ki nou ti anvoy kot *State House*, nou ti'n mank non, *Attorney General*.

Alor Prezidan ti napa sa lalis avan. E sa i pirman nou lafot. So i pa ki mon pe akiz Onorab Cosgrow okenn move lentansyon. In zis mon bezwen aksepte ki in ariv koumsa.

Lo lot size mon pa vreman anvi rebran parol Onorab Pillay ek Onorab Georges. Me selman avek ensistans piblik mon bezwen pas lo la en pti gin. Wi, mon siport zot lapel ki kominikasyon sorti kot Minister Lasante i devret pli kler e pli souvan.

Me selman mon zis repet ankor, akoz mon'n annan kominikasyon. E mon fer sa pou piblik ki'n adres mwan lo la. Akoz mon'n annan kominikasyon avek osi Minister Lasante, mon'n zis anvi

eksprim zot dezir osi ki piblik i vey byen ki Minister Lasante pe dir lo lekel ki devret raporte dan tel sant.

Si zot pa tandé lo televizyon, silvouple enform zot lekor avan zot ale, pou envit lenkonvenyans pou zot menm. Mersi.

Onorab Pillay ou le ...?

HON SEBASTIEN PILLAY

Wi. Mersi Mr Speaker. E mon remerci Onorab Georges ozordi ki li osi in komans ganny sa bann mesaz e *call*. E la ou menm ou, ou pe gannyen.

E mon krwar yer Mr Speaker, ler mon to dir ou sa mon lentansyon ti bon, akoz malgre ki sa bann lenformasyon ki Minister Lasante ti pe pas ek piblik, ti *still* annan en kantite problem ki pe arive kot dimoun i vin dan laliny, espere, ale eksetera.

So ankor enn fwa nou bezwen enplor Minister Lasante. Petet si lafason ki i pe pas son lenformasyon pa pe *reach* dimoun, sey rod en lo *medium* e petet entansifye lakantite lenformasyon ki pe ganny pase avek dimoun.

I pa en kritik lo Minister Lasante sa. I zis ki nou le sa prosesis i mars byen. Akoz sa group dimoun ki pe pran vaksen i enn bann group pli

vilnerab ki annan, an relasyon avek sa posibilite ganny sa viris. Mersi pou sa Mr Speaker.

MR SPEAKER

Mersi. E mersi tou Onorab. Nou a pran poz la e nou a retournen 11er. Mersi.

(BREAK)

MR SPEAKER

Nou ava apel Onorab Philip Monthy.

HON PHILIP MONTHY

Mersi Mr Speaker. Bonzour Mr Speaker. Bonzour tou Manm Onorab e en bonzour spesyal pou zabitan Cascade ki'n ede ki mon la ozordi e fer mon premye ladres dan Lasanble Nasyonal. E pou sa mon remerciye zot.

Mr Speaker, le 22, 23 ek 24 Oktob, 2020 pep Seselwa ti par en gran mazorite swazir pou ekrire en nouvo paz dan liv listwar nou pei. Kot bastyon ti degrengole e sa lannen ki bokou ti kontan dekrir li koman "*Lannen zanmen*" ti anfen arive.

Sa pep ki parmi bokou ti'n konn zis en sel Gouvernman depi zot nesans;- zis parey mwan menm Mr Speaker, ti par en mazorite absolè swazir pou kit dernyen en sistenm ki son moto prensipal sete si ou avek

nou, ou pou *ok*, oubyen ou menm plis ki *ok*. Me si par kont ou ganny lodas reve viv dan en pei kot la demokrasi, laliberte lekspresyon ek lazistis i bann pratik fondamantal ki ou santi devret bann norm lo ki en sosyete i merit pe fonksyonnen, ou ti pou bezwen fer sir ki ou pare pou fer fas avek lakonsekans ki sa desizyon ti pou anmennen.

Mon krwar ou konn tre byen ki mon pe dir Mr Speaker, akoz ou enn sa bann ki ti ase brav pou defye sa sistenm. Me nou tou nou konnen ki ti arive avek ou e lezot ki ti swazir pou debout lo kote laliberte e lazistis.

Me kantmenm mon kapab anmenn dir ki dan en sans ou'n sanse Mr Speaker, akoz plizyer nou bann frer ziska ozordi nou esey rode ki'n arive avek zot. Bann fanmir ankor pe sey rod larepons e mon oule dir zot ki mon santi zot douler.

Mr Speaker, i annan petet pe dir, be la annou sipoze pe koz lo Leta nou Nasyon, me pa en letan pou relev lepase, me mwan mon pou dir zot se egzaktaman sa bann labi, viktimizasyon ek lenzistis pandan tou sa lannen, ki'n fors sa pep fer sa sanzman le 24 Oktob 2020. E fer ki ozordi nou

pe koz lo sa nouvo leta ki nou pei i ladan.

Mr Speaker, sanzman pa arive zis akoz dimoun in anvi sanzman. Non! Sanzman i arive ler dimoun i konsyan ki i neser pou sanze. E sa se ki'n arive dan sa pei. I enportan alors pou nou koman bann Dirizan ki sa pep in met sa konfyman dan nou pou nou fer sir ki nou gard sa promes.

E Mr Speaker, se sa ki Prezidan Ramkalawan in fer dan son premye Diskour lo Leta nou Nasyon. I annan ki'n dekrir li koman arogan e mank diplomasi. E les mon a dir zot ki dan laverite napa diplomasi! Seselwa in tro ganny anbete pandan sa 43an par bann promes vid ki lamazorite in vwar li koman en *breath of fresh air* lafason ki Prezidan in adres zot dan son Diskour lo Leta nou Nasyon.

Omwen la Mr Speaker, nou konnen ki vre Leta nou Nasyon i ladan, e kwa ki pou ganny fer pou tir nou dan sa kales kase ki malerezman nou retrouv nou ladan. Seselwa i devret pe pran Ladres Prezidan Wavel Ramkalawan koman en *wake-up call*, Mr Speaker e non pa koman en lensilt.

I annan plizyer size ki Prezidan in aborde ki mon santi i enportan pou mwan ranforsi lo

la. Prezidan in koz lo en nouvo sans laliberte, solidarite e sourir lo figir nou pep.

Mr Speaker, se egzaktaman sa ki mon ti vwar pe ganny manifeste sa Dimans le 25 Oktob bomaten parmi nou bann frer ek ser Seselwa. Akoz zot ti realize ki nou pou anfen pe al viv dan en sosyete, kot demokrasi pou al ganny ranforsi e laliberte lekspresyon pou a lapropte tou Seselwa. Zis parey Prezidan in fer nou remarke dan son ladres.

E sa sourir Mr Speaker, i pa ankor disparet lo figir nou pep parey Lopoziyon i oule fer nou krwar. Seselwa i zis tou senpleman konsyan ki nou pe pas dan en sityasyon difisil. E zot osi konsyan ki byento pou annan en laklerte lo lorizon, la ki nou parmi bann premye pei o monn an term vaksinyasyon kont COVID. E la Mr Speaker, mon pou lans en lapel avek tou Seselwa, spesifikman zabitan Cascade, pou kontinyen swiv bann mezir ki Lotorite Lasante pe demann nou pou respekte.

Leta nou Nasyon ozordi Mr Speaker, se enn kot nou pe anfen viv dan en pei zot napa lafreyer, ki ou pou ganny viktimize si ou annan en lopinyon diferan avek sa Gouvernman ki o pouvwar.

An dizan sa Mr Speaker, mon pa pou kapab kontinyen san ki mon adres serten remark ki mon bon zanmi *de longue date* - nou fek pe koze taler dan *break*, Onorab *Leader* Lopoziyon in fer dan son lentervansyon.

Onorab Pillay in fer remarke ki aktyelman i annan en mank tolerans pou lopinyon diferan e in kontinyen an dizan les dimoun koze, sante, kritike e ki i enkyet pou nou demokrasi. Mr Speaker, lekel ki'n lager pou anmenn sa demokrasi, ki ozordi Onorab Pillay pe koz labous plen lo la. Si pa Prezidan Ramkalawan ansanm avek ou menm, Mr Speaker.

(APPLAUSE)

HON PHILIP MONTHY

Avek Onorab Georges, Minis Ferrari e lezot. E atraver ou Mr Speaker, mon pou demann Onorab Pillay pou o kontrer dir mersi ki ozordi i kapab al an direk lo televizyon nasyonal kritik sa Gouvernman ki o pouvwar. Ki ozordi nenport ki endividi ki annan en lopinyon diferan i kapab eksprim li libreman lo rezo sosyal, ou atraver nenport form medya san okenn lafreyer. San okenn krentif ki bann Tonton Makout

pou fer ou disparet. Se sa Leta nou Nasyon ozordi, Mr Speaker.

Akoz anba sa sistenm *SPUP/SPPF/US* ki mon bann Koleg Onorab dan Lopozisyon i sitan krwar ladan, si ou ti pe opoze ou ti pou zis evapore, ni loder pa ti pou santi. Annou alors pa sey vin fer sa pep krwar ki zot in mal fer zot desizyon le 22, 23 e 24 Oktob, 2020. Annou pa sey vin anbet Seselwa an dizan ki Prezidan pa'n vin prezan okenn plan, akoz se zot ki napa okenn plan Mr Speaker. Akoz si zot ti annan enn zot pa ti pou retrouv zot dan Lopozisyon ozordi.

(APPLAUSE)

HON PHILIP MONTHY

La i fer mwan mazin bann rezon ki ansyen Minis Lasante ti donnen lo akoz pa neser konstri en sant izolasyon Sesel. Mr Speaker, la plis ki zanmen nou bezwen en sant izolasyon dan sa pei e mon kontan ler mon'n tann Prezidan anonse ki konstriksyon lo en sant izolasyon pou konplete ver lafen sa lannen.

Bann Minis byento pou vin dan Lasanble, e nou ava annan loportinite pou kestyonn zot lo plan zot bann Minister. E la pep Seselwa a zize pou zot menm si vre sa Gouvernman

tou Seselwa ki o pouvwar i vremen napa en plan.

Pou evite ki nou tonm dan repetisyon lo sa ki'n deza ganny dir par bann Onorab ki'n koz avan mwan Mr Speaker, mon pou aport mon bref kontribisyon lo serten lanons ki Prezidan in fer dan son ladres. E mon pou komans par fame *scheme FA4JR*. Prezidan in anons rediksyon sa *Scheme* pou mwan Fevriye ek Mars ek son abolisyon konplet apartir le 1 Avril.

Mr Speaker, menm si mon antyerman dakor avek sa desizyon prenon an kont labi ki'n arive. Kot mon'n tande i annan biznes ki ti pe ganny peye e an menm tan pe fer demann pou *GOP*. Kot in annan osi biznes ki ti nepli pe *operate*, me ki kantmenm sa ti pe ganny peye anba sa *Scheme*. Mon asire ki in annan plizyer legzanp labi ki'n arive Mr Speaker.

Me kantmenm sa mon pou demann Gouvernman pou pa negliz bann biznes ki ti pe *operate* dan en fason onnet, e ki pou posibleman pou vwar zot pe vremen ganny difikilte pou sirviv a sa moman lensertitid ki kominote biznes pe pas ladan. Restriktirasyon sa *Scheme* a ede elimin sa bann labi e fer ki sa ki vremen merite a benefisye.

Part rental Mr Speaker, nou pou bezwen rekonnèt ki la osi in annan labi. Menm si mon pou dakor ki *rent* i tre ser Sesel. R12milyon par an pou asiste 300 dimoun avek zot *rent* i tou senpleman pa kapab kontinyen. Mon konn serten ka kot en dimoun pe ganny R8mil par mwan me pe lwe lakaz R10mil. Sa i en labi Mr Speaker. Me la osi mon pou dir ki annan dimoun ki pe vreman travay dir e pe serye pou fer 2 bout zwenn, me ki kantmenm *fall short*.

Mon lopinyon i ki avek en bon sistenm *vetting* an plas pou elimin okenn labi, sa bann dimoun ki tonm dan sa kategori ava kapab ganny serten lasistans pou soutenir zot. E mon pou demann Gouvernman pou eksplor tou bann opsyon posib pou fer ki *rent* an zeneral dan Sesel i desann.

URS Mr Speaker. Kantite mesaz e *call* mon'n resevwar yer lo size. I montre ki i enn ki ase sansib me ki osi montre ki nou Prezidan Ramkalawan pa per pou pran bann desizyon brav ler i neseler.

Mr Speaker, mon konpran lenkyetid mon bann zabitan, ki pou direktman pe ganny touse par sa desizyon, me pei i tou senpleman pa kapab kontinyen soutenir en tel *Scheme* ki pe

kout nou R12milyon par mwan oubyen 144milyon par an si nou kontinyen avek sa program parey i ete.

Mr Speaker, mon mesaz pou tou nou bann sitwayen ki lo sa *Scheme* se pou ekout lapel Minister Lanplwa pou aret swazir ki travay nou pou fer. Nou napa en swa la Mr Speaker. Nou priyorite la a sa moman se rode ki mannyer nou pou kapab soutenir nou fanmir.

Ledikasyon: Koman en edikater par profesyon mon pa pou kapab pa dir detrwa mo lo sa size ledikasyon dan nou pei. Menm si i enn ki pa'n ganny touse par Prezidan Ramkalawan dan son ladres. Me kantmenm Mr Speaker, en mo ki Prezidan in koz bokou lo la se responsabilite. Mon pou alors envit tou bann etidyan e ansenyan pou limit abiz bann propriyete lekol. Silvouple servi sa bann resours byen, akoz gaspiyaz ek labi i kout larzan.

Mon pou lans en lapel bann zenn *graduates* ki napa en lanplwa, pou zot konsider ansenyan koman en opsyon. Minister Ledikasyon i kapab anploy zot e donn zot formasyon pou omwen en 3an e sa i a fer ki zot a kapab ganny en lanplwa e ede tir en pe etranze dan Sesel.

Mr Speaker, sa demars par Minister Ledikasyon pou fer ki bann lekol i fonksyon avek plis lotonomi, i enn ki mon vremen apresye. Sa i en prosedir ki lontan in ganny anonse e mon santi ki ti pe ariv en pe tro dousman. Byento bann *headteacher* ek zot *Management Team* ava pe annan *ownership* lo zot lekol. E sa a fre ki serten desizyon rapid ki pou anmenn benefis direk lo zot lekol a kapab ganny pran lo nivo *Management* Lekol li menm.

Me mon osi profite pou dir sa bann Direkter e Direktris lekol pou abord sa nouvo fason travay avek bokou profesyonnalizm e *accountability*. E demann i osi al ver bann etidyan pou zot pran zot letid o serye e pran sa bann loportinite ki zot gannyen byen. Mon konn plizyer mon bann ansyen etidyan tre entelizan me ki'n swazir pou neglig zot letid. Ozordi zot fer mon leker fermal ler mon get sitasyon ki zot ladan. Pa les zot silvouple, bann etidyan ariv dan menm sityasyon. Ledikasyon i lakle pou sikse.

Air Seychelles, Mr Speaker: Mon 2 koleg *MNA* pou Au Cap ek Anse Aux Pins in deza eksprim solidarite avek tou travayer *Air Seychelles*.

Nou'n annan diskisyon avek plizyer zot e mon santi ki mon 2 koleg in dir ase lo sa size. I vre ler ou get kantite det lo pei ki *Air Seychelles* in anmenn, reaksyon imedya se pou fermen.

E sete sa mon reaksyon osi o komansman. Me mwan la mon oule eksprim mon solidarite avek zot e demande ki Gouvernman i fer tou sa ki posib pou sey sov nou *airline*. Sa tim *Management* ki la pe deza montre ki zot in kapab redwir pert ki sa lakonpanyen pe fer. Me domaz ki sa in vin a en moman difisil pou biznes sirtou si ou dan biznes *airline*.

Pou ferm *Air Seychelles* Mr Speaker, i kapab anmenn plizyer lezot difikilte. Alors si i annan en posibilite pou ki nou bann avyon i kontinyen anvole, silvouple annou eksplor li.

Mon distrik Cascade: Mr Speaker, apard sa viktwar ekraze par Prezidan Ramkalawan dan sa dernyen eleksyon in osi annan en lot sok ki'n arive dan sa eleksyon. E sa Mr Speaker, se pa lot ki sa desizyon ki bann zabitan Cascade in deside fer pou ki sa bastyon i anfen sanz lanmen.

(APPLAUSE)

HON PHILIP MONTHY

Mon pou alors profite Mr Speaker, pou remersye tou Kaskadyen ki'n met zot konfyans dan mwan e osi remersye mon bann aktivis ki'n donn zot letan ek kouraz pou ki nou distrik i tras en nouvo semen. In en loner pou mwan vin zot lavwa dan sa setyennm Lasanble. Mon konnen sa viktwar i ankor fatig plizyer zot. Akoz toulezour mon antann en nouvo zistwar. Lekel ki'n *sponsor* mwan, entel ou entel. Me swa ki zabitan Cascade in fer i kler Mr Speaker, sa bann mansonz pa pou derout nou.

Diferans imedyat ki zot in kapab konstata, se ki mon'n vin travay pou tou dimoun mon distrik san demande si ou ti vot pou mwan oubyen non. Ler en zabitan ki en siporter *US* i apros mwan pou en led e mon aktivis i dir mwan sa i en gran *US* sa! Mon dir li non, sa en zanfan Sesel akoz Cascade i pou tou son zanfan.

(APPLAUSE)

HON PHILIP MONTHY

Akoz si Cascade i enn parmi bann rar distrik k kot *MNA* in ganny plis vot ki Prezidan, se tou senpleman akoz in annan plizyer siporter *US* ki'n vot pou mwan. E mon pa pou kapab inyor zot. Si *US* in travay

koumsa dan lepase dan distrik, mwan pa koumsa ki mon pou travay.

Mr Speaker, ler mon pe adres leta mon distrik, mon pou fer kler ki mon pa pe vin fer okenn latak personnel lo person e mon pe plito vin dir keksoz parey i ete, tel parey nou Prezidan i fer.

Mr Speaker, Cascade pou sa bann dernyen lannen in ganny kit deryer. Mon krwar nou sel distrik ki napa en Sant Kominoter, nou bann zenn i bezwen fer bann aktivite deor anba en lavarang dan en kondisyon ki pa akseptab. Fer plis ki 5an nou sant kominoter in brile e sa i fer mwan demande si nou ti vreman annan zentere nou bann zabitan a ker.

E la Mr Speaker, se avek en gran plezir ki mon pou sezi sa lokazyon ozordi, pou dir tou zabitan Cascade ki nou Sant Kominoter pou al ganny konstri byento. I pa pou pran nou 5an pou fer sa. Nou bann zenn e tou zabitan an zeneral are ganny sa landrwa konvenab kot bann rankont regilye a kapab ganny organize, osi byen ki bann aktivite pou distrer zot e evite ki nou bann zenn i tonm dan move frekantasyon.

Mr Speaker, I pa en sekre ki zis en pti bout ki'n toultan

benefisye avek bann kontra Gouvernman. Ler ou rod lenformasyon lo lekel ki'n ganny Kontra pou netway tel ou tel landrwa dan distrik, tou kou bann menm non ki monte.

Mr Speaker, Sesel i pou tou son zanfan, mon pa pe dir aras sa bann dimoun zot kontra mwan. Sa ki mon pe demande se ki i annan plis latransparans dan lafason ki bann Kontra netwayaz dan distrik i ganny donnen pou ki plis nou bann zabitan ki anvi leve debrouye ava zot osi kapab ganny sa sans pou anmennen en lasyet manze dan lakour.

Sa zafer kot zis enn oubyen 2 dimoun ki pou ganny tou Kontra Netwayaz baze lo zot afilyasyon politik in ler pou arete enn fwa pour tou.

Mr Speaker, Cascade i en distrik kot nou annan en gran kominote peser, me la ankor an diskite avek plizyer zot mon'n aprann ki napa gran keksoz ki'n ganny fer pou met a zot dispozisyon bann lenfrastruktir neser, pou amelyor zot kondisyon travay. Nou bann peser ankor pe vann zot pwason lo ban palet obor semen e sa dan li menm i en lenkonvenyans avek sa bann kantite transpor ki frekant sa landrwa.

Proze pou konstri nouvo baze in komanse, me parey plizyer proze anba sa Gouvernman presedan zis ou vwar serten faz proze ki ganny ferm apre i aret lanmenm. E la ankor Mr Speaker, mon pou profite pou dir nou bann peser ki proze pe al rekomanse byento. Kot finalman zot ava fonksyonn dan en lanvironnman ki sen, ki a satisfere Lotorite Lasante e sanniter e ki enn fwa pour tou a fer ki sa bout semen a ganny libere.

Mr Speaker, en bann defi ki plizyer Seselwa pe fer fas avek, se sa sityasyon lakaz e sa pa en leksepsyon pou nou zabitan Cascade, malerezman sa i enn bann zouti politik ki'n pli ganny servi dan lepase. Mon konn serten endividi ki pe pey lakaz pandan plizyer lannen. E la mon mazin Monique e ki ankor pe esper menm. Manrmay in vin adilte e sa paran i ankor pe esper menm, me pourtan i pe peye menm li tou le mwan.

Sa ki ti annan later ek lakaz ki'n van e apre vin tonm lo lebra Gouvernman, zis aköz i en gran aktivis sa ansyen Gouvernman, li in gannyen. Se pour sa Mr Speaker, ki mon akey sa nouvo fason fer kot bann *MNA* pou aprezan ganny

enplike dan prosedir alokasyon lakaz dan zot distrik. Sa Mr Speaker, i a fer ki bann zwe politik ki'n egziste pandan sa 43an kot lakaz i konsernen i a vin zis en pratik lepase.

Mon pe swiv byen sa proze 24 24 kot *ex-PMU* Petit Paris e mon asir tou mon bann zabitan ki sa bann dimoun ki pou ganny en *unit*, i pou vremen bann dimoun ki *meet* kriter etabli par Gouvernman, me pa bann kriter politik sorti kot serten endividi.

Mr Speaker, dan en *meeting* avek *PS* pou Lakaz resaman, mon'n aprann ki i annan en landrwa ki'n ganny idantifye ankor Petit Paris pou en lot proze devlopman lakaz. Menm si sa i ankor dan staz planifikasyon, mon pou ankouraz tou sa bann endividi ki pa pou benefisye avek sa proze *ex-PMU* pou kontinyen avek zot peyman, ki a fer ki zot a pli byen plase pou ganny en lozman dan bann prosen proze lakaz dan distrik.

Lo sa menm size Mr Speaker, mon pou profite pou dir avek tou zabitan Cascade, ki later dan distrik pou nepli en zafer fanmir ek dalon. Si ou'n idantifye en morso later Gouvernman ki pa'n ganny dezinyen pou okenn devlopman kominoter pou vin

devan, si ou annan ou mwayen ou osi ou a ganny sans aste ou morso later, ki ou osi ou a kapab konstri ou lakaz.

Mr Speaker, mon pou lans en lapel avek Minister Lanvironnman ek Lotorite *Planning*, silvouple annou aret ser nou bann frer ki'n vin devan pou fer laplikasyon pou konble en morso, pou zot kapab ganny en landrwa pou fer marse zot biznes. Mon en zanfan Cascade ki'n grandi dan lanatir e ki apresye proteksyon nou lanvironnman.

Me Mr Speaker, ennler i neser ki nou annan en balans. Nou pa kapab dan en distrik kot later i deza en resours limite, anmar lanmen nou bann biznesmenn. Kot nou pe met priyorite lo detrwa pye mangliye ek zwazo ki zabitan zanmen i vwar.

La Mr Speaker, mon pe kot lo sa morso lanmer lo kote gos ler ou pe al dan direksyon Talbot. I annan plizyer dimoun ki'n fer demann pou konble sa morso lanmer, me anven. Mwan mon personnelman krwar ki i annan malis ek politik dan tousala. E la mon oule dir avek Steven byen koni koman ka. In dir mwan nonm son non ozordi, ki ler ou pase ou vwar son bann loto in pran

in met obor semen lo *bus stop* partou.

Kantite lannen i pe demande, pou li kapab konble sa bout lot kote semenn, me in ganny refize. Donk mon pe demann li e lezot pou pasyante, akoz mon asire ki byento zot soufran sa ganny soulaze.

Zenn: Zenn dan Cascade in ganny negligize Mr Speaker e i pa drol si plizyer nou bann talan sportif in tonm dan drog. La i fer mwan mazine ki Cascade in deza prodwi en atlet ki'n annan rikord lo nivo Lafrik dan atletik. Nou en distrik ki'n prodwi en kantite atlet. Me ki nou'n vwar lenfrastriktir sportif dan distrik? I preski non legzistans.

Plis zefor i bezwen ganny mete par nou nouvo Gouvernman, pou fer sir ki sa zenerasyon ki pe monte pa pas dan menm sityasyon. Mon rekonnèt ki nou dan en moman difisil, kot finansman i rar, me mon pou kantmenm fer en lapel avek Gouvernman e kominote biznes dan Cascade pou zwenn ansanm, pou devlop bann lenfrastriktir, ki a permet pou relans spor dan nou distrik. Nou bann zenn a anfen annan diferan aktivite pou angaz zot ladan olye zis al anpwazonn zot lekòr avek eroin.

Mr Speaker, pou annan responsabilite en distrik i pa en travay fasil, me i enn ki mon pe fer avek en gran lafyerte. Resours i limite, me mon apresye ler mon vwar serten biznesmenn onnet. Mon repete onnet, pe vin devan e pe ofer pou ede avek plizyer proze dan distrik.

Mon apresye ler mon vwar bann endividi pe ofer zot servis pou fer serten travay. La mon mazin Steve ek son papa Samuel, ki fek repar sa bwe ki lalimyer lo la ti'n aret alimen. Pou fer ki bann peser a kapab antre dan lapas sen e sof aswar. E nou pa'n bezwen esper *SFA* vin fer sa, mon remersye zot.

Mon mazin Ton Zan ki'n ede avek lalimyer dekorasyon pandan letan Nwel, ki'n donn ou son letan. E Michael pou fer ki nou bann peser i kapab ganny en sours delo pou zot servi kot bazar, ki ti napa. Lalis i long, Mr Speaker.

Mon profite pou envit tou bann lezot dimoun ki dan fason ou en lot i kapab kontribye pou fer en diferans dan nou distrik pou vin devan, akoz Cascade i pour tou son zanfan. Mersi Mr Speaker.

(APPLAUSE)

MR SPEAKER

Mersi Onorab. Onorab William in arive, mon ava apel li pou fer son diskour. Onorab Waven William.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, mon pou komanse par eksprim en gran remersiman nou Bondye. Mon pou sit osi ankor enn fwa sa vers dan Labib, dan liv Eklezyas, verse 14. Mon site, "Ler letan i botan, *être* kontan. Me letan i move konsidere. Bondye in fer enn e lot osi. Alor en zonn pa kapab dekouver nanryen konsernan son fitir."

Mr Speaker, mon repete, "Ler letan i botan, *être* kontan. Me letan i move konsidere. Bondye in fer enn e lot osi. Alor en zonn pa kapab dekouver nanryen konsernan son fitir."

In montre plizyer Dirizan ki letan nou zwe sourd lo son pep e krwar ki mwan ki la ouswa nou ki la, en pep i kapab sanz en Gouvernman an solidarite. E sanmenm sa ki'n arive Sesel, Mr Speaker.

In arive, menm si ti annan plizyer manev tel parey;- labi pouwar atraver divers kalite manipilasyon zot pozisyon, move zesyon larzan piblik e finalman pran otaz nou demokrasi, par dizourd

Lasanble Nasyonal malapropo par ansyen Gouvernman, Mr Speaker.

Mr Speaker, i evidan sa ki ou senmen ou rekolte pli tar, me sa move rekolt pa sa ki koupab ki pe rekolte, Mr Speaker. Me se nouvo Gouvernman e nasyon Seselwa ki pou bezwen al dil avek aprezan.

Dan botan ansyen Gouvernman pa'n profite pou fer o maksimonm ek resours pei atraver travay dir sa pep. Parey proze lakaz, ki ti'n merit konplete letan ti annan larzan, proze laplenn, *daycare centre*, klinik e mentenans lo plizyer lenfrastruktir Leta ki pe deteryore dan distrik. Tel parey sistenm desarz kabinen, sistenm drenaz dan bann *housing estate* enkli sa sant izolasyon ki Prezidan ti'n fini koz lo la ki ti dan zot gran plan Mr Speaker.

Konmsi sa bann gran plan stratezik ouswa *Master Plan* ki bann Minis ansyen Gouvernman isi dan sa Lasanble, zot in flank ek nou zis pou nou *cool down*, Mr Speaker. Lot ki ankor donn maloker ler viktim i mazin, se repeyman larzan konpansasyon La Misère e Barbarons, kot sa *top up* R50mil ti kapab fini ganny peye, si dan botan Gouvernman

ti'n aksepte tor, olye trenn lipye ziska lavey eleksyon. I'n fer bann viktim rat sa sans. Ler zot in vwar zabitan zis parey en sif lo lalis voter, Mr Speaker.

Mon bezwen dir Mr Speaker, akoz sete sa realite serten politisyen dan ansyen Gouvernman. Kestyon se, eski nouvo Gouvernman pou donn en lesplikasyon viktim, lo ki dil prezan ver lavenir kan nou sorti dan grapen COVID? Serten zabitan La Misere e Barbarons pa ankor tous sa R25mil akoz lenteripsyon plan stratezik COVID ki ti pe lanse, Mr Speaker. Nou pa bliye ki PS Finans in dir isi dan sa Lasanble menm i reste 3 ekek milyon pou fini peye dan premye faz.

Alor Mr Speaker, nou espekte ganny en larepons, sirtou pou sa bann zabitan ki ankor pe espere pou ganny zot pti mwensa dan sa premye peyman.

Mr Speaker, sa bann dat le 22, le 23 e le 24 Oktob pou reste grave dan lespri Seselwa apre sa 43an, pou en nouvo souf. Ti annan bokou lemosyon lakontantman pou sa ki'n gannyen e lakoler e grensman ledan pou sa ki'n perdi. Pou sa ki'n tro koze dan kanpany zot ti bezwen kasyet dan lakaz pou detrwa zour akoz lakanmizri!

(APPLAUSE)

HON WAVEN WILLIAM

Apré sa plizyer lannen manipilasyon e labi, Mr Speaker, dan sa direksyon mon demann sa setyenm Lasanble pou konsider pas en rezolisyon pou amann sa Lartik 110 Konstitisyon, pou anpes ankor sa kalite labi pouvwar par en nenport Prezidan dan Sesel parey prosesis pas baton in ganny zet anba!

Mr Speaker, si Bondye i kreter lesyel e later, alor Sesel pa pli gran ki nou, se Bondye ki pli gran ki nou tou. Mon repete se, Bondye ki pli gran ki nou tou!

Mon kestyonnen, ozordi, vremen ki lentansyon nouvo *Leader* Lopozisyon e son parti, sirtou atraver son plizyer lentervansyon dan Lasanble e lo medya an fas problem ki pe menas Sesel. Mon'n deza dir, i en eksper dan distort parol ek lenformasyon an perspektiv, met li an deor konteks, Mr Speaker.

Wi, Konstitisyon i donn li sa drwa liberte lekspresyon, sepandan Mr Speaker, tou i permetab me pa tou ki benefisyab atraver sa ki nou dir e fer. Mon pou repete Mr Speaker, akoz sa fraz i tre

enportan. Pa tou ki benefisyab atraver sa ki nou fer.

Mr Speaker, mon konpran aprezan akòz olye rod solisyon, zot ti pe danse lo *stage* ek sa sanson, “*When you live in a glass house do not throw stone.*”

(laughter)

HON WAVEN WILLIAM

Pandan ki plizyer ki ti pe manz son kou an silans, ti pe dir dan zot leker, ‘Sa ki anba i kapab monte e sa ki anler i kapab degrengole,’ ek zot krwayans ki zanmen sa pou arive dan Sesel.

Prezidan in vin fran devan pep Seselwa, menm si ek lemosyon e avek en tonasyon ferm in adres larealite an fas. I enportan pou pep konpran, ki ler ou al tap laport enternasyonanman, avan zot bour lanmen dan zot pos pou ed ou. I annan kondisyon, akòz napa keksoz ki pou naryen, Mr Speaker.

Akòz letan ou pe mandyan ou swa negosye i ganny limite. Parey Angle i dir, “*Beggars cannot be choosers.*” Mon priye ki letan nou Dirizan i al rod led swa lokalman e enternasyonanman, zot ganny faver atraver zot senserite. Akòz la pa ler bat latet la. La se moman serye pou sov nou pei.

Mr Speaker, Prezidan in koz lo bann gran laliny bann lentansyon son Gouvernman. Mon annan *comme* swivan pou dir pou enfliyan en balans dan fason fer. Nou pou koz lo dominer ek kalm. Ansyen Gouvernman ti fer keksoz ler i anvi, lafason ki i anvi e mannyer i anvi.

Leader Lopozisyon atraver ou Mr Speaker, se sa kalite ki en latitud kalm me dominer. Sa ki apel dominer an aksyon, dan Labib i dir aksyon i koz pou li menm. Mon demann nou Prezidan pou kontinyen vin fran, direk pou fer aksyon nesaser arive. An dot mo, azir plis e koz mwens koumsa pou pa ofans person, Mr Speaker.

Mr Speaker, la fodre nou adres gaspiyaz, koripsyon, lesefer, *kill time*, pretansyon ouswa kouyonnen ki anpes nou al fouy pli lwen pou konn laverite. Mr Speaker, si sa bann keksoz pa ganny eliminen, mon repete, pa ganny eliminen ladministrasyon nouvo pa pou efikas. E prezan zot pou dir ou tou i korek kan saler ou trou osi pe ganny fouye si ou get zis kot ou bout nennen i arive.

Legzanp gaspiyaz Mr Speaker, se atraver lafason ki alokasyon lakaz in ganny fer parfwa. Ler nou donn en fanmir lakaz, epi i retir li pou

plizyer rezon ki ti'n devre vwar avan alokasyon, met li dan en lot, akòz fanmir in gran ouswa akòz sa fanmir i anvi retourn dan son distrik. Sa menm lakaz avan i re ganny *allocate* i bezwen ganny repare pou donn en lot fanmir.

Tank dan twa ki pa ti devret mete, ki pe kout fanmir plis depans e pa oubliy tiyo ki pe pete dan miray, ki pe kout Gouvernman e sa fanmir plis larzan dan sa lepok napa la. Mon krwar ki nou bezwen fer prizon vin otosifizan pou zot nourri zot lekor, pou koup depans.

En lot legzanp ankor, se *legal aide*, gaspiyaz par *repeated offenders*. Fodre get ladan, ki zot pa anpes lezot ki pa kriminel benefisye osi. Transpor lwe pou dalon *car hire*, sarz an plis kot sa pratik '*I scratch your back and you scratch my back*,' fodre eliminen dan sa pei Mr Speaker.

E sa nou'n tande in arive dan plizyer Departman Gouvernman, ki fodre arete. Mon repete, fodre arete. Mon kontan ki plizyer re negosyasyon pe ganny fer ek propriyeter ki lwe lespas ek lozman. Mon demande ki dan sa legzersis ki Gouvernman i vremen regard ka par ka. Sirtou

bann gran fanmir ki dan flat ouswa *duplex* akòz lespas pou azoute kot i annan 2 ou 3 letaz, sa bann fanmir ki dan sa kategori *social housing* zot ka Mr Speaker, i bezwen ganny get ladan.

Mr Prezidan, i byen nou annan bokou profesyonnel e zenn *graduate* byen formen dan Sesel. Sepandan annou anpese ki sa ki mwen fortinen pa ganny kit ater ler legzersis koupir pe ganny fer. Annou met nou dan sa plas pou en mwan e nou a akont plis ki zot. Mon demande e mon met lanfaz lo la, donn bann ka ki merite bann latansyon vremen byen kalkile.

Annou osi met nou dan pozisyon bann travayer *URS* ki'n ganny *let down* par ansyen Gouvernman ek zot regar *short sightedness* ek zot bann lespri *quick fix* e pli tar nou a fer *damage control*. Nou'n abandonn sa bann dimoun pou fer zot ganny en vizyon soutenab dan zot devlopman personnel, pou en lanplwa pli formel, Mr Speaker.

Mr Speaker, akòz bann ki anvi travay, ki'n fer plis ki 2an e 5an, pa ganny anpoye si ti annan travay dan Gouvernman. Akòz parey kot Minister Ledikasyon, kot zot in fer serten *apply* pou serten *post* epi touy tou son moral an dizan

ki post in *freeze*? Prezidan mon lapel ek ou, se get dan tou bann ka distrik parey ou'n koz lo sa ka sa zenn madanm ki anvi vin en asistan ners.

Ou'n dir nou, ki ou Gouvernman fodre vin pli efikas, nou pe swivre e nou pe gete e nou pou siport ou. Me kot i annan plas pou amelyorasyon pou evit lenzistis, nou pou bezwen negosye pou en pli meyer dil, Mr Speaker.

Mr Speaker, Minis Finans letan in prezant Bidze 2021, pou bezwen tal tou kart ater e fer konpran tou realite e tou laverite. Mon demande ki Gouvernman apard ki lans bann *bond*, pou osi met a dispozisyon Seselwa, Sesel e aletranze ankor loportinite pou investir ladan.

Mr Speaker, nou'n fer resers konbyen serten lespes ton fre pe vann aletranze. Mr Speaker, nou a soke avek sa bann pri. I bon nou tret nou resours ek plis respe. Minis Lapes, nou konnen ou en zonn parol annou pouse ki Sesel i annan son prop tonnye o pli vit posibil, e aköz osi pa nou bann bato kargo rezyonal.

Mr Speaker in ler pou annan en deba Nasyonal dan Lasanble lo *Air Seychelles*, pou anmenn ansanm depi son pilot, *ground handler*, *air hostess*,

management parmi lezot pou en solisyon lonterm, Mr Speaker. Prenon kont ki letan keksoz i agrave bann lezot laliny aeryen zot pa get dan nou *welfare* zot, si zot osi zot dan problemm zot abandonn nou. E nou bezwen rezourd nou problemm nou menm. Alors se sa ki mon pe demande e siport lezot demann pou en deba Nasyonal isi dan sa Lasanble pou nou ganny en pli meyer solisyon.

Mr Speaker, lot pwen se pri lavi, konsonmater pe anvi konnen ki demars Gouvernman pe fer ouswa pou fer dan sa partenarya ek komersan e enportater pou kontrol kout lavi. Ki kalite ledikasyon pe ganny met lanfaz pou Seselwa *fall in* pou antak sa problemm a diferan nivo?

Mr Speaker, mon demande ki nouvo Gouvernman i vremen fer en legzersis konpreansiv, pou met Seselwa premye dan travay. Ler mon pe koz lo sa size konpreansiv, mon pe koz lo formasyon nesese e vit pou dil avek sa *trend* ki pe arive. Aköz serten antreprenner etranze pe fors Seselwa dan lotelri pou *train* etranze pou zot reste?

Fodre nou montre sa diferans dan fason fer ansyen Gouvernman ek potansyel travayer Seselwa, pou li *fall in*

love avek nou. Me pa fors li riye kan ou pe fer li fristre e araze, ler kot i ete i pa pe trouv naryen pe arive, Mr Speaker.

Dan menm laliny nou anvi konnen osi kwa ki pou ganny fer pou osi pous sa lide '*Made in Seychelles*' kot bokou Seselwa dan son diferan kapasite talan, koman antreprenner pe esper sa sans. Sa sans, sirtou la pou Lalwa ouswa Polisi e stratezi amande pou bouz devan. Mon kapab nonm plizyer sa bann antreprenner, Mr Speaker. Mon a rebran sa pwen dan Bidze letan Minis i vin fer son prezantasyon, ansanm ek pwen lekonomi, ledikasyon, lagrikiltir parmi lezot ankor.

Mr Speaker, nouvo Gouvernman pou bezwen evite sa lapros *one size fits all* ki vye Gouvernman ti ankouraze. Dan sa Lasanble nou'n fatigue dir, nou fatigue ek bouyon resofe. Pep in fer sanzman pou en nouvo souf e nou espekte en nouvo souf.

Mr Speaker, mon rekonnèt travay dir Departman Lasante, mon felisit zot, me silvouple aret donn nou lenformasyon enportan par pti kwiyer. Nou anvi apiye pou anpes transmisyon kominoter. Akoz tou le zour medya pa kapab donn nou nouvo ka par distrik, pou nou lev nivo defans

personnel. Transmisyon kominoter atraver evalyasyon ki mon pe fer ek sif ki zot pe donn pa kredib.

Mon pe dir sa akoz dan plizyer lenstans dekouver nouvo ka, fer tes e pi fer *contact tracing*, konbyen ki'n fini *transmit* Mr Speaker? E konbyen ki nou pa konnen. I annan bokou dimoun dan distrik ki anvi ede, ki fason sa bann endividi lokal i kapab ede pou vreman ansanm met sa sityasyon anba kontrol.

Ki *mechanism* an plis nou kapab kree a nivo lokal dan distrik, pou kapab permet dimoun ki anvi ede donn en koudmen.

Mr Speaker, mon pa kapab terminen mon diskour san remersi tim *united LDS* ki'n travay akote mwan pou raport sa eleksyon Grand Anse Mahe.

(APPLAUSE)

HON WAVEN WILLIAM

Mr Speaker, mon pa oule lot kote latab i konfiz mwan, mon'n dir *United LDS*.

(laughter)

HON WAVEN WILLIAM

Mr Speaker, Bondye in annan faver lo nou akoz nou ti pe fer en kanpany onnet. Menm apre

sanz 6 kandida potansyel pou Lasanble Nasyonal, adopte en swadizan *grand master* politisyen, anmenn 3 Anvwaye Spesyal. Enn sorti Canada Mr Speaker, enn sorti Ostrali e enn sorti Langleter an kontan en Anbasader sorti Letyopi ...

(laughter)

HON WAVEN WILLIAM

... pou koz mansonz, Mr Speaker. Nou kontan akoz serten zabitan ti ganny sans ogmant zot konesans lo diplomasi bankal.

(laughter)

HON WAVEN WILLIAM

Mr Speaker, ni menm zot lar manman *motorcade* pou blok larantre kandida LDS, ni menm zot swadizan lamars laviktwar pa'n abouti dan naryen, Mr Speaker, zot ti menm menas nou ki zot pou pet nou glob e ki zot pou fer tou ki mwan Mr Speaker, mon pa ganny eleksyon Grand Anse Mahe. Mon ti pe rezonn ek parol Bondye dan mon leker, an dizan si Bondye i dir sa ki i dir i ete, ki son lavolonte i ganny fer.

Mr Speaker, son lavolonte in ganny fer.

(APPLAUSE)

HON WAVEN WILLIAM

Ki fer nou demande ki zot, pou anpes lavolonte Bondye? Akoz sa rezilta 20 lo 5 e *LDS State House* ti'n deza ganny predir par nou bann prop profet Seselwa ki bann gerye lapriyer e ki zot *mean* biznes avek zot Bondye, Mr Speaker.

An terminan Mr Speaker, mon anvi reasir tou zabitan distrik, ki mon pou la a akote zot e pa bezwen per pou avans devan pou fer zot lavwa tande e rezonnen. Mon repete, pou avans devan pou fer zot lavwa tande e rezonnen! Nou bezwen zot tou pou fer marse distrik e sa pei. Ki Bondye i kontinyen Beni nou pei e nou distrik akoz *LDS Grand Anse Mahe*, pa pou zanmen les tonbe! Mersi Mr Speaker.

(APPLAUSE)

MR SPEAKER

Mersi. Wi Onorab Pillay. **HON**

SEBASTIEN PILLAY

Mersi Mr Speaker. Petet Onorab Woodcock ou ava aprann akoz ozordi mon asiz la. Aprann ek mwan, aprann ek mwan Onorab. Mon ti a kontan ganny ou gidans, akoz mon napa naryen avek *speech* Onorab William mwan. Me

selman Onorab William in servi serten tenm dan son *speech*. I paret poudir ler lo mon kote Manm i servi serten tenm oubyen fer serten aksyon, ou pare pou ou demann mon Manm pou swa demann leskiz ouswa fer *retraction*.

Onorab mon napa problem ek ou *speech* Onorab ou annan laliberte pou koze, me ou'n servi serten tenm dan ou *speech* ki dan mon lopinyon i pa *parliamentary*. I pa *parliamentary*. *Ok*, i pa *parliamentary*. Par egzanp sa mo 'kouyonnen' i pa en mo ki nou pa servi dan Lasanble Nasyonal. *Ok?* E ki ou Mr Speaker, ou bezwen deside. Ou pa kapab annan e pwa kot ler en kot i koze ou servi serten mezir, e ler lot kote i koze ou servi serten mezir.

Sa ki mon ti a kontan ganny gidans la, mon vwar Onorab *Chief Whip* lo lot kote latab pe lev son lanmen, mon ti a kontan ganny gidans lo la. Si i annan serten tenm ki aplikab ki nou servi ou pou realize vitman ki Mr Speaker, ler Lasanble pou koman servi serten tenm, i pou al dan en direksyon ki pa byen.

Mon ti a demann ou pandan *breaktime*, regarde si sa bann tenm i aplikab, e si i aplikab, *then* nou tou nou a

komans servi serten sa bann tenm dan nou bann langaz ki nou servi dan Lasanble. Mon napa problem mwan. Zis mon oule ou gidans lo sa size. Mersi, Mr Speaker.

MR SPEAKER

Mon a reflesir lo la Onorab Lopozisyon. Annou termin lo sa size silvouple.

HON SANDY ARISSOL

Non, non, mon ti a kontan lo menm laliny. Mon krwar Onorab Pillay in fer en bon pwen an relasyon ek bann mo ki ganny servi dan Lasanble Nasyonal. Me selman ou a krwar depi zot in vin dan Lopozisyon zot bliye poudir se Minis Finans, zot Vis-Prezidan dan sa dernyen eleksyon ti vin la dan sa Lasanble Nasyonal, e i ti servi sa mo 'kouyonnen' dan sa menm Lasanble Nasyonal ki Onorab in bliye! Mersi bokou.

(APPLAUSE)

MR SPEAKER

Mon kontan mon'n aprann sa Onorab. Onorab William, wi ou a kapab eksplike.

HON WAVEN WILLIAM

Mr Speaker, mersi. Mr Speaker, mon en Seselwa e i domaz ki sa de mo ki mon'n

servi dapre *Leader* Lopoziyon, i de mo ki pa devret ganny servi. Me selman mon en Seselwa e mon pe viv Sesel. Mon pa pe viv Langleter Mr Speaker, ouswa Lanmerik. Mersi.

HON SEBASTIEN PILLAY

Me si nou pou komans servi sa bann tenm, *then* i pou komans annan en mank respe.

(Interruption)

HON SEBASTIEN PILLAY

Non, be i normal sa! Fodre nou fer kler.

MR SPEAKER

Silvouple, Onorab Pillay mon'n tann ou pwennvi, pa trakase ou. Mon ava apel Onorab Johan Loze.

HON JOHAN LOZE

Mersi Mr Speaker. Mr Speaker dan term Kreol Seselwa modern, vre definisyon sa term kouyonnen set en dimoun ki *lease* en morso propriyete lagrikiltir pou R10mil par an, e i *sublease* sa menm propriyete avek en lot dimoun pou R10mil par mwan.

(APPLAUSE)

HON JOHAN LOZE

Mersi Mr Speaker. Mr Speaker li i ti pou sakouy pye, fri ti pou tonbe. Ou, ou ti pou anmase. La letan in ariv ler pou rekolte sa ki'n tonbe, i vin sant ou en zistwar kales kase. Me selman li in debark devan Lasanble dan en *BMW*. Se sa la realite. Mr Speaker Leta Lanasyon Seselwa ozordi i enn ki pe mars egzaktaman parey pou tou leres Nasyon o monn.

Seselwa in met son lavi lo *pause*, in poz son bann lanbisyon e gran proze dekote, e in antre dan en letan kot i pe viz la mazorite son lenerzi zis pou li sirviv. Dan en lemonn kot nou zorey in satire avek move nouvel, ou nou realite toulezour i egalman sonm ki sa bann menm nouvel, nou Nasyon pe a sa moman sers pou li ganny en sans direksyon dan nenport ki pti laklerte ki i kapab trouve.

Ki swa dan son kominote oubyen dan la spirityalite, oubyen menm dan son bann dirizan ki zot pe sipoze montre sa direksyon *anyway*.

Aprè eleksyon kontansye ki ti deroule lannen pase, kot nou'n vwar bokou divizyon ganny kree, kot dan plen milye en kriz lasante piblik, en group Dirizan ti'n deside pou mank respe pou Komisyoner Lasante piblik par fer bann rankont,

meeting, motorcade ek rali konmsi COVID pa ti egziste, la aprezan an 2021, Seselwa ti pe sers pou li fransir sa lot lepa e komans travay pou sa prosen 5an. Sa ki'n gannyen, ti'n gannyen, sa ki'n perdi ti'n perdi.

Me sa Nasyon li i bezwen viv ansanm lo sa pti bout ros o plen milye en losean. Viv ansanm e soutenir kanmarad i le sel fason avans devan pou Seselwa. Me o moman ki Seselwa in komans poz son regard lo lorizon pou li oriyant ver lavenir, en eleman malsen in ganny entrodwir, ki'n deswit reouver tou blesir, re-alim tou divizyon.

E la kot lanmertim in ankor pet anflanm dan leker sa pep. Dan en letan kot Seselwa ti pe aprann met sa politik divisif 2020 deryer zot, re atrap lanmen e re kontan kanmarad, Diskour Leta Lanasyon in zis anmenn plis lakoler ek divizyon dan en form konpetisyon parol, lo lekel ki pli bon e non pa lo kwa ki pli bon pou Sesel e Seselwa.

Be akoz ki sa in arive? Vandredi le 22 Zanvyè 2021, ti en loportinite manke. Nou'n vwar aparet devan nou en politisyen ki'n vin delivre en diskour politik, zis konmsi i ti ankor dan konpetisyon pou

ganny eleksyon, dan plas en *l'homme D'Eta* ki ti a latet Leta ek Gouvernman Sesel.

Mon dir loportinite manke, akoz Prezidan Ramkalawan ti'n *belle* e byen kapab *rise above* tou bann *petty* diferans politik toulezour, e servi loportinite sa diskour pou li vin etal son vizyon pou la Nasyon Seselwa, pou sa prosen 5an.

Ouswa parey on koleg byen estimen Onorab Georges in dir, pou sa prosen 250an. Be sa ki nou'n trouve devan nou, set en zonn ki napa en vizyon. I napa en plan konkret pou Sesel e Seselwa, i napa en direksyon kler pou li menm swiv.

Be si ou ti konnen ki ou napa en plan konkret pou sa pei, akfer ki ou'n lager pandan 30an pou ou pran direksyon avek latet pei? Ou'n annan 30an pou ou formil ou bann plan, vizyon ek lobzektif pou sa pei.

E premye loportinite ki ou gannyen pou ou etal sa vizyon, ki ou pe sonnyen pandan 30an, ou vin gaspiye dan *pettiness!* 30an i pa 30 zour Mr Speaker. En ta letan sa pou en dimoun *harbor pettiness*. Be vi ki ou napa en plan, e pli move ankor ou klerman napa en vizyon, permet mwan pou donn ou enn.

(1) Kree en *COVID Reconstruction Fund* pou Sesel.

En Fon kot sak travayer Seselwa ava kontribye en minimonm R50 par mwan lo son saler pou sa prosen 15an, vize ver rekonstriksyon ekonomik Sesel.

Avek en prozeksyon pros R3milyar dan sa prosen 15an, sa ava donn Gouvernman lespas pou pran davans anviron R700milyon par an avek Labank Santral, pou sa prosen 3an.

Ki pou pran pou lekonomi pei komans re etabli son lekor. E i ava menm reste en sonm ase sibstansyel dan sa fame kof, ki ava kapab ganny servi dan evantyalite okenn dezans dan lavenir.

Donn nou Seselwa sa loportinite pou sov nou lekonomi e sov nou pei, *since* ou klerman ou pa kapab fer li. En Fon Restriksyon anba son prop Lalwa gouvernen par en *Board* endepandan e volontarya.

Donn nou Seselwa sa loportinite pou tir nou pei lo sa brizan kot *COVID* in anmenn nou. Sa lapros i ava permet Gouvernman pou tenir *FA4JR* an plas, tenir *URS*, tenir bann program *re training* ki anba *SETS*.

Tenir program prop *care* e an menm tan reform li e

profesyonnalizm li, tenir la mazorite nou bann program sosyal dan en form redwi. Me pli enportan ankor, sa i ava donn Gouvernman R109 milyon par an pou li pey saler *Air Seychelles* pou sa prosen 3an.

San detri tou sa bann fanmir ki pe ganny zot lavi avek *Air Seychelles*. Sa ava donn Kaptenn Lespoir avek tou son bann koleg kot *Air Seychelles*, en loportinite 3an, pou zot trouv en fason pou fer nou *airline* vin soutenab.

Donn nou lanasyon Seselwa, responsabilite pou pey zot saler kot *Air Seychelles*. Met sa lo *nou led*. Donn zot responsabilite pou fer nou *airline* vin soutenab. Met sa lo *zot led*.

Letan ki nou pran sa direksyon, nou ava pe komans lo semen solisyon. Nou ava pe komans sa konversasyon lo kwa ki bon pou sesel, dan plas lekel ki bon pou Sesel.

Pran larzan ki ava dekoull dan sa Fon Rekonstriksyon e envestir li dan lazenes Seselwa. Met nou konfyans dan nou zenn;- bann ki pe travay, ki pe etidye, ki pe kontribye. Lazenes Seselwa i entelizan, for e travayan.

E la i moman pou donn zot sa loportinite pou avans devan.

Fer konfyans e investir dan *leadership skill* nou zenn. I pa en dimoun 50an parey mwan ki pou anmenn inovasyon a sa moman.

Sesel san ki nou bezwen la an se moman, se plis langazman zenn, pou vin *shape* sa Sesel ki zot anvi trouve e ki zot anvi viv ladan. Se lazenes ki pou *shape* fitir sa pei dan lafason ki zot, zot anvi trouve.

Alors annou siport bann *youth-led NGOs* e donn zot, zot vre plas dan nou sosyete. Annou anmenn bann program *youth leadership* kler e annou investir dan bann lide ki ganny avanse par nou zenn.

Si Sesel nou oule trouv en direksyon ekonomik alternativ, apar bann filyer ekonomik tradisyonnèl ki nou abitye avek, se zis lazenes Seselwa ki pou kapab aport sa bann inovasyon neser.

Okenn plan diversifikasyon pou Sesel ki pa *youth driven is bound to fail!* Diskour Leta Lanasyon 2021 prezante par Prezidan Ramkalawan in enn ki'n ranpli avek lafreyer, lanmertim e frivolite.

I devwar Dirizan pei pou enspir son Nasyon anver en bon direksyon. Pou enspir en vizyon ki pli gran, ki pli nob ki nou. I pa son devwar pou

travers devan nou plen ek lafreyer dan en *full blown* panik akoz i pa kapab kontrol sa sityasyon ki in plonz son lekor ladan.

Zis 89 zour dan lofis, Vandredi nou'n vwar en *embattled President* ki'n fini pran semen Trump, kot i pe fer en *speech*, apre tou son bann *MNAs* i bezwen vin tradwir ouswa re enterpret sa ki in dir. I annan ki'n bezwen pran lanmwatye zot *speech* zis pou sey re eksplik kwa ki zot Prezidan in dir.

Nou ti ava ekspekte ki en dimoun ki'n dedye plis ki lanmwatye son lavi pou vin dirizan pei, ti'n kapab *train* son lekor pou kominik dan en fason kler, non pa dan en fason ki apre nou bezwen ankor lesplikasyon.

Bokou pe ganny dir lo zesyon sa sityasyon *COVID* dan pei. Sa ki kler, se ki pandan sa dernyen 89 zour, keksoz in dan anpire. E sa i pa en aksidan. Depi eleksyon Sesel pa'n annan en *leadership* ki'n kapab ofer okenn legzanp lo sa size *COVID*.

Pandan sa dernyen 89 zour en bal in ganny donner dan sa pei. Monte, desann Praslin La Digue e fer rankont san mask, al fete Katyolo san mask, anbark dan en pti avyon,

dan kravats, palto ek *safety shoes* san okenn mas.

Konmsi kravats ek *safety shoes* ti pou protez zot kont *COVID*. Se sa bann latitid lesefer dan bann lofis pli o ki'n antrenn nou dan sa direksyon kot nou ozordi, kot ozordi nouvo ladministrasyon *LDS* in perdi kontrol lo sa sityasyon!

La enn fwa pou tou, mon oule adres sa size vaksen. Mwan mon en dimoun ki a 100 pousan siport sa program vaksinasyon kont *COVID*. E mon oule fermeman ankouraz tou dimoun pou al pran zot vaksen.

Plis ki sa ankour, mon oule remerci Prezidan Michel pou sa vaksen *Sinopharm* ki nou pei in gannnen avek Abu Dhabi.

(Interruption)

HON JOHAN LOZE

Credit where credit is due!
Mwan mon pa krwar dan sa zafer bef travay e seval fete! Zour sa lansman vaksen ti ganny fer kot Lopital e nou *Caucus* ti swazir pou pa *attend* sa seremoni, si ti avek en tre bon rezon. La ozordi zot pe maltret tou dimoun ki groupe, tou sa ki al fer piknik lo lans, selman zour lansman vaksen, zot ti fer en nespes piknik kot Lopital.

In menm annan dimoun ki pa ti pe al pran vaksen, ki ti demann permisyon pou zot al *attend* sa seremoni. E zot ti gannnen permisyon.

Al get dimoun kot pe pran vaksen, dan plen milye en lepidemi konmsi sa ti en *spectators port* e non pa en prosedir medikal dan plen milye en kriz lasante piblik.

Ankor enn fwa, mon oule eksprim mon sipor en kondisyonnel pou sa legzersis vaksinasyon. Be silvouple *get it together*. Komans organiz bann keksoz en pe pli byen.

Fer li dan en fason annord, byen e balanse ki pa met nou bann vye dimoun a risk silvouple, nou pe enplor zot. Mon ankouraz tou Seselwa pou annan lespwar dan laviktwar nou pei lo sa kriz.

Me sirtou konfyans dan nou bann profesyonnel Lasante e zot kapasite pou gid nou pei ver en rezilta satisfesan. Si zot war okenn defi dan nou repons fas a sa kriz, sa i pa lafot nou bann profesyonnel.

Me plito lenterferans politik bann *political masters* dan sa Gouvernman kales kase. Lo sa zistwar kof plen avek kof vid ki *LDS* i kontan bate parey en nespes tanbour fre, mon oule note ki prezan dan sa lasal ozordi, bann sel Manm ki ti

attend bann meeting Caucus US lo komansman Katriyenm Lasanble, tou pe asiz lo kote *LDS*, Onorab Mondon, William avek Andre, tou pe asiz laba lot kote.

Le sel lot dimoun ki ti prezan dan sa bann sesyon la anndan ozordi, sete mwan. Les mon akont zot en keksoz ki nou dan *Caucus US* la letan nou ti aprann avek Vis-Prezidan Afif, ki sa lepok ti *PS* Finans.

Gouvernman Sesel i ganny finanse atraver Bidze Anyel pei. Bann diferan *inflow*, reveni anba *Public Finance Act*, i ganny peye direktman dan *Consolidated Fund*. E bann depans kapital ouswa *recurrent* i ganny aprouve e depanse atraver Bidze. *Now*, le sel larzan an plis dan Bidze se sirplis bidzeter.

E en keksoz ki nou ti aprann avek Vis-Prezidan Afif sa bann letan, se ki letan ki nou ti annan sirplis, nou ti depans li atraver en Bidze Siplemanter lo komansman program reform.

E lesplikasyon ki nou ti gannyen, sete ki nou ti, sete ki nou bann krediter ti pe pran en *hairline cut* lo larzan ki nou ti dwa zot. E ki nou pa ti pou kapab eksplik en sirplis bidzeter letan ki zot, zot ti pe sakrifye.

Apré ki nou'n aret depans atraver sirplis atraver Bidze Siplemanter, tou sirplis in ganny servi pou *retire* det leta Sesel anba *Public Finance Act*, i napa okenn fon ki'n ganny kree pou anmas larzan dan en Bidze, pou al dan en lot Bidze.

Bidze Sesel i lo en *yearly cycle*. I komans an Zanvyè e i termin an Desanm. I napa okenn kof ki anmas larzan ladan ki vid. Finansman Gouvernman i vin atraver Bidze.

Se Vis-Prezidan Afif ki ti eksplik mwan sa, e Onorab Andre, Mondon e William zot tou zot ti la letan ki sa ti pe ganny eksplike. Mon pa konnen ki sa zafer kof vid, ki ozordi zot pe rakonte, parske zot konn tre byen *that there is no such thing*.

Mr Speaker, ACCS. Pou lenformasyon Lepep Seselwa, an lannen 2019, *LDS* avek son mazorite ti sanz Lalwa Komisyon Anti-Koripsyon e zot ti donn *full* pouvwar fer lenvestigasyon avek son *CEO*.

Sa *CEO* i posed *constabulary powers* ki permet li pou fer nenport kwa ki Lapolis i kapab fer e sa pouvwar in ganny donner zis avek *CEO* e non pa avek son bann *Commissioners*.

E letan, e sa ti pe ganny arive, mon ti note ki *LDS* ti pe al kont enn bann prensip fondamantal Onorab Georges. E ki zot ti pe fer en Lalwa pou zis 1 dimoun.

La dan diskour Prezidan mon'n tande ankor kot zot pe vin fer Lalwa pou zis 1 dimoun. E ankor sa i menm dimoun. Zot bezwen kontan sa dimoun en kantite. Akoz apre tou, sa pouvwar ki zot ti donn li an 2019, e i pa'n kapab fer nanryen.

La zot oule donn li ankor pouvwar. Eski zot krwar ki la i pou delivre? Mon sipoze ki wi, mon krwar ki i pou delivre mwan. Akoz i annan kes *file* in fini pare, zis pou anvoy kot *AG*. Me zot pe asiz lo la, pe esper Lalwa sanze apre pou zot sot anler e kriy laviktwar. Lala pe marse anba nouvo Gouvernman, kan sa ler la in fini pare zis pou anvoye. E inital zot vin anvoy okenn *Right of Reply* sepa kwa, akoz mon konnen egzaktaman kwa ki mon pe koz lo la, ki kes ki mon pe koz lo la!

Mr Speaker sa bann zistwar *Board* la. Sa zafer sistenm governans atraver *Board* in toultan lager *SNP* e Prezidan Ramkalawan sa. Se zot ki'n pouse pou retir pouvwar dan lanmen Mini s e

bann Sef Egzekitiv e pou met dan lanmen bann *Boards*.

SNP, *LDS*, sepa ki mannyer zot apele, pa'n zanmen obzekte kreasyon *Board*. Zot in toultan pouse o kontrer, pou kree plis *Board*. Sa dernyen 4an ki *LDS* in kontrol Lasanble, nonm mwan en fwa ki zot in tann *LDS* obzekte en *Board*? O kontrer sete *LDS* zot menm ki ti agrandi *Board SBC* pou met dalon lo la.

E dan deba lo Lalwa *Planning*, zot ti pe menm ranforsi pou vwar son *Board*. Alors i dezonnnet pou Prezidan Ramkalawan ozordi vin gele, ki kantite *Board* ki ti annan, kan sa in aktyelman toultan son azanda e azanda *SNP*!

I dezonnnet de la par Prezidan Ramkalawan pou vin akt soke lo lakantite larzan ki pe ganny servi pou pey *Board*. Kan pandan sa dernyen 4an, se li ki'n kontrol Lasanble, e se li menm ki'n aprouv Bidze, e se li ki'n *Chair FPAC*! I ti devret konnen egzaktaman konbyen pe ganny servi pou pey *Board*.

Lo sa size lapovrete, i paret mwan ki sa size 40 poursan lapovrete, ouswa okenn form lapovrete i nepli en konsern pou *LDS* dan sa pei. Zot nepli enterese avek lapovrete. Zot in nepli konsernen par pri lavi, parske

sa i pa bann size ki Prezidan in trouv fit pou antre dan son diskour.

I pa'n adres ditou sa bann size, konsern ki'n toultan seval batay *LDS*, ziska la, *maintenant* ki zot in ganny eleksyon. La zot in nepli enterese avek lapovrete, zot plito enterese pou anvoy nou mandyan kot nou vwazen.

Akoz menm si Prezidan pa'n trouv letan pou koz lo pri lavi, me in koz lo mandyan latet zonnyon, i tris e sagrinan e i fermal sa ki mon pe trouv arive dan mon zoli pei. I annan en kanpany ki'n ganny lanse, en lager ki'n ganny deklare, en lager for kont bann ki mwen fortin-an dan nou pei.

LDS pe servi sa menm masin kominikasyon ki in servi pou ganny eleksyon, pou li anmenn en lager asarne kont tou sa ki pe benefisye dan en fason ou en lot atraver okenn program sosyal egzistan.

Zot diform bann fe! Zot tordi lenformasyon! Zot donn zis lanmwatye lesplikasyon lo keksoz ki kapab ganny fasilman eksplike. E zot servi bann keksoz sansasyonnel, pou mont latet dimoun kont bann ki mwen fortinen. Eski se sa linite ki zot pe rode?

Sa bann kalite sistenm politik *fascist* pou manipil nou pep, dan son moman pli

vilnerab e pou vir sa ki annan kont sa ki napa, zis pou zot reisi dan zot bann lanbisyon personnel, sa i pa en fason fer sa. E mon garanti ki sa mannev pou *backfire* e ki zot pou regrete to ou tar!

Nou bezwen en pli bon lapros, en pli bon fason fer. Enn ki ava ede pou benefisye nou tou e non pa zis serten.

Elimin labi, wi mon dakor, pran responsabilite, mon egalman dakor. Be selman pa vin dir mon ki le sel fason pou tir nou pei dan en kriz ekonomik, se pou sakrifye dimoun an premye. Sa enn mon pa dakor sa!

Sers en lot fason. Rod en lot fason fer. Enn ler ou le krwar ki lalit Gouvernman kont sa ki pov i pli for ki zot lalit kont drog. *At least dealer* drog zot ganny detrwa *warnings*. Me sa ki dan bezwen li i ganny zis dir, *by* tel dat e tel dat pou koupe. Aprezan dil avek! Serye? Zot serye zot? Se sa rezon ki zot ti pe lite pou diriz pei?

Incitement Mr Speaker. Lo sa size ensitasyon ki Prezidan in koz lo la, mwan mon annan sa pou dir. Si Seselwa pe leve pou reklanm zot drwa, *make no mistake*, mwan Johan Loze mon pou *incite* zot!

Si travayer Seselwa i bezwen debout pou zot zefor

ganny rekonnèt, wi, mon pou *incite* zot e egalman debout akote zot. Si sa ki mwen fortinen i bezwen lite pou trouv en lasyet manze anba sa Gouvernman kales kase, wi mon pou *incite* zot pou fer li! Aprezan ou gete kwa ki ou kapab fer. *Come at me with a full force of the law!* Sa mon pe *challenge* ou! Gete kwa ki ou anvi fer aprezan!

Dan Diskour SONA menas in fini ganny fer lo drwa koze, lo *incitation*, lo laliberte lekspresyon. Me sa bann menas mon pa pou bezwen reponn. Akoz nou filozofi lokal Mr David Louise in deza fini reponn 1 aprezan.

File Mr Speaker: Mon riye ler mon'n tann Prezidan lir sa zistwar lasyans friksyon *file* dan *State House*. Be annou bliy tousala. Oli sa *file* ble ki ti avek li, ki ti ganny montre dan Lasanble? Oli tou sa bann dokiman, sa bann laprev lo 50 milyon sepa kwa ki ti ladan?

Sa *file* ki en zour Onorab Adelaide ti dir nou, sa zour *father* i ouver sa. Onorab be *Father* pa ankor ouver sa? Kwa fodre ouver dan moutya Anais sa? Be la ozordi zot in ganny pouvwar, zot aktyelman *State House* kot zot ti oule arive. Be zot pa servi sa *file*? Zot pa pran pou donn CEO ACCS pou li fer

sa bann *case* ki i pa'n zanmen kapab fer? Drol, vreman drol sa enn.

Dan en *speech* kot in fer lapel pou linite, kot in esey osi evok nou sans patriyotizm, Prezidan in vini e in dekrir mon pei ki mon kontan, koman en kales kase!

I napa okenn patriyot ki pou zanmen fer en keksoz koumsa. Ensilte mon pei ki mon kontan, i konmsi ou pe ensilte mon manman. Mon ekspekte en parol koumsa pe sap dan labous en Pret, me non pa dan labous en patriyot.

Napa nanryen patriyotik dan maltret ou prop pei. Les sa pou en etranze, sirtou letan ou labous pe dir en keksoz, me ou aksyon pe fer en lot keksoz!

Dan en pei kales kase kot i annan lirezans grav, premye landrwa ki sa i sipoze ganny reflekte, se dan ladministrasyon sa pei li menm. Avan ki ou deklar en lager lo dimoun pov, ou ti'n devret komans par degres ou *Cabinet*.

Dan Diskour Leta Lanasyon sa mo 'gra' in ganny servi. Be les mon dir ki sa *Cabinet* i gra, ou ladministrasyon Msye Prezidan i annan en problemn gra!

Si Sesel i vreman en kales kase, ou ti pou'n dabor devret komans par donn legzanp an

premye. *Lead by example.* Konstitisyon i permet ou en *Cabinet* avek minimonm 7 Minis.

Avan atak *URS*, avan atak bann *carers*, avan atak tou bann ki pli dan bezwen, ou ti'n devret met an plas en *leaner, meaner Cabinet*. Non pa en *Cabinet* ki pe deborde apre vin dir avek nou ki pei napa resours pou pey sa ki pov e ki pei en kales kase! Poutan mon konpran egzakteman akoz ki Prezidan in servi sa term.

I napa okenn lot mo pou dekrir son ladministrasyon nef, 89 zour. Se zis en ladministrasyon kales kase ki bezwen ansyen Prezidan pou vin eksplik li kote tou dosye i ete.

Se zis en ladministrasyon kales kase ki mont lo televizyon e menase pou vin donn sok, apre i disparet pou detrwa zour e pa vin fer okenn deklarasyon! Se zis en ladministrasyon kales kase ki son Minis Finans i bezwen ganny korize piblikman par bann lezot O Zofisye Gouvernman. Se zis en ladministrasyon kales kase, ki son Prezidan i anvoy son, i anvoy son pep pou mandyan en latet zonnyon!

Se sa kales kase Msye Prezidan. Kales kase i pa mon pei byenneme. Me plito sa

ladministrasyon mal favote ki ou pe dirize. Mwan mon ti pou sizere ki ou koz en pe avek Bondye e demann li son lagras e mizerikord, pou fer ou aret *curse* ou prop pei. Pandan tro lontan ou'n fer li! Pandan tro lontan ou pe *curse* e senm langi lo mon zoli pei byenneme.

La get ozordi ki ou'n erite. Tou ou bann prop *curse* in kouve e pe eklo avek ou menm. Alors mazin byen, kalkil byen lo sa ki pe arive avek ou ladministrasyon.

Mr Speaker lo sa size *civil servants*. Si en zofisye servis piblik i deklare koman en profesyonnel, konmkwa ki li i pou kontinyen enplimant Polisi egzistan ziska ler ki nouvo Polisi i vin anfors, sa pa vedir ki sa profesyonnel i kont sa ladministrasyon, ouswa i ankor pe travay dan fason avan. Sa i pa *grounds* pou termin Kontra, par *renew* Kontra ouswa pous li dan son travay.

Sa set en zofisye servis piblik ki pe travay dapre son manda legal. Mon krwar ki sa nouvo ladministrasyon, zot annan bann konfizyon nef ki pe fer zot rate. E zot bann politisyen ineksperyanse pa pe ede. Petet zot devret gete e korize kot zot pe al mal.

Control of Supplies and Services Act: La ozordi ki *LDS*

in antre *State House*, zot per pou koz lo sa size pri lavi. Pourtan la anba sa sityasyon in pli pir ki zanmen deza ete. I enportan pou dimoun konnen ki Gouvernman i kapab pran aksyon atraver *Control of Supplies and Services Act*. Gouvernman pa forse pou zis debout akote koman en spektater, me i kapab azir e met serten kontrol lo sa bann marsan ki'n perdi kontrol.

Mon oule fortman siport propozisyon ki'n ganny fer par *Leader of the Opposition*, pou ki tou *Committee allowance* bann Manm Lasanble i ganny koupe deswit.

Koman bann Dirizan, nou bezwen nou menm nou komans diriz par nou prop legzanp. Nou pa kapab nou menm pe gel *Board*, selman lo nou kote, nou pe kontinyen tous sa bann *allowance* Komite, sa pa fer okenn sans. Alors an siny solidarite, mon sizere ki sa i ganny koupe imedyatman.

Lo sa size solidarite ant vwazen, Sesel solidarite ant vwazen i deza egziste. Dan serten lenstans nou'n menm met li dan nou Konstitisyon. Ou pa bezwen al kot vwazen pou li pret ou en latet zonnyon, akoz ou vwazen i deza pe ed ou atraver son bann kontribisyon. Fot ki bokou bann liberal pe fer

ozordi, se ki zot pe servi sa term larzan Gouvernman.

Mon konpran zot oule *run* pei parey en biznes. Zot in met milyonner ansarz *Welfare*. Me Gouvernman napa okenn larzan li. Sa ki i pe zere se kontribisyon la kominote. E lakominote se bann vwazen.

Ler en dimoun pe benefisye anba okenn form proteksyon sosyal, ki swa *FA4JR* ouswa en lot, sa se larzan son vwazen ki'n kontribye pou ed li, e non pa larzan Gouvernman.

Be alors, ki mannyer Gouvernman ozordi pe re anvoy dimoun mandyan latet zonnyon kot son vwazen, kan son vwazen pe deza kontribye anver byennet sa dimoun?

Depi son *social housing*, lasante iniversel, ledikasyon iniversel, *social welfare programs* parey tiket bis gratwit pou bann dimoun aze, tousala i kontribisyon ou vwazen.

Alors, akfer ki ozordi, eski nou oule anvoy dimoun mandyan kot son vwazen? Mandyan lo semen in deza en sours nwizans. Eski nou oule ofisyelman anmenn sa nwizans dan lakominote aprezan?

Anba sa ladministrasyon nef, nwizans mandyan pou mars port an port, kaz an kaz aprezan.

Diferan fondamantal ant pozisyon mon parti avek sa pozisyon *pseudo* liberal adopte par ladministrasyon nef, se ki nou lo nou kote, nou anvi stimil nou lekonomi entern, e asir en serten norm *cash flow* pou bann biznes lokal.

Nou ensiste ki nou pei i annan ase lespas e ase resours pou anpar son pep la dan sa moman difisil. Si zot anvi pratik zot lekonomi tir bibron, e deklare avek plezir konmkwa ki i annan dimoun ki pou tonbe.

Silvouple fer li pli tar, fer li dan en fason gradyel e responsab. Akoz zot bann aksyon ozordi pou annan konsekans grav lo lavi bann ki pli dan bezwen. Mon konsey pou zot se pou ouver zot leker e pou devlop en pe konpasyon pou sa ki pli feb, pou sa ki'n tonbe la dan sa moman difisil. Si zot pa oule fer li lo en pwennvi imen, me fer li lo en pwennvi ekonomik.

Akoz zot bann aksyon pou plonz lekonomi pei dan en resesyon konplet e total, ki pou pran bokou plis lannen pou nou sirmonte.

Zot sel remed letan mon pe gete se pou koup isi, koup laba, e tou zot bann koupe se malere ki pe ganny koupe. E pou mwan sa i pa en keksoz ki

akseptab dan en pei kot in arive ozordi.

Nou annan ase resours ki nou kapab mobilize. Nou posed ase mwayen deza pou nou Seselwa sov nou prop lekonomi. Nou menm par nou prop zefor, me sel keksoz ki nou manke set en Dirizan avek en lenerzi pozitiv, en kouraz, en konesans pou delivre. Sa nou napa a latet Sesel ozordi!

Mr Speaker Prezidan Ramkalawan pa'n fer en Diskour Leta Lanasyon Sesel sa lannen. Sa ki in fer ti plito en diskour son prop leta emosyonnel. E son leta emosyonnel sete enn ki an se moman pe ganny dominan par lafreyer e panik.

Lo lot kote, son realite i enn ki ranpli avek *failures* e lenkapasite pou delivre! Nou Prezidan i enkapab pran kontrol la sityasyon ki o tour li, e sa ki efreyan avek sa sityasyon, se ki domaz ki i pou koze pa pou reflekte lo li! Pa pou afekte li. Me sa i ki pli feb dan nou sosyete ki pou soufer, sa mon garanti zot. Mon oule profit sa moman pou mon swet kouraz mon pep. Kouraz Seselwa, gard zot lafwa ek konviksyon dan en meyer demen.

Kit zot lanmen okipe avek zot lokipasyon, avek zot

prodiksyon. Me gard zot lizye fermeman lo lorizon. Mersi Mr Speaker.

(APPLAUSE)

MR SPEAKER

Mersi tou bann Manm. Nou'n ariv ler pou pran *pause*. Nou a rebran apre midi 2er. Mersi.

(BREAK)

MR SPEAKER

Mersi, bonn apre midi tou dimoun. Nou ava ekout Onorab Norbert Loizeau.

HON NORBERT LOIZEAU

Bonzour Mr Speaker. Bonzour tou Manm, bonzour tou dimoun a lekout. Mr Speaker, avan mon konmans mon diskour mon anvi zis dir en pti keksoz an pasan, apre ki mon'n ekout Onorab Loze fer son diskour. Mon'n war ki Onorab Loze dan son diskour in fer egzakteman parey Anais ti fer dan sa moutya, Mr Speaker.

(laughter)

HON NORBERT LOIZEAU

In ouver en pti gin isi, in tous en pe laba e a lafen personn

pa'n ni anvi gete, ni ekoute! E osi Mr Speaker, e mon panse i parti US i osi i en Anais Mr Speaker. Si nou ekout byen sa sanson akoz in donner partou, partou!

Mr Speaker permet kontinyen lo mwan entervansyon. Mon anvi dir en bonzour spesyal tou mon zabitan distrik Bel Air ki'n fer mwan konfyans pandan tou sa bann lannen ki mon'n debout pou zot. E ki ozordi in fer avek zot sipor ki Sesel vreman in vin pou tou son zanfan.

Mon anvi dir zot mon salye zot kouraz ek zot senserite, akoz sa sipor ki zot in donn mwan byensir zot in fer sir ki in napa okenn pri atase avek.

Ozordi Sesel Mr Speaker, vreman in vin pou tou son zanfan. Mon dir sa ozordi parey Prezidan Ramkalawan ti dir dan son diskour Vandredi pase, vreman i annan en sourir lafyerte lo figir tou Seselwa ozordi.

Tou Seselwa in reganny sa *joie de vivre*, ki ti annan en moman ti'n perdi dan nou pei. E tou Seselwa in pare ozordi pou vin donn en koudmen pou re konstrir nou zoli pti pei, ki apel Sesel.

En pei Mr Speaker, kot en pti group dimoun ti krwar se zis zot ki annan par ladan. En pei

kot son pep ti'n divize. En pei kot ti annan en gro nyaz lafreyer kot ti'n anglouti li. E ozordi Mr Speaker, parey Onorab Monthy ti fer resorti taler, en nouvo sapit pe al ganny ekrir. Akoz parey Prezidan in dir tou keksoz i nef.

Permet mwan Mr Speaker, komans ankor koumsa, an Oktob lannen pase Sesel ti ganny son premye Prezidan elekte. Mon dir elekte Mr Speaker, akoz i pa'n fer li par vyolans, in fer li par bwat vote.

En keksoz ki toultan i ti dir ek nou, bann nouvo Manm, bann zenn Manm, bann mwan, Onorab Sandy, Onorab Henrie ti dir nou paran pasyans. Nou pou fer li en zour dan bwat vote! E Mr Speaker, ou kapab demanti mwan si i manti.

E in fer atraver bwat vote Mr Speaker, avek en gran mazorite Seselwa ki'n siport li. Me koman premye elekte Prezidan Ramkalawan in vin, erit en pei dapre ki ler mon ekout son diskour Vandredi, ki lo son zenou.

En pei ki dapre ler mon ekoute in preski faid; en pei kot sa ki ti la in pran tou nou larises e zot in diverti kontan avek zot bann dalon. Andotmo Mr Speaker, en parol ki Seselwa i kontan dir, zot in donn bal! E la fer mwan, donn mwan en

sans Mr Speaker pou mwan *quote* en konversasyon ki Prezidan France Albert Rene ti fer avek Onorab Gill.

Mon *quote*, i ti dir, sa pa mwan ki ti dir, I ti dir avek Onorab Simon Gill, "Ki en sel regre ki i annan se ki zot in mazin zis zot lekor."

Wi Mr Speaker zot in mazin zis zot lekor akoz si ozordi nou pei i dan sa sityasyon kot i ete, se akoz vremen i pa'n koz manti sa msye. Akoz i ase entelizan. Vremen zot in mazin zis zot lekor!

Ozordi Mr Speaker sa lakwizin ki swadizan ti annan en pwalon ki zis Zot ki ti pou kapab tyonbo, ozordi dan sa lakwizin, ni kastrol, ni pwalon, nanryen napa! Sa dapre ki mon'n konpran dan diskour Prezidan Wavel Ramkalawan Merkrede. Nou lakwizin i anflanm Mr Speaker.

E Prezidan Ramkalawan i bezwen rantre dan son lenz *fireman* avek en lasaler ki pli terib ki ti sa lanmans pwalon, ki dapre zot zis zot ki kapab tyonbo. In vin pou li vin tenny sa dife, refer nou lakwizin remet li annord Mr Speaker. E kwi en repa ki a lafen tou Seselwa a ganny en pti par pou zot kapab manze!

(APPLAUSE)

HON NORBERT LOIZEAU

Savedir Mr Speaker, Prezidan Ramkalawan i bezwen rekonstrir nou pei an antye e sa i sa sapit ki pe al ganny ekrir dan listwar Sesel, parey mon'n dir ou o komansman.

Mon servi sa bann term Mr Speaker, akoz Prezidan Ramkalawan in dir nou Vandredi dan son prezantasyon SONA, ki nou pei ki'n erit en kales kase. Mr Speaker, mon konnen sa mo i anvoy en gou anmer dan labous bann lot kote latab. Me parey Onorab Georges ti dir, si nou pei i pa en *Rolls-Royce*, ni en bouret, ni en kales kase nou bezwen dir.

E sa Prezidan Larepublik in dir klerman. E sa ti demontre Mr Speaker, yer dan *interview* apre Nouvel lo televizyon, kot en madanm ti dir mon pa pe tro mazin son non i en pti e nouvo. Me mon konnen sa non i pa pe vini.

Mrs Morin, Mr Speaker, mersi. Mrs Morin ti dir li menm Mr Speaker, klerman ki kot Servis Sosyal laba kot ASP i en kales kase. I annan tro bokou labi ki'n arive. Tou keksoz i an dezord. I annan milyon ki'n ganny depanse dan bann fason ki pa kler, si mon'n konpran li

byen. I annan Mr Speaker, ki malere poudir ki i annan plis ki 10an pe ganny asiste avek sosyal san en rezon kler.

In menm servi en term Mr Speaker, an dizan ki tou tiyo ti ouver. Sa ki mon konpran se ki zot ti pe donn bal Mr Speaker. E taler mon'n ekout Onorab Cosgrow, i ti pe koze i ti dir ek Onorab Naddy Zialor ki li i ti ganny mete pou responsab sa nonmen *URS*.

Me parkont Onorab Cosgrow li osi in travay laba. E la mon anvi dir ek Onorab Cosgrow Mr Speaker, si i annan sa lakle tiyo ek li, li osi ki ti pe ouver fermen laba, rann nou Mr Speaker!

(APPLAUSE)

HON NORBERT LOIZEAU

Si i annan, e tou bann ki annan sa lakle rann nou Mr Speaker. Akoz nou bezwen sa lakle pou nou kapab, akoz tou delo in fini Mr Speaker dan tiyo. E nou, nou bezwen sa lakle pou nou tir ler ladan aprezan.

Mr Speaker, mwan mon pa ganny en konpran avek se zans. Mon pa ganny en konpran ler mon get tou sa bann keksoz pe arive. Dan lepase zot ti met bonm dan tant vakwa partou *Reef Hotel!* Sa enn.

Dezyenm, zot in viktimiz dimoun Mr Speaker. E la yer swar mon tande ki zot ti ouver tiyo Mr Speaker. Mon kapab konpran Mr Speaker, akoz ki Onorab Loze i kontan sa moutya Anais!

(laughter)

HON NORBERT LOIZEAU

Akoz Gouvernman *US* i paret mwan li osi i ti en Anais Mr Speaker.

Alor Mr Speaker, mon demann mon lekor alors eski Prezidan ti pe koz manti ler i ti pe koz lo kales kase? Eski i ti mal pou Prezidan koz koumsa avek en lakoler? Mr Speaker, mwan mon pa ankoler, mwan mon araze. Ler mon'n tann sa konversasyon lo televizyon, sa *interview* kot Sosyal, bann labi ki'n arive Mr Speaker.

Akoz mwan dan mon distrik i annan bann dimoun pou rezon politik ki'n ganny kit ater. Menm zot ti pe seye pou travay pou fer de bout zwenn. Zot in apply pou *welfare* me zanmen zot in gannyen. Me bann ki'n siport lot kote laba. Bann parese, zot in benefisyé Mr Speaker.

E sa i fer mwan ankoler. Alors Mr Speaker, eski pa i byen ki en lord i ganny mete dan sa bann landrwa? Wi Mr Speaker,

lord i bezwen ganny mete. En move fason fer i bezwen ganny ranplase avek en fason pli byen.

Dan repons Leta Lanasyon Mr Speaker, preski tou Manm lo lot kote latab zot in dir ouvertman ki Prezidan Ramkalawan pa'n prezant okenn plan li. I ok. Yer swar Mr Speaker, bann teknisyen dan sa Minister ki mon'n koz lo la, ti pe eksplike. Eski sa pa en fason pou en Gouvernman donn lenformasyon?

Eski tou keksoz Prezidan Ramkalawan se li ki bezwen vin dir. Si wi Mr Speaker, si se li, be akoz nou annan sa bann profesyonnel? Sa bann profesyonnel dan Gouvernman i la pou kwa? Se zot ki la pou donn sa bann lenformasyon. Se zot ki bann teknisyen.

Mr Speaker, mwan mon pa ganny en konpran akoz zot, zot pe pans koumsa. Akoz mwan pou mwan, Onorab Ramkalawan pa en diktater li. I zis fer sir ki tou dimoun i desarz son responsabilite dan en fason ki byen. Se pou sa rezon Mr Speaker ki i annan tou sa bann profesyonnel otour li.

Lopozisyon in fer kler, in fer nou'n krwar ki Prezidan pa'n prezant okenn plan. Mon anvi dir avek zot, dan Gouvernman napa zis Prezidan ancor enn fwa. I annan bann Minis osi.

Zour Minis pou en tel Minister, i annan kek keksoz, kek lanons ki bezwen ganny anonse, ki bezwen ganny fer, li i ava vini i ava vin fer son lanons.

E la Mr Speaker, apre SONA pou annan lanons ki pou ganny fer. Pou annan Bidze. E dan Bidze, dan lanons Bidze par Minis Hassan, mon asir zot ki pou annan en ta keksoz ki pou ganny met deor. Pou annan en ta lenformasyon. Zot a ganny sa bann lenformasyon dan bann moman apropiye. Me pa Prezidan ki tou lazournen pou vini pou vin donn zot. Mr Speaker, se Minis Finans ki pou donn zot sa bann lenformasyon ek son bann teknisyen. Akoz se zot ki konn sa bann travay.

Mr Speaker, mon konpran akoz lot kote latap pa'n war nanryen dan sa ki Prezidan in dir. Akoz mwan sa ki mon konnen, toulezan i annan 2 lanons ki ganny fer. I annan lanons pou Leta Lanasyon, e enn pou Bidze lafen lannen.

E Prezidan li in vin fer son lanons SONA. In fer li diferaman Mr Speaker. Me pourtan, pandan 4an ki'n pase nou pa'n tande SONA. Nou'n ganny de lanons Bidze par tou bann Prezidan US sa letan! Se zot ki'n dir tou keksoz ki pou arive larzan. Konmsi zot napa

en Minis Finans. Me Prezidan Ramkalawan li i *value* travay son bann Minis. E i donn zot sans pou zot kapab delivre dan en fason lib e fran.

Mr Speaker, Onorab Pillay li i le montre avek son Manm, i krwar i kapab montre Prezidan Ramkalawan mannyer pou fer en diskour. Onorab Pillay, ou meg, tenir ou laba dan sa soulye ki pli gran ki ou lipye!

Mr Speaker, parfwa ler mon ekout *Leader* Lopozisyon ki Onorab Pillay ki pe asize laba, mon war sa konfizyon Mr Speaker. Onorab Pillay, i ganny mete lo Komite *Platinum*. Komite pa ankor zwenn, ni en *meeting* pa ankor ganny fer. Onorab Pillay i dir i pa'n ganny konsilte!

Ler premye *meeting* i ganny fer. Onorab Pillay i asiste, i partisip dan tou bann desizyon, e i dakor avek. Ler Onorab Pillay i sorti deor, i dir ek medya i pa dakor!

Mr Speaker, Onorab Pillay i annan en gro problem grav. Mon krwar in ler pou li demann en pti konsiltasyon avek, (mannyer Andy?) Gro garson dokter pou en konsiltasyon. Petet i a ed ou en pti pe.

E pa bliye Mr Speaker, sa menm dirizan ki ti dir vaksen pa bon. Me son prop Manm pa ekout li, pas par deryer zot ale

zot pran zot vaksen trankilman. Apre zot dir zot in fer li endiskre.

Mr Speaker, si sa pa konfizyon, mannyer sa i apele? Dan tou son konfizyon Mr Speaker, Onorab Pillay in oublie ki Prezidan Ramkalawan ler i ti fer son diskour pou Leta Lanasyon i ti annan zis 89 zour dan lofis. I ti fek antre dan lofis.

Be ki nou'n tande Lendi dan repons Mr Speaker? Tou sa bann desizyon ki ti ganny pran par son prop Gouvernman sa letan, Onorab Pillay i vini i anvoy sa lo Prezidan Ramkalawan!

Mr Speaker, mwan mon pa war sa i drol. Akoz sa i zot labitid. Parey Prezidan i kontan dir, "manz bannann anvoy lapo lo nou". Nou, nou abitye ek sa.

Mr Speaker, e dan tousala, lekel ki ti anmenn Mosyon pou kennsel sa *S.I. 148*. Prepare par Minis Loustau-Lalanne an Oktob 2020. Se Onorab Pillay ki ti vin dir tire, pa bon!

Mr Speaker, mon konpran li mwan, petet i ti pe repar sa kales kase. Dan son larepons sa menm *Leader* Lopozisyon in dir ki *ANB* pa ti merit anba Lapolis. Be lekel ki tir *ANB* anba Lapolis, apre remet li anba

Lapolis? Sa i en kestyon, apre mon a donn ou larepons.

Lekel ki ti sanz anba pouvwar *FIU*? Mwan? Onorab Ramkalawan? *LDS*? Non, Mr Speaker, se Prezidan Faure li menm ki ti pe tire, mete. Pa nou! E Onorab Pillay rod lenformasyon ki ou Gouvernman in fer avan ou vin koz en bann kalite koze ki ou menm ou pa konnen.

Atraver ou Mr Speaker, mon anvi dir avek onorab Pillay ki *Leader* Lopozisyon, sa soulye i pli gran ki ou lipye. *Cool easy* ladan kantmenm i donn ou en pti pe zanpoul, pa fatig ou! Akoz Onorab Prezidan Ramkalawan i bokou pli lwen ki ou! Alors vin ek bann largiman ki ou groser e ki apre ou grander.

Prezidan Ramkalawan dan son diskour in koz lo lefikasite dan servis piblik. In dir si nou pa delivre sed la pas pou en lot. Wi Mr Speaker, mon dakor avek li. Politik kit kot zot avan ou rantre dan ou lofis.

Wi Mr Speaker, sa i vre. Sa i byen akoz dan ladministrasyon Mr Faure, e tou Ladministrasyon zot Gouvernman, zot in soutir dimoun pou fer politik dan *public service*. Se sa ki'n diviz sa pep! E la mon konstate, E la mon dakor avek Prezidan, bann ki krwar ki sa pei in sanze, me

sistenm in reste parey, retir zot Mr Speaker.

Onorab Pillay ek son tim lot kote, pou zot sa i apel viktimizasyon. Sa i apel 'ek nou pa ek nou.' Mr Speaker, dan lepase in annan tro bokou labi ki'n arive dan bann Minister. E yer swar nou'n tande ankor pou lenformasyon zot lot kote latab, mon a dir zot bann labi ki'n arive dan sa Minister ki apel *Local Government*.

Eski i normal pou en travayer Minister fer son prop biznes *within the Ministry*? Non, Mr Speaker, mon a eksplike: monte desann *Dubai*, aste bann materyo e vann avek sa menm Minister, pou en pri pli ser ki vann lokalman laboutik!

Mr Speaker sa i mal. Ler en senp drayver Mr Speaker, i pran lekipman sa Minister i al fer son prop biznes avek. I pran transpor, *fuel*, e tou materyo. E ler i ganny dir ki i pe fer sa, deswit Mr Speaker i met son *resignation*.

Eski Mr Speaker, i apel viktimizasyon sa? Eski i apel 'ek nou pa ek nou?' Eski i byen Mr Speaker, pou bann ki ganny bann pli gro lapey dan Minister les zot konze akimile, e apre vann avek Minister? Pourtan Mr Speaker, ou pa annan dwa

vann konze konmela. I dir ou pran.

Mazinen Mr Speaker, mon pe koz ou bann lapey 42mil. E sa in arive pandan dezane Mr Speaker. E zot ki krwar zot pou kapab fer li anba sa nouvo ladministrasyon. Mr Speaker, zis mazinen en lapey R42 mil ler ou les li akimile pou vin 90, 100 ekek zour ler ou vann li, bann ki matematisyen dan sa Lasanble, zot ava konte pou mwan, lo lot kote latab.

Mr Speaker, e si i arive zot ganny met a laport. E si i arive si zot Kontra pa ganny renouvle. Mr Speaker, mon anvi ki Onorab Pillay ek son bann Manm laba i dir nou eski i apel viktimizasyon? Eski i apel 'ek nou pa ek nou?' Non, Mr Speaker, sa apel abiz zot pozisyon, pou akimil larises dan en fason malonnet e malapropo!

Ler proze i ganny aprouve Mr Speaker, larzan i ganny donner, proze pa ganny fer. Mannyer nou apele Mr Speaker? Mr Speaker, mon pou aret lanmenm. Mon pou poz sa la, akoz i telman annan pou dir.

Prezidan i dir in dir avek Lepep Seselwa ki fodre tou dimoun i pran zot responsabilite. Nou bezwen annan en kiltir travay. Leve bomaten olye al travay, me vin

o bor semen vin vey en bout drog, ouswa en bout bwar. Pa pou anmenn zot okenn par Mr Speaker.

Mon espere la ki Prezidan in dir zot, zot a konpran. Akoz mwan i annan lannen mon pe pas sa mesaz avek serten dimoun dan mon distrik. Be bokou zot ti pran li koman en lensilt, koman mon'n ti pe maltret zot. In menm kout mwan ser dan dernyen eleksyon Mr Speaker, kot i annan pa'n vot pou mwan. Me avek COVID ki pe tap nou, ki pe afekte nou lekonomi, mon espekte ki zot a realize ki pa ti en lensilt. Me mon ti pe ed zot.

Prezidan in dir ki URS i en *Relief Scheme*, pa en *permanent Scheme*. Mon rapel Mr Speaker, dan lepase, dan bann letan ki'n pase. URS pou parti sortan ki ti o pouvwar, ti en *Scheme* ti ganny mete detrwa mwan avan eleksyon. Kot pou zot kapab anmas en pe vot. Apre eleksyon zot ti ganny met deor.

Me erezman avek COVID ki'n vin dan lannen eleksyon, zot in al rod tou dimoun. Malgre ki zot pa ti pe rod lasistans. Tou bann ki ti pe asize pa pe travay. Menm zot pa ti anvi travay, e zot ti vin met li lo sa *Scheme*.

An mazinan ki zot pou ganny eleksyon. An mazinan si zot pa ganny eleksyon zot ava

kit en fardo lo sa Gouvernman ki a vini. Sa pa'n marse Mr Speaker. Vi ki sa pa en *Scheme* permanan nou a rod en fason. Nou a rod en travay permanan, e nou a met zot ladan e zot a sorti lo sa *Scheme*.

Mr Speaker, mon pa pou koz lontan lo sa size akoz yer swar bann teknisyen in koze, in eksplik bokou konsernan sa ki mon'n dir.

Ozordi koman en pei nou annan en gro defi pou sirmonte. E COVID-19 i enn sa pli gro defi ki devan nou. E mwan parey mon Prezidan in dir, mon annan lespwar. Parey sa fiy La Misère, Tyra ti sante, “Nou annan lespwar ki Sesel pou ranport laviktwar.”

Sa pou arive Mr Speaker, akoz i annan bann zonm ek bann fanm dirize par Dr Gedeon ek Minis Lasante ki pe fer en travay formidab. Zot pe travay nwit e zour toulezour Mr Speaker.

Mr Speaker, mwan mon *witness* sa travay toulezour. Akoz kot mwan i annan dimoun ki pe fer sa travay bomaten kot Lopital e aswar ziska tar lannwit kot lakour. E parfwa Mr Speaker, se mwan ki vin dir li leve al dan son plas. 3er-4er bomaten latet in tonbe lo en *laptop* pe sey gete mannyer pou

travay pou dil avek sa pandemik.

E la mon anvi lans en lapel avek tou Seselwa. Aret fer groupman. Pran zot swen, ekout ki in dir Mr Speaker. Ekout ki Lasante pe dir pou ki nou a kapab konbat sa lepidemi. Mr Speaker, an terminan mon ava tous en pti gin.

MR SPEAKER

Onorab ou'n ganny 31 minit la. Mon pe vey ler en pe pre. Silvouple konklir.

HON NORBERT LOIZEAU

Pou konklir Mr Speaker, mon a koz en pti pe lo leta mon distrik. Mon distrik Bel Air pa'n ganny eparye avek COVID-19. Nou salye zefor parey mon'n dir ki Minister Lasante pe fer malgre i annan dimoun dan mon distrik ki pa pe obzerv bann direktiv.

Zafer lakaz i en komodite rar dan mon distrik Mr Speaker. E la mon anvi enplor avek Gouvernman pou revwar nou bann rezerv e vwar si napa morso ki kapab ganny servi pou ki nou a konstri lakaz pou nou bann sitwayen dan mon distrik Bel Air.

Part rental Mr Speaker. mon krwar ki nou'n bezwen revwar, akoz ozordi i annan bann dimoun ki pe *struggle* pou

zot kapab pey sa *rent* ser. Mr Speaker, lakaz rezerv si i annan ki byen konekte i kapab reste dan rezerv, alors mon krwar ki zabitan Bel Air, Sans Soucis zot osi zot kapab reste dan rezerv.

Dan mon distrik i annan dimoun ki abiz lo *URS* me i osi annan ki vreman pe travay dir, ki pe travay dir pou sa larzan *URS*. Sa i fer mwan mazin Chantal, en fiy lo *URS* ki pe travay kot *Home of The Elderly La Retraite*. E i ti a kontan ki i ganny anploye.

Mr Speaker, i annan bokou lezot keksoz pou dir ankor me dan larepons Bidze mon a profite mon a pas lo la.

Mr Speaker an terminan mon anvi remersi tou dimoun ki'n ed mwan dan en fason ou en lot dan mon konpany eleksyon. Spesyalman mon bann aktivis. Mon anvi nonm non, me lalis i long.

E alors i enportan pou nou bouz devan, napa plas pou rankin ek laenn antre nou ek nou zabitan. Nou bezwen kapab pardonn kanmarad e *move on* avek nou lavi. Annou fer nou Bel Air vin sa distrik.

MR SPEAKER

Onorab terminen silvouple.

HON NORBERT LOIZEAU

Lanmour e lape ti renye. Mersi Mr Speaker.

(APPLAUSE)

MR SPEAKER

Mersi bokou. Mon ava apel Onorab Gervais Henrie.

HON GERVAIS HENRIE

Mersi Mr Speaker. Koleg Onorab e zabitan Mont Buxton e osi tou dimoun a lekout bonn apre midi. Sa moman ki nou pe viv ladan i nesese ki nou donn kanmarad en koudmen. I enportan ki nou donn kanmarad en sans.

Nou pe viv dan en moman troublan, nou rev pou prosperite nou Nasyon in en sel kou ganny arase dan nou lanmen par en pandemik. I pe annan en lesey dezespere par Lopoziyon pou fer krwar se Gouvernman ki responsab pou logmantasyon dan la kantite ka COVID-19 dan pei, sa i pa korek ditou. Bann Dirizan ek Lotorite Lasante pa'n arete fer lapel avek dimoun pou restrikte zot mouvman, me dan peryod festivite an Desanm sirtou *weekend* nwel ek lannen san oubliy lafet Lerwa Bwar Kreol in donn bal menm.

In pran en pe letan pou dimoun tonm malad, ouswa montre sentonm sa maladi

aprezan ki nou pe vwar en logmantasyon dan tou lenfeksyon ki'n propaze aköz dezobeisans bann endividi pou ekout konsey e respekte lord.

Nou'n aprann nou lesen dan en fason dir. Mon persyade ki finalman nou'n konpran poudir sa maladi i touye. Nou aprezan pli vizilan.

An realite Sesel pe met sa sityasyon anba kontrol aköz volonte, e sipor politik Gouvernman. Bokou ka pe ganny dekouver aköz lavites ki bann *contact tracings* pe fer, e lakantite *PCR test* ki pe fer.

Malgre kritik kont son vizit UAE, Prezidan Ramkalawan pa'n demontre laper. In al fer debrouy 50mil doz vaksen pou benefis pep Seselwa.

Koman bann Dirizan dan kominote ki sipoze enspir nou popilasyon pou vaksinen, bann *MNA US* in swazir pou kritik sa program. Me annou pa pran zot traka, konpany vaksinasyon Nasyonal pe marse anefe i pe al byen menm.

To ou tar, sa viris ki'n pran plis ki 2milyon lavi atraver lemonn, pou ganny antere li osi. Sa program pou en sikse selman si ou volonterman agree pou ganny vaksinen, e anvoy bann ki pe senm lafreyer konsernan sa vaksen

pronmnen. Antretan annou eksprim gratitud nou nasyon pou bann ki avek kouraz e volonte pe met zot lavi a risk pou deservi nou pep e nou pei.

La mon mazin sa lekip zenn dokter ki pe travay 24 lo 24 kot sant izolasyon, kot Lopital Lafanmir Ile Perseverance.

Mon osi mazin nou lekip sipor Minister Lasante, e bann travayer esansyel ki lo fron batay ki asire ki popilasyon i reste sen e sof;- parey Lapolis, bann volonter Lakrwa Rouz, profesyonnel medya zis pou nonm enn de.

Annou sakenn de nou dan nou lapriyer annou mazin fanmir sa 3 Seselwa ki'n perdi batay kont COVID-19. Mon prezant zot mon kondoleans e mon partaz zot lapenn. Napa ase larm ki pou kapab ranplas zot pert.

Ser, frer, i sagrinan ki ler Gouvernman pe konsantre son latansyon avek resours pou konbat viris *Corona*, i annan ki pe pran lavantaz en Gouvernman ki okipe.

Enn parmi sa Parti *United Seychelles* ki agasan avek zot Kominike Lapres, pou senm doutans dan lespri piblik Seselwa, lo bann fe ki Lotorite pe pibliye e atak kredibilite avek konpetans bann profesyonnel

Lasante. Politik pa devret en batay san ses pou score pwen apre sak levennman.

Wi tou lavwa e kontribisyon i devret ganny ankouraze, otan ki i pa senm konfizyon e anmenn fristrasyon. Pa la, pa dan sa ben ki nou ladan. Pa oubliy zot Moto Eleksyon 2020 "Koste pour Sesel." Mon dir avek zot donn Sesel en sans.

Mr Speaker okenn dirizan pa pou reisir dan son plan pou rekonstrir son pei, ouswa tras en nouvo larout si i napa korperasyon avek sipor son pep.

Vandredi nou'n antann Mr Wavel Ramkalawan delivre son premye diskour lo Leta Lanasyon koman Prezidan Sesel. Listwar pou rapel Prezidan Ramkalawan koman enn bann Dirizan pli remarkab dan Sesel.

Mon pe dir sa aköz an menm tan ki Leta nou Nasyon i dan gran difikilte nou annan rezon pou rezouir, aköz nou'n ariv lo some montanny ladelivrans, apre en gran traze ver laliberte dirize par li menm Prezidan Ramkalawan.

Nou a rapel ki dan son diskour inogirasyon kot *State House* Lendi le 26 Oktob, i ti fer lapel pou linite Nasyonal. Kot

tou Seselwa i egal e personn pa ganny kit deryer.

Mon site, "Yer nou bann siporter *LDS, United Seychelles* avek *One Seychelles*, ozordi mon demann sakenn de nou pou regard nou prosen koman Seselwa, akoz se sa ki nou ete e se sa ki ini ou." Fen sitasyon.

Anliny avek lapel Prezidan Ramkalawan, i devwar sak sitwayen pou dedye son aksyon, son zefor e son parol pou realiz son vizyon pou en Sesel demokratik zis e lib. Sa i bann valer ki'n prese depi lo komansman son karyer politik an 1992.

La mon bezwen dir ki mon pa pe senpleman koz lo lepase, mon pe dir annou servi li pou batir lavenir. Nou pe kontiny sa gran traze ver laliberte ki in komanse, pou batir en sosyete dan ki nou kapab viv dan laliberte; dan ki nou tou nou kapab egal devan Lalwa e kot nou kapab partaz larises nou later e annan en meyer lavi.

Nou bezwen batir en pei kot reisit en dimoun i ganny determinen par son prop linisyativ e travay dir. Me non pa ki degre lwayal ou lwayal avek Gouvernman ou parti politik o pouvwar.

Annou onor lalit anmennen par Prezidan Ramkalawan pa zis atraver zoli

parol, me par aksyon pou donn kanmarad en sans dan sa vizyon partaze pour en meyer sosyete. Le moman in arive pou nou donn kanmarad en sans e reafirm nou konviksyon, ki Sesel i apartyen a nou tou, e nou tou nou apartyen a Sesel.

I annan apepre 98mil nou, sakenn avek en diferan zistwar leksperyans pwennvi e lentere. Me nou ini ansanm par en desten komen. Koumsa nou onor tou bann Seselwa ki'n milite ziska la pou en sel Sesel. Pou elimin ek nou, pa avek nou.

Pou donn kanmarad en sans fodre koman en pep nou angaze pou kre plis lanplwa pou lazenes. Konstrir semen, lakaz, klinik avek faktori. Prepar nou zanfan pou en lemonn sanzman avek progre, pou konstrir vilaz kot bann fanmir a viv en lavi prodiktiv e konfortab, ere, sen e sof.

Nou bezwen determinen pou batir en sosyete ki ganny definir par lakourtwazi ek lentegrite, ki pa toler vol larzan piblik e lezot byen. Bann endividi, nou bezwen krwar dan travay dir e rezet lapares avek kriminalite. Menm si i napa bokou size nou difere lo la, lo sa bann size ki pou definir nou lavenir nou bezwen debout, en sel pep i donn kanmarad en sans.

Nou nouvo Gouvernman in ganny donnen sa responsabilite pou konfront lenzistis, pou konfront labi, konfront koripsyon, konfront linefikasite e konfront inegalite. An dot mo Mr Speaker, nou nouvo Gouvernman pe donn sak son sitwayen en sans, nou nouvo Gouvernman in ganny apele pou fer sa dan en letan difisil.

Sityasyon ekonomik pei pe al tap dan dir. Dan menm lenstans kot nou oblize tir 40poursan nou popilasyon anba laliny lapovrete. Ler nou bezwen relans aktivite ekonomik pou met nou ser e frer Seselwa dan en lanplwa.

Retir zot lo sistenm *welfare* ouswa *FA4JR* avek lespwar ki zot a kapab redwir lakantite travayer etranze ki lo *GOP* se nou.

Me dezormen finans piblik i dan en sityasyon kontrent. Sa pou limit abilite Gouvernman pour elarzi son lenvestisman dan devlopman ekonomik e sosyal pei. Me ankor sa Gouvernman i pare pou donn sak Seselwa en sans.

Mr Speaker mazorite *MNA US* ki'n pran laparol ziska la, zot analiz lo diskour Prezidan Ramkalawan, in ekspoz zot imatirite politik, mank preparasyon dan zot

preparasyon, zot negativite e klerman demontre inabilite e limitasyon Dirizan Lopozisyon pou sezi lenportans son larepons.

Get sa, in annan en sanzman Gouvernman an Oktob 2020. Sa nouvo Gouvernman pe pran en lot larout dan direksyon ki i pe anmenn pei. Nou pe sorti dan sa tandans sosyalis kot Gouvernman i pran responsabilite tou keksoz. A en pwen kot Gouvernman i zer lavi personnel son popilasyon, depi ou nesans kot ou ganny R1000, ziska ou lanmor kot ou ganny R1500.

Si nou en pei ki ti ris e in dekouver delwil parey La Norvège, sa ti pou fantastik. Me avek en lekonomi ki depan lo tourizm fas a en lekonomi global ki afekte sekter vwayaz, nou lekonomi i an rouz kouler Parti Lopozisyon ozordi. Sa menm refren ki tou *MNA US* in sante, i se ki sa diskour in anmenn lensertitid, dout avek lenkyetid.

Letan zot sit sa detrwa size ki zot dir Prezidan Ramkalawan pa'n adrese ki pri lavi, lazenes, lagrikiltir avek lapes, Lalwa sitwayennte, ledikasyon eksetera, eski zot konsyan ki Mr Ramkalawan avan Vandredi pase in delivre 23, mon repete

23 larepons lo Leta Lanasyon ant 1994 a 2020.

Parmi sa bann diskour 18 ladan in reponn koman Dirizan Lopozisyon. Lepok ki i ti komanse, Onorab Sebastien Pillay e Onorab Wallace Cosgrow ti napa menm laz vote. Zot ti annan selman 16an. Tandis ki li Onorab Audrey Vidot ti dan premye a laz 7an, alor ki plan zot pe rode?

Son plan e vizyon pou Sesel in ekrir dan leker sak Seselwa, ki'n siport li depi ki in rantre dan Lasanble Nasyonal avek mwens ki 10poursan vot lo tiket *United Opposition* an 1993 ziska ki in raport eleksyon prezidansyel an Oktob 2020 avek 55poursan vot.

Prezidan Ramkalawan in eksplik klerman ki Sesel ozordi pe fer fas avek 4 defo swivan; COVID-19, drog, koripsyon avek mank performans lo serten travayer servis piblik.

Solisyon in donnen. Dirizan Zafer Gouvernman Onorab Bernard Georges in anmenn plis klarite lo la. In dir nou, nou pou bezwen annan bann mezir difisil ki enkli restriktirasyon, eliminasyon, sa ki pa esansyel. Koup sa ki nou pa kapab, ou nepli kapab *afford* par egzanp *FA4JR*.

Tir politik dan servis piblik, atak drog avek

koripsyon, demann en sanzman mantalite dan sakenn antre nou pou viv dapre nou mwayen onnetman, e dapre Lalwa.

Pou lazenes Seselwa ki fitir zenerasyon ki pe swiv nou deba vwala ki Parti Mazoriter dan Lasanble Nasyonal pe demann zot. Pran konsyans difikilte ki Leta nou Nasyon i ladan, akoz okenn aksyon ki ganny pran ozordi pou annan en lenpak direk lo ou lavenir.

Sanmenm nou pe dir ou ki ou oblize aksepté ki ou fason fer e fason viv i bezwen sanze. Mwan Gervais Henrie mon napa okenn lezot fason pli kler e pli fran pou eksplik ou ki pe pase apard dir ou avek bann Politisyen Lopozisyon olye dir, plito eksplik ou ki pe pase.

Apard dir avek bann Politisyen Lopozisyon, olye fer palab e dir ki zot pou ensit nou pep fer dezord, donn en koudmen konstrir pei!

(APPLAUSE)

HON GERVAIS HENRIE

Nou ankor rapel zot koman en Lopozisyon ki ti met dife dan bwa, met bonm dan tant vakwa, fer lagrev e evantyeleman fer Koudeta. Sa voyaz mon pe dir zot tat zot delo!

Mr Speaker Seselwa i annan en gran lekspektasyon kot son Gouvernman. *LDS* in ganny elekte lo en platform politik ki'n promet sanzman. Sanzman reel pour ki pep Seselwa i vwar keksoz ganny fer diferaman.

Bokou bann servis enportan ki piblik i depan lo la lo Gouvernman pou anmenn a son laporte, i pas atraver biro bann travayer servis piblik toulezour.

Se zot sa pon ant Gouvernman ek son dimoun. Zot travay esansyel pou nou sekirite Nasyonal ek sekirite ekonomik sak fanmir. Se zot ki ed nou ser ek nou frer fas a bann trazedi apre gro lapli, gro divan, lateras grennen eksetera.

Zot protez nou lafrontyer e defann nou drwa. Zot asire ki nou konsonm, ki sa ki nou konsonmen e nou landrwa travay i sen e sof. Zot protez sa ler ki nou respire e delo ki nou bwar. Zot promouvwar la diplomasi e devlopman pei e protez nou lafrontyer.

Menm avan lendepandans Sesel, se zot ki'n asire ki servis Gouvernman i evolye e reponn bezwen nou pep. Piblik Seselwa ki kontribye zot saler i dir ki zot bezwen fer sa ki byen. Sa i ou moman pou montre larestan

nou ki i vedir ler nou dir mon en Seselwa avan tou? Akoz mon merit pare pou donn mon kanmarad en sans.

An menm tan ki mon touzour pare pou felisit travay dir koman *MNA* ki enterakte bokou avek bann travayer servis piblik, lo non bann zabitan Mont Buxton, mon okouran tre byen sa letarzi koi egziste dan serten Departman Gouvernman e en mank irzans lo lapar serten Zofisyé pou delivre zot kliyan, pou deservi zot kliyan e rann dibyen piblik.

Ozordi plis ki zanmen nou kapab apresye nesesite annan en sekter piblik ki pli inovativ e performan dan son fason fer keksoz. Pou bokou lannen nou'n antann koz lo *eGovernment*, e *eServices*. Me malerezman zot in reste en konsep, zis en konsep.

Annou aret pri dan papyé silvouple. Kontrerman avek sa ki egziste dan bokou pei modern, olye ki Seselwa i asiz dan lakour ouswa lofis e fer bann tranzaksyon *online*. Zot bezwen malgre tou sirtou avek risk *COVID-19*, al fizikman dan bann lofis gouvènmantal pou ganny en servis.

La avek bann restriksyon i fer sa demars pli difisil ankor menm enposib dan serten ka. Nou pa pou kapab blanm servis

inefikas lo zis en mankman dan sistenm elektronik. I osi annan en mankman dan latitud apropiye. I annan en problem *file* oubyen dokiman ki perdi, telefonn ki pa ganny reponn ou senpleman dimoun zis pa enterese.

Sa pa pou kapab kontinyen, in ariv ler pou bann travayer realize ki zot bezwen annan en kontribisyon serye. Mon krwar ki si tou travayer sekter piblik i fer zot par Sesel pour realiz sa rezilyans ekonomik neserer. Dan son ladres Prezidan in dir nou pa pou kapab met tou dimoun dan menm panyen.

E sa i vre, espesyalman dan sa lepok ki nou ladan, nou bezwen kontinyelman ankouraz sa bann ki serye e anvi travay. Nou sekter piblik i osi ganny deservi par Seselwa ki leve, ki vin travay avek sa disiplin e lanvi pou kontribye dan devlopman son pei.

Alors pou tou sa bann travayer serye dan sekter piblik, nou ankouraz zot e nou dir zot kontinyen delivre. Gouvernman pa pou kapab enplimant son plan e Polisi san zot led avek sipor. Se zot ki permet Gouvernman reste konekte avek son pep.

Prezidan in donn son langazman pou met nou bann

travayer Seselwa an premye. Nou bezwen rekonnèt konpetans e valer nou travayer Seselwa. E atraver bann restriktirasyon ki nouvo Gouvernman pou pe anmennen dan sekter piblik.

Nou lekspektasyon se ki Seselwa i ganny valorize e ki i annan plis enklizivite pou nou bann dimoun, menm si nou bezwen respekte kontribisyon enportan ki bann etranze zot osi zot anmennen.

Sa bann sanzman i sipoze anmenn plis efikasite e latransparans, e par konsekans mwens gaspiyaz dan resours Gouvernman. E pli enportan enstil sa konfidans dan piblik Seselwa vizavi nou servis piblik. Wi, nou pare pou donn nou sekter servis piblik en sans. Si nou fer tour lorizon lo performans Sesel lo diferan lendeks enternasyonal, mon ava dir ki i responsabilite nou servis piblik, an premye lye pou motiv nou lanbisyon Nasyonal pou amelyor nou *standing* lo sa bann *rankings*;

Mr Speaker nou Lendeks Persepsyon Koripsyon, Sesel i 28enm parmi 180 pei.

Lendeks Performans Lanvironnman i 38enm parmi 180 pei.

Lendeks Prosperite 51enm parmi 167 pei.

Lendeks Laliberte Lapres 63enm parmi 180 pei.

Lendeks *Competitiveness Ranking* 76enm parmi 140 pei.

Lendeks *Ease of Doing Business* ki ti annan kontansyon lo la dan Lasanble i 100enm parmi 190pei.

Lendeks pou Meyer Pei Pou Viv Ladan i 123enm parmi 149 pei.

Lo dernyen Lendeks La Demokrazi Sesel pa ganny kategorize.

Malerezman lo labi eroin Sesel dapre en rapor *BBC* an Novanm 2019, i annan plis dimoun ki konsonm sa sibstans dan lemonn par latet dabitin.

Alors eski apartir ozordi travayer servis piblik i kapab pran en desizyon konsyansye e donn Sesel en sans?

Mr Speaker depi premye zour mon konpany pou ganny elekte an 2016. Mon ti dir zabitin Mont Buxton ki mon annan en plan pou sa distrik. I pa enn mon anvi enpoz lo zot. I enn ki nou oblize planifye e devlop ansanm.

Mon ankor anvi zwenn zot lanmwatye semen, pour ki koumsa nou a kapab tras larout kot nou anvi ale ansanm. Sa travay ki nou'n komanse 4an pase pa ankor fini. Depi 2016 ziska la en total pros 50 pti proze in ganny realize dan

distrik pou en sonm anviron R2milyon.

Mon remersye Administrater Distrik Mrs Bernadette Rosalie, ansanm avek son ekip pou zot travay. Malerezman i annan serten proze ki pe tro trennen. Leta lekol La Rosière i reste en gran konsern pou tou paran. Sa proze ti'n sipoze komanse depi 2009. Akoz sa retar ozordi bann zanfan lekol i eparpiye ant Mont Fleuri, St Louis e Bel Ombre.

Nou demann nouvo Minis Ledikasyon Dr Justin Valentin, pou silvouple fer lekol La Rosière vin en proze kapital priyoter.

I annan proze re sirfas semen prensipal Mont Buxton, en promes *SLTA* depi 2017. Apre 4an in plis ki ler pou sa proze materyalize. Mon demann Minis Transpor Mr Anthony Derjaques pou silvouple fer proze vin en priyoter.

Proze lenstalasyon tiyo delo par *PUC* pou rezourd problenm delo koupe tou lazournen dan distrik, i date plis ki 12an. Mon demann Minis Lanvironnman Mr Falvien Joubert pou silvouple konplet sa proze dan en dele letan akseptab.

Zot in antann mwan dan *Question Time* demann ansyen Minis pou lakaz Mrs Pamela

Charlette, lo proze *Social Housing* Mont Signal. Tou resaman mon'n osi kestyonn son sikseser lo proze *Social Housing* Lari Angar.

Sa 2 proze avek sipor Gouvernman Endyen koman 3mil lakaz dan sa prosen 5an, i en kado pou Lepep Seselwa ki ladministrasyon Prezidan Wavel Ramkalawan pou aksepte.

Zabitan Mont Buxton osi a benefisyé. Mon demann Minis Billy Rangasamy pou silvouple asire ki avan 2025 sa proze i materyalize. Silvouple donn zabitan mon distrik en sans pou viv en lavi normal.

Mon felisit bann endividi avek lafanmir ki pe viv byen dan nou kominote, e kapab pas koman bann legzanp pou lezot. Me lo lot kote nou distrik i kontinyen annan son bann defi, bann problemn sosyal parey lapovrete, depandans lo sistenm *welfare*, mank lanplwa, pri komodite ki o.

Dimoun napa landrwa reste, labi lalkol e troub dan vwazinaz pa pou kit nou en pa. Trafik e labi drog i kontinyen gat nou distrik. Anba pon lo glasi, dan brousay, dan kwen laboutik, droger i regroupe. Mon pasyans avek zot tou in fini sape! Mon napa okenn pitye lo

konsekans zot pou sibir an rezilta zot aksyon iresponsab.

Mon zwenn Prezidan Ramkalawan dan son lapel, pou bann ki pe soutir sa vilen vis dan nou pei pou arete! Ki swa ou en Manm fanmir ou en Zofisyé Lalwa. Ler ou vwar dega ki ou pe fer, eski i donn ou en lafyerte sa?

Zis pandan 2020 in annan 145 fwa ki bann endividi miner ziska adilt in ganny fouye avek Zofisyé ANB, an koneksyon avek lofans drog dan Mont Buxton. In annan 15 larestasyon pou posesyon drog e 12 larestasyon pou trafik drog dan Mont Buxton.

Kantmenm sa, problemn i kontinyen, i annan bann lezot konsern Mr Speaker. E nou pa kapab oubliy - nou 14 zabitan ki dan prizon, en total 302 endividi ouswa 10poursan nou popilasyon voter ti anrezistre anba program *URS* lannen pase. 149 zabitan in anrezistre lo program *methadone* avek *APDAR* depi son lansman, e ozordi 73 zot i ankor aktiv. 76 ennler i la, ennler pa la.

La kantite zabitan Mont Buxton ki ganny kek lasistans anba program *ASP* i 719, ouswa en kar nou popilasyon voter. Zot benefis an total i ariv amwen R3.8milyon par mwan;- R3.8milyon par mwan, ouswa

R45milyon par lannen. Se sa leta nou distrik.

Vizyon *LDS* pou Mont Buxton se ki i vin en distrik i viv dan en lanvironnman san presyon e fristrasyon, kot dimoun i ere e partisip plenman e libreman dan lavi nou kominote distrik e pei an zeneral.

Mon donn mon langazman pou kontinyen travay pou tou dimoun, e ede kot mon kapab pou amelyor lavi toulezour. Mon pou fer li avek lonnekte e fransiz. Mon pou touzour dir zot laverite, mon pe dir zot sa aköz *United Seychelles* li in dir piblikman, ki zot pe senpleman fer politik pou ensit nou popilasyon.

Kontrerman avek mon bann koleg dan *LDS* par egzantp Onorab Hoareau, Monthy avek Samynadin zot in fer bann propozisyon serye lo reform san sistenm ledikasyon. Ouswa Onorab Zialor ki'n koz lo reform dan program *URS*.

Onorab Andre ki'n koz lo reform dan *ACCS*, Onorab Mondon in koz lo reform dan lakonpanyen *Air Seychelles*, Onorab Roucou in koz lo reform dan *IEA* e Onorab Bistoquet ki'n fer bann propozisyon vizavi program vaksinasyon.

Ser frer i annan en distenksyon ant ler ou fer kritik

konstriktiv avek letan ou kritike avek letan aköz ou pa kontan. Non! Mon a redir, ler ou propaz laenn. Se sa latitid bokou *MNA* dan Lasanble Nasyonal pou *US* depi Lendi, vizavi Prezidan Larepiblik. Zot annan en laenn personnel kont li serten zot. Sa i malere pou zot laenn i en pwazon nou prop popilasyon ek en kous nou pep ki pov an lespri.

Mr Speaker pou konklir, mon apresye mon'n ganny loportinite e don larepons lo diskour Leta Lanasyon ozordi, koman *MNA* parti mazoriter ki osi o pouvwar. Sa en loportinite ki zabitan Mont Buxton in konfyé mwan atraver en dezyenm manda. Mersi pou zot konfyans. Mersi pou sa loportinite istorik dan reprezantasyon nou distrik dan listwar Lasanble Nasyonal. I premye fwa ki *MNA* i defann son manda dan distrik depi retour miltiparti an '93.

Sel keksoz mon demann zot, se pou kontinyen fer konfyans nou Gouvernman. Nou pou kontinyen travay ansanm pou akonpli sa ki meyer pou nou pei e nou pep.

Ansanm annou fer nou mye pou asire ki lasante, sekirite e byennet sak Seselwa sirtou bann ki pe pas dan dir an se moman i ganny byen pran ka

avek. Ansanm annou lager kont sa pandemik, avek menm viger ki nou pare pou lager kont drog, kriminalite e koripsyon.

Nou pe ganny teste koman en pep e koman en Nasyon. Par devan nou pou annan moman pli dir ankor. Me mon swete ki lespri solidarite avek linite pou sa ritm ki nou tou nou pou mars lo la ansanm akote kanmarad ver lalimyer o fon tinel.

Mon lapel pou sak Seselwa, se annou donn kanmarad en sans. Annou pran swen avek enn a lot. Mon lafwa dan pasyans, rezilyans avek determinasyon ki Seselwa i annan, pou sorti dan sa letan dir i reste for.

Minis Lasante kot lansman konpany vaksinyasyon Nasyonal ti rapel nou, ki Lepep Seselwa in sirviv tantannos, lavaryol, larouzol, laveret, polyo e lafyev zonn parmi bann lezot maladi enfeksyez. Nou pou sirviv COVID-19.

Nou gran pye ti sirviv konsekans ekonomik katastrofik. Premye e dezyenm Lager Mondyal. Nou sirviv koudeta 1977 avek tou son move konsekans ekonomik e personnel. Nou'n sirviv 2 reform makroekonomik, depi retour miltiparti an 2003 e 2008. Nou

pou sirviv konsekans COVID-19.

Annou partaz sa ki nou annan avek bann ki annan mwens ki nou, e bann ki napa nanryen. Sa i le moman pou demontre sa ki bon anndan nou. Sa fardo ki pe repoz lo nou zepol, i kapab fer nou kabose. Me i pa pou kas nou determinasyon pou sirviv e avans devan. Nou pou sorti dan sa adversite koman en Nasyon pli rezilyan e pli for, aköz i le moman pou nou donn en koudmen.

Nou *Creole Spirit* koman bann vre Seselwa pou re bourzonnen aköz la i le moman pou demande ki mannyer mon kapab ede. Demande ki mannyer ou kapab ede.

Mr Speaker dan tousala annou donn kanmarad en sans, ansanm nou pou sirmonte selman ler nou pou valoriz e promouvwar sa 3 valer ki defini nou Prezidan, la demokrasi laliberte e loportinite egal. Mersi pou ekout mwan.

(APPLAUSE)

MR SPEAKER

Mersi Onorab. Onorab Regina Esparon.

HON REGINA ESPARON

Mersi Mr Speaker. Bonn apre midi tou Manm Onorab e tou dimoun a lekout. Sirtou zabitan Glacis ki mon pe reprezante isi dan sa Lasanble. Mersi pou zot konfyans ki zot in met dan mon ankor enn fwa.

Mr Speaker mon pou komans mon lentervansyon lo diskour prononse par Prezidan Wavel Ramkalawan, Prezidan elekte pour Sesel par poz detrwa kestyon.

Eski nou tou nou vreman konpran Leta nou Nasyon e vre leta sa pei Sesel? Apre 43an ki in ganny dirize anba rezim *SPUP/SPPF/Lepep* e la *US*. Kontan pa kontan mon pou dir ki vreman ozordi wi Mr Speaker ou kapab konpar nou pei avek en kales kase!

Mon konnen ki sa mo i fatig zot zorey e fer bokou zot ankoler ki zot in esey defann sa dan tou fason. Mon sel konsolasyon ki mon kapab donn zot, se pour reasir zot ki letan Prezidan in dir ki sete en kales kase, pou zot pa perdi lespwar oubyen ni menm pou esey fer pep Seselwa per e senm konfizyon.

Akoz? I senp. *Father* i en dimoun ki pa zanmen les tonbe Lepep Seselwa, alor boulon par boulon, vis par vis, i pou aranz sa kales e fer sir Lepep Seselwa

i ganny en meyer lavi posib e Gouvernman i fonksyonnen.

Mon profite o konmansman mon entervansyon pou dir mersi, Prezidan Wavel Ramkalawan pou sa lalit ki in anmennen depi 1993. E kot i pa'n zanmen bes lebra. Malgre ki zot in vers son disan inosan dan later Sesel, in kontinyen lite pou delivre nou pei Sesel dan lanmen sa group *Alibaba* ki'n kit kof Leta lo lapay! Kot sa ki ti privilezye in diverti kontan san mazin lavenir sa pep.

Wi *Father* koman en dimoun ki annan tou Seselwa a ker e ki mazin dibyen pou sa pep, mon konnen ki Bondye pou gid ou dan tou desizyon ki ou pran pou byennet sa Nasyon e pou redres nou pei Sesel.

Non pa parey pou pre neserer ki en Manm lo lot kote latab ti dir ki i war lwen. Me selman keksoz ki i pa'n vwar sa kler vwayan se kot i ti pe al ganny defet dan sa eleksyon ki ti vini le 24 Oktob. Ozordi i fer anviron 94 zour depi ki nou pei in ganny en nouvo ladministrasyon.

E nou'n vwar ki deza nou pe bouz dan en bon direksyon. Premyerman i fer premye fwa dan listwar Sesel ki nou Prezidan i donn nou vre detay lo Leta Lanasyon.

I koz fran lo sityasyon ekonomik, me osi lo sa gran divizyon ki'n ganny kree depi 1977. Sa diskour i anmenn en kantite laspe e in fer sorti en kantite sa ki nou apel bann laverite fermal, ki pa fasil pour tou dimoun dizere, espesyalman zot lo lot kote latab.

E la mon ti a kontan ki serten i fer sa ki zot ti pe fer pou esey ganny vot, pou ede soulaz bann sor bann dimoun. Par egzanp *CC Member* pou Anse Etoile devret pe komans donn *breakfast* kot bis *APDAR* dan bomaten. Avan eleksyon i ti laba e apre ki in ganny bate in sove e i zis plennyen! Sa i ti en bon linisyativ ki ti ava'n kapab kontinyen Onorab. Pa taye!

Letan Prezidan i koz lo linite, respe e responsabilite, i fer nou rapel ki mannyer nou pti pei Sesel ti ete avan. E sa i fer mon mazin sa sanson John Wirtz ki dir, "Botan, botan in fini ale."

Mr Speaker be mon konvenki ki anba direksyon Prezidan Ramkalawan, mon garanti ou ki botan, botan pa pou perdi pou touzour. I pou retournen, e sa pep pou reganny sa zwa de viv parey i ti eye lontan avan koudeta.

Mon asire ki bokou nou, nou ankor mazine ki mannyer

nou ti vremen debourye nwit o zour. Lev granmaten pou al rod nou dipen parey Prezidan in fer nou mazine. Me pandan sa dernyen 43an nou pep in ganny oprese, in soufer, in ganny viktimize in viv anba lafreder, zot in senm laterer! Dimoun in al egzile aletranze! Dimoun in disparet! dimoun in ganny touye, e nou'n menm perdi direksyon.

Zot ti pe mazin zis zot lekor e anrisir zot lo lasyer sa enn ki pli feb, e nepli pran kont si zot frer ek ser i dan bezwen. Si li i ti pe byen pase, se tou ki konte. Sa ki koz lo bef dan disab i konn byen akoz. Se sa kalite politik ki zot ti pe pratike e apre zot vin anbet nou avek zafer met dimoun lo sant devlopman, kan zot pe konn zis zot prop lekor.

Nou Prezidan in koz for lo linite e mon siport li, akoz i sel fason pou nou bouz devan koman en pei an antye. I enportan ki nou tou nou travay ver menm bi avek lespri pou re devlop nou pei dan latransparans e re enkilke dan nou pep bann bon valer moral tel ki lonnekte, bann bon savwar viv, tolerans, responsabilite e respe.

Se kan nou annan respe pour kanmarad, respe pour striktir Leta, respe pour la

demokrasi e ki nou les nou ganny dirize par Lalwa, ki nou ava pe bouz dan bon direksyon avek en lespri pozitiv.

Mr Speaker letan mon lo sa size respe, i bon fer resorti ki dan sa detrwa zour ki'n pase, nou'n osi war tou sa bann mannev lo kote Lopoziyon pou senm laterer ek diviz sa pep, e pou kontinyen kree konfizyon parmi la popilasyon.

Bann mantalite malis pou met retar progre e pran tou loportinite pou anmenn bann kritik ki negativ e destriktif. Nou'n war *press release* ki pa'n sinyen, *Press Conference* kot zot in konfize e ridikil zot prop lekor e sa detrwa siporter ki i reste zot pe riy zot akoz zot in fini vin en fars.

Comme dir Dr Gedeon si ou nanryen fer pa bezwen fer naryen. Sa i montre ou ki i vremen difisil pou parti sortan aksepte ki zot in perdi sa eleksyon, e se en nouvo Gouvernman ki pou tou Seselwa ki la o pouvwar, ki zot pou bezwen respekte e viv avek pou sa prosen 5an.

I enportan ki zot pran zot responsabilite koman sa Lopoziyon e pa vin senm laterer, oubyen anvoy mesaz konfizyon pou diviz sa pep. Letan divizyon ek negativite in fini. E pou nou rekonstri sa pei

e re aranz sa kales kase, nou bezwen pe get pli devan ansanm avek en vizyon pozitiv pou lavenir.

Mr Speaker annou pran sa size lanplwa en travayer etranze, en size ki Prezidan in adrese dan son diskour. Letan mon pe koz lo lanplwa ozordi parmi bann *civil servant*, i annan ki pran zot louvraz aker, ki devoue fer zot travay mars byen.

Pou sa bann dimoun mon dir felisitasyon, la mon mazin bann ners e lezot travayer Lasante, Lapolis, *SPDF* e lezot ki pe donn tou dan sa sityasyon difisil. E nou dir zot kontinyen dan sa bon direksyon. Mon tir mon sapo ek zot.

Me de lot kote i annan dimoun ki pe kale zis pou zot ranpli zot zournen, avek diferan bi. E enn zot bi se pour met retar sa nouvo Gouvernman.

Pou zot se zis sa lapey lafen dimwan ki enteres zot. Malgre ki zot pa pe delivre. I annan ki kontinyen pran direktiv ek *Maison Du Peuple*, an krwayan ki zot ankor annan pouvwar dirize, e zot rod tou mannev pou fer en dimoun fristre.

Mon konsey pou zot se arete! Akoz nou annan nou en Prezidan ki son non milye i 'Determinasyon', 'Antete' e 'Pa

Les Tonbe' e nou konn sa tre byen!

(APPLAUSE)

HON REGINA ESPARON

Mr Speaker sa i pa zis pou travayer ki dan kad pli ba, me i osi bann ki pe okip bann o plas ziska nivo *CEO* e Depite enkli detrwa Sekreter Prensipal ki pe kontinyen fer dimoun vir an ron e met retar dan bann Minister.

Mon konsey pou zot se ki zot bezwen pran zot en desizyon - swa zot delivre, swa zot *save* la plas pou en lot dimoun ki anvri travay!

Mr Speaker les mwan sit 3 legzanp, ou anvoy en let kot en *PS* pou demann leklersisman lo ka en zabitan. Annefe detrwa *email*, apre en semenn napa larepons ni note ki in resevwar, ou anvoy en *reminder* sa let i dir ou i pa'n ganny ou let.

Selman i dir ou anvoy limero kontak ek *email* sa dimoun i ava anvoy larepons direkteman kot sa dimoun. I pa enterese kominik avek mwan en *MNA* Elekte ki pe *liaise* avek li ki pe ed en zabitan mon distrik. I plito rod tou kalite leskiz e kre loportinite pou fer bann lerer.

Nou kapab pa kontan sa dimoun ki'n anvoy nou sa korespondan. Nou en *civil servant* nou, ki pe travay ki

ganny peye ek larzan taks ki Seselwa in trimouse.

Annou omwen ed sa kliyan e rod fason pou resours son problem e retir son fristrasyon. I annan tro bokou leskiz. Mr Speaker sabotaz ki pe arive dan bann Minister i montre ki degre mekontantman sa bann dimoun i ete.

En konsey pou bann Minis, ouver zot lizye e reste vizilan, akoz i annan bokou sa bann ki'n ganny andoktrinen dan sistenm lepase, i la zis pou sabotaz e mon asire ki i annan bokou ki'n ganny dekouver.

Special Adviser, Direkter e lezot. Bokou zot ki ti pe servi *asset* Gouvernman dan letan konpany, zot parti in partaz sepa konbyen milyon pou zot sey aste vot.

La i fer mwan mazin bann senaryo dan distrik Glacis, kot zot vol zot prop lekor, lager larzan antre zot, e apre i annan lodas vin servi *asset* piblik pou plezir personnel. I annan ki pa ankor realize ki letan donn bal in fini! Lakord gitar in kase, lakord mandolin in kase depi le 25 Oktob. Alor serye zot en pe!

En *CEO* dan en departman ki ti piblikman montre son lapartenans politik, ki depi eleksyon akoz son Parti in perdi, i kontinyen viktimiz bann *staff* ki travay par anba li

plis ki avan. E in menm annan *staff* ki pe pas zot letan plere dan louvraz, akoz lafason ki zot pe ganny trete.

Koripsyon pe ronz sa departman, e li sa *CEO* i pe menas *staff* pou reste trankil. Travayer pa'n ganny Trezyenm Mwan Saler, li in pran pou li e i dir zot si zot pa kontan laport i ouver zot kapab ale.

I tris Mr Speaker, pou war sa bann kalite latitud sorti kot *civil servant* ki o plase dan departman. E mwan mon pou dir ki se li sa *CEO* ki bezwen ale, si i pa kapab sanz son *mindset* e aksepte ki dan sa nouvo Gouvernman, dan sa nouvo ladministrasyon napa plas pou san ban kalite konportman!

I neserer ki i annan en transformasyon dan latitud, e i annan plis responsabilite anver nou louvraz, e respe pou sa biro ek pozisyon ki nou okipe.

Latitud i bezwen sanze akoz dan sa nouvo ladministrasyon dirize par Prezidan Wavel Ramkalawan, napa plas pou kale. Nepli sa lepok kot ou vin zis ranpli ou zournen. Nou pa pou soutire Mr Speaker.

Mon lev mon lavwa pou dir zanfan Seselwa pran ou responsabilite, travay dir e delivre. Retir lanmertim. Retir rankin anver kanmarad dan

travay! Aret fer lavi zot prosen malere e pli enportan parey Prezidan in dir tir politik dan travay, e travay drwat dan tout lonnekte pou fer nou pei Sesel avans devan.

En lot keksoz ki Prezidan in mansyonnen dan son diskour ki'n enspir mwan, se sa zafer travayer etranze. I vre ki i annan environ 15mil travayer etranze ki lo *GOP*, e sa sete ansyen Minis pou Lanplwa ki ti dir nou dan sizyenm Lasanble. E deswit la ek sa letan difisil, nou ti'n kapab ranplas en bon pe sa bann travayer ek Seselwa.

Wi nou bezwen travayer etranze ki nou napa, be omwen ti ava annan en Seselwa pou *understudy* dan sa pozisyon. Ki pli tar omwen sa *forex* ki zot pe retourn avek, oubyen pe anvoy dan zot pei ti ava reste dan nou lekonomi.

E bann benefis ki sa aletranz pe gannnen, parey lakaz, loto, Seselwa osi ti a kapab benefisy avek. Sa ti pou en *incentive* pou nou dimoun ki ti ava ankouraz li pou reste dan son louvraz.

Ozordi Mr Speaker dan bann lotel ki annan travayer etranze dan *top management*, Seselwa ki travay anba zot touzour i, zot touzour pe konplent ki promosyon in ganny favorize pou etranze. E

zot ki travay dan bann pozisyon pli ba, zot lavi i vin en kosmar. Zot menm ki ganny *warning* pou nanryen ditou e zot menm ki lapey i reste pli ba vizavi sa etranze.

E sa dan li menm pa anmenn gran lankourazman, e li sa etranze manner i pe byen pase li menm ki ganny lakaz, li menm ki ganny loto, li menm ki ganny drayver e i pa pou zanmen pou le ki en Seselwa i benefisye parey li! Kot i kapab saroy you son fanmir enn par enn pou vin pran plas ki en Seselwa ti ava kapab okipe, i pou fer li.

Mon leker i fermal ler mon tan tro bokou zenn sorti *Shannon College* ek en degre pe ganny en latet fermal pou ganny en louvraz. Lannen ale, lannen vini menm zafer.

Lontan zot dir nou ti napa en zenn kalifye dapre zot. Me la nou'n gannyen zot pa servi. Zot kontinyen donn etranze bann pozisyon *top manager* e kit nou bann Seselwa ater.

Mwan osi mon rekonnet abilite Seselwa, espesyalman bann zenn e mon krwar dan merit. Parey Prezidan in dir i annan Seselwa ki napa sa kantite papye Sertifika Diplonm, Degre eksetera. Nenki i travay egalman byen parey sa enn ki annan tou grad lo papye,

e zot osi fodre pa ki zot ganny favorize pou kit deryer.

Fodre zot osi zot ganny menm loportinite! Pa fer dimoun vin *interview* pou ou dir li i napa leksperyans e pa ganny sans pou devlope e ganny en lanplwa. Ki manner i pou ganny leksperyans si ou pa pe, si i pa ganny sa sans e loportinite pou menm komanse?

Parkont mon byen akeyir sa ki Prezidan in dir konsernan sa bann mezir ki pou al ganny enplimante, ki ava adres sa bann problem enn fwa pour tou, ki'n ronz nou sosyete. Nou bezwen donn priyorite nou Seselwa. Kekfwa ozordi sa zenn fiy ava antre koman en *receptionist*.

E lekel ki dir ou ki demen i pa ava vin en *manager*? Annou donn nou lazenes sa lelan pou avans devan. Met divan anba lezel Seselwa e nou a gete li zistans i kapab anvole. En parol ki nou Prezidan ti kontan dir nou isi menm dan sa Lasanble.

Mr Speaker annou get en kou *Air Seychelles*. An pasan Prezidan in dir nou diskite kwa ki ti a pli bon desizyon lo restriktirasyon *Air Seychelles*.

Ler mon koz ek detrwa dimoun dan mon distrik, zot sizesyon se ki si Gouvernman i

tonm lo en konklizyon ki *Air Seychelles* i fer zis larout domestik, pour ki i rantab, zot bezwen ouver plis larout lo nou bann zil. Pou atrakte plis touris e osi Seselwa a kapab ganny sans eksplor nou bann zil. Pour sa arive Mr Speaker i nesese ki *IDC* i ganny restriktire.

Dezyenmman i annan ki dir privatiz *Air Seychelles* e les Seselwa ki anvi aste *shares* aste, en pe parey i ti fer ek *SACOS*. Tousala i bann sizesyon par bann dimoun ki pa anvi war ki nou *national airline* i fermen. Loportinite lopinyon i divers, an menm tan ki zot konpran ki sityasyon ki pei ki ladan Mr Speaker.

I osi annan en zenn ki dir ki li i konpran sa nesese, pou nou tou regard sityasyon pei dan en fason realis espesyalman lo size *Air Seychelles*, i dir mwan;

“MNA Prezidan pa'n dir ferm *Air Seychelles* li, me premyerman in dir ki si fodre re aziste pou fer marse nou pou bezwen fer li. E apre sa in demann avek Lasanble ek Lepep Seselwa pou fer en refleksyon.” I azoute poudir ki olye fer sa refleksyon bokou dan Lopozisyon in fini komans senm zis konfizyon parey bann profet ki anons zis move nouvel.

Mr Speaker Prezidan Ramkalawan pa ankor ni menm ganny 3 mwan dan Gouvernman e deza in fer en kantite pou sa pei. Zis lo nivo Lasante ozordi dimoun La Digue in war teren kot nouvo lopital pou ganny fer, pe klersi.

In ganny don pou konstrir Lopital. Gouvernman in osi fer sa bann lekonomi swivan;

4milyon lo Beau-Vallon Bay, 4.8milyon pou Lopital Anse Royale, preski 4milyon pou latant ki ti pe ganny abize. In debourye anmenn vaksen kont *COVID-19* Sesel kot tou dimoun pe ganny li gratwitman.

In kree Fon *COVID* ki dimoun pe volonterman kontribye ladan. Ozordi dan lemonn nou dezyenm kot i konsern donn vaksen e byento nou pou No.1.

Bann proze devlopman pe materyalize, lenvestiser pe vin dan nou pei e byento nou pou konstrir en Lekol Lasante e sant izolasyon.

Mon kapab kontinyen avek, mon kapab kontinyen akoz lalis i long. Tousala dan zis 3 mwan, alor met pare pou war kwa ki i pou fer dan sa 5an pou Sesel e pour tou Seselwa. La mon anvi dir avek Seselwa ki zot ki ti *tick* anler zot ti annan rezon! *Watch out* dek ki sa pandemik i larg nou.

Mr Speaker les mwan get en kou mon distrik. Mon kapab dir ki ozordi sa responsabilite ki nou koman *MNA* nou annan, i pez pli lour lo nou ki zanmen.

Mon'n realize ki nou rol i esansyel dan sa moman, pou nou kapab ed nou Gouvernman al devan e menm an menm tan tenir nou bann zabitan. Bann mezir ki Prezidan in anonse, ki nou pou bezwen fer li an menm tan en kantite konsern e mwan menm dir lafreyer pou parmi zabitan.

Dan lepase nou'n kapab fer komanter lo *SONA* avek tou lenformasyon ki nou ti bezwen, akoz zot ti'n annan en Bidze ki ti'n fini aprouve. Me sa fwasi sa i pa'n posib alor sa i limit en pe nou refleksyon.

Mr Speaker dan mon distrik, i annan en gro kous zabitan ki'n benefisye atraver diferan form benefis sosyal. An menm tan ki mon aplodi en nesesite annan en sistenm sosyal ki soutenab, e ki nou retir sa labi kronik ki'n egziste dan lepase, mon osi anv'i fer lapel ki nou gard nou sans iminite dan sa travay, e ki sa bann *civil servant* ki bezwen fer sa travay i fre li dan en fason drwat.

Prensip i senp, sosyete i siport sa bann ki dan bezwen, me sa ki kapab i bezwen travay

e donn koudmen, aret abize leve debourye. Parfwa mon demande si zot pa kanmi ler zot war sa ki pli aze, pe leve pe al travay e zot zenn ki ankor annan for kouraz zot pe fer laliny kot sosyal pou ganny lasistans.

Napa nanryen pou bann *carers* enkyet, travay ki zot pe fer i byen ganny apresye. Me sa ki fodre koupe se labi. E la mon fer en lapel ek s pansyoner ki kapab debourye pou li osi donn en koudmen. Mon demande ki Departman Lanplwa i zve son rol byen pou ankadre sa bann dimoun ki travay e ofer zot *reskilling*, e ed zot trouv en lot lanplwa e la mon repet lapel Prezidan.

Mr Speaker en lot keksoz ki fer mon leker fermal, letan nou lo sa zafer *carer* se lafason ki nou bann dimoun aze i ganny trete parfwa. I annan *carers* ki devoue e travay byen, me i ankor annan bann dimoun aze ki pe ganny maltrete.

E la mon ti a demande ki servis sosyal i annan plis sipervizyon. E lo kote *Regional Home for the Elderly* North East Point. Mon ti a demande ki Minister Lasante e *Council for The Elderly* i regard byen ki fason serten pasyan pe ganny terete e maltrete dan sa lenstitisyon.

Sirtou la dan sa letan kot i annan restriksyon e fanmir pa pe ganny akse ek zot dimoun aze. Mon bann ser ek frer, annou pran loportinite ki vin devan nou. Nepli tan pou swazir louvraz ozordi. Met devan nou ki byennet nou fanmir i nou prop responsabilite.

Nou'n ganny ledikasyon, nou annan lasante, alors servi sa baz pou nou progresse e pa zis esper kanmarad toultan pou atrap nou lanmen.

Travay pa'n zanmen touy dimoun. O kontrer i donn nou sa dignite. Koman sa *MNA* ki'n toultan koz lo byennet lafanmir, mon osi konsernen lo size bann zanfan ki dan bann diferan fwaye.

Mon konnen ki avan ki en zanfan i ganny met dan enn sa bann *Homes*, i annan en gran prosedir e fodre ki a tou moman byennet e proteksyon sa zanfan i reste nou priyorite. Mon repet parol Prezidan, si ou pa ankor pare pou sonny en zanfan pa met li omonn silvouple. Kontraseptiv i don pou naryen, servi. Sa ki annan son zanfan pran son responsabilite. Me kot sa pti inosan i an danze, nou koman en pep, koman en Gouvernman responsab, nou bezwen kapab entervenir pou son byennet.

Sityasyon pei i anmenn nou dan en moman difisil, nou lavi pou dir sa bann mwan ki pe vini. Me parey Prezidan in dir nou, linite i nou pli gran lafors, napa de kalite linite. Napa enn parmi Lopozisyon e enn parmi sa ki siport Gouvernman. Nou pou en sel pep, e sanmenm nou apresye sa lapel pou tou dimoun.

Mwan mon la pou tou zabitan Glacis, pe enport kouler, ran, ras kalite e afilyasyon. Mwan ek mon lofis nou la pou ou, pou ekoute e ede donn ou gidans e fer sa ki nou kapab. Me nou pa pou kapab fer li nou tousel. I pou bezwen en zefor kolektiv, se sa ki pou tir en nou ladan.

Mon fer en lapel avek zabitan mon zoli distrik pou ekoute e obzerv bann Lalwa e regilasyon ki'n met an plas, pou protez nou kont *COVID*. Annou pa esper maler ariv kot nou, dan nou fanmir avan nou fer li. Met nou mas, aret pas letan obor semen, obor laboutik toulezour. Annou montre respe e siport kanmarad.

Mr Speaker sityasyon drog dan nou pei e pli prensipalman dan mon distrik i remarkab ki ozordi biznes drog dan Glacis in ogmante. E nou pe war bann *black spot* ki de zour an zour pe vin pli evidan. Malgre tou zefor

fer par bann zabitan ki pe raport ek Lapolis napa gran aksyon pou redwir sa bann labi.

I annan landrwa ki parey kot Dokter sakenn son ler e zot ganny demande pou met zot mask ler zot vin pran zot doz. Tou dimoun i konnen lekel, lotorite i konnen me naryen pa ganny fer, prezan ki biznes i grosi.

La mon pe ganny zoure an se moman la Mr Speaker, *ok* mon zorey i soufle. Mon pa konpran ki manner en landrwa pe vann drog pou plis ki 10an e rapor parti rapor, nanryen pa ganny fer.

Kantmenm gard i vini napa solisyon e la mon senpatiz ek bann zabitan lo vilaz North East Point ki pe soufer ek sa bann droger.

Avan ti annan zis en *dealer*, be la i annan pli bokou *outlet*. Sa ki vann lo moter sa ki vann dan loto sa ki vann dan lakaz, sa ki vann dan lapay, deryer laboutik, anba *bus stop* partou. I vreman degoutan in vin en kosmar Mr Speaker!

E mon kontan ler Prezidan in dir gara zot bann ki pe travay malonnet. Parski i kontinyen annan koripsyon kot *ANB* ki pe met retar dan sa lalit kont drog. Parfwa mon demande ki manner tou dimoun i konnen kote drog i vann zis *ANB* ki fer

krwar zot pa konnen oubyen akoz zot, zot osi zot konplis dan sa biznes prezan zot pa kapab aret zot prop asosye. Mon poz sa la.

Mr Speaker pou konklir, letan mon pe ariv lo mon konklizyon, mon realize ki sa lannen ki devan nou i enn ki demann bokou sakrifis pou nou kapab navig dan sa movetan ek lespwar ki diran lannen tanpet a kalme.

Malgre ki serten nou popilasyon i konfize ek mesaz ki Lopozisyon pe senmen lo size vaksen. Aret ekout sa bann fo profet ki dir vaksen pa bon, *lockdown* e pandan *lockdown* donn vaksen. Ki vaksen zot pe anmennen? Sa enn ki pe prodwir anler La Rivière Anglaise?

Annou ekout bann profesyonnel lasante ki konnen ki zot pe dir. Ekout Minis Vidot, ekout Dr Gedeon ek Dr Louange e Lekip Lasante profesyonnel silvouple. Mon konsey pou ou ki pa ankor deside pou al pran se mazin ou lekor, mazin ou fanmir e mazin ou lasante avan ekout bann mesaz negativ sorti kot bann nanryen fer! Ou lasante i ou responsabilite pran ou vaksen avan i tro tar.

Mr Speaker i bon fer remarke ki an 2008 letan nou pei ti pas atraver reform makro

ekonomik touris ti ankor pe vin dan nou pei e lekonomi ti kapab aranze fasilman. Ozordi napa sours ki pe ranpli danm, me nou annan lespwar ki Sesel i dan bon lanmen.

Annou ansanm, nou annan annou en vre Kaptenn ki apel Prezidan Wavel Ramkalawan ki kapab navig dan sa movetan. *Father* i la dan nou kote, mon swet tou Seselwa e zabitan Glacis kouraz dan sa moman difisil. Ki Bondye i touzour beni nou pti pei Sesel e annou kontinyen viv par lafwa e sa gro nyaz nwar i ava disparet! Mersi Mr Speaker.

(APPLAUSE)

MR SPEAKER

Mersi Onorab. Nou a pran en poz la nou an rezwenn 4er.

(BREAK)

MR SPEAKER

Mon aport a zot latansyon ki Madanm Deputy in sirkil en *Revised Order Paper*. Zot in devret ganny li lo zot *email*, kantmenm zot pa'n ganny li an papye. Nou a kontinyen repons lo SONA avek Onorab Francois Adelaide.

HON FRANCOIS ADELAIDE

Bonn apre midi Mr Speaker, bonn apre midi tou Manm Onorab. E mersi bokou Mr Speaker pou donn mwan en pti sans pou mon osi kapab debat en pe lo diskour Leta Lanasyon.

Mr Speaker mon pran laparol ozordi, pou mon osi fer en analiz lo diskour Prezidan Ramkalawan vizavi Leta Lanasyon Seselwa.

I dabor enportan ki sakenn de nou i konnen akoz i enportan pou nou fer en tel analiz e sa diskour ki i devret kouver. Nou'n tann diferan topik ki'n monte e bann Manm in fer zot prop analiz.

E parfwa zot in site ki Prezidan pa'n abord sa bann size. Wi i normal pou nou tou annan diferan lenterpretasyon.

Be mwan mon konstate ki Prezidan, lanmod Angle *in a nutshell* koz lo bann servis ki vreman en konsern e preokipasyon son ladministrasyon. E ki atraver konsantre lo bann topik, sa i a ede pou ekspoz bann, bokou bann defi e fer amelyore leta nou Nasyon.

Mon panse ki Prezidan in prefere kit bann domenn tel ki lagrikiltir, lapes, ledikasyon, biznes transpor e lezot akoz i annan tout konfidans ki in

apwent bann Minis byen kalifye, konpetan, ki pe fer bann travay formidab, pou zot adres bann tel topik dan en fason pli konpreansiv, pou ki vremen Seselwa i ava war sa vre sanzman dan lafason Gouvernman i fonksyonnen. E sa i a souliny nou bann bon lentansyon pou transform Sesel, dan en pei kot servis piblik i vin pli efikas.

Birokrasi ava ganny minimize, travayer Gouvernman ava konnen ki zot kliyan i ekspekte de zot, pou ki zot vremen delivre, redwir fristrasyon e lenkonvenyans. Mwan mon konnen ki sa lekip Minis ki pe travay avek Prezidan, i en lekip serye ki annan tou sa abilite pou reakte, pran desizyon e delivre selon lekspektasyon son pep.

Mr Speaker zis pou *substantiate* sa largiman, mon'n ganny sans al lo teren avek 2 Minis tou dernyerman. Sa i konpri Minis Ferrari e Minis Joubert.

E mon'n trouve pou waon menm ki lo kote partisipasyon, enteraksyon e pran desizyon, zot tou lede zot kapab. Sa i bann siny lankourazman, ki pou sirman soulaz nou bann Seselwa ki parfwa santi zot perdi, menm fristre.

Akoz zot pa kapab ganny en bon desizyon, swa konsey. 4 gran lir Prezidan Ramkalawan, se ki ler ou debat zot o profon, ou a kapab konstate i se 4 pwen kardinal lo konpa, ki pou sirman donn nou en direksyon kler lo kote, swa ki pozisyon nou ete an se moman.

Kote e ki pozisyon nou oule ale. Ki bor nou pou pase pou nou ariv kot nou oule ale. E kote nou pa devret pase pou nou kapab ariv lo semen progre e prosperite.

Kot Seselwa avan ankor enn fwa, vremen viv preanbil son Konstitisyon. Kot Seselwa ava ankor enn fwa ganny sans, vre sans lapartenans san bezwen per ki pou ariv li demenler i fer son swa ki li i anvi. Kot Seselwa i ava santi li kapab erit tou sa ki i merite san bezwen depan lo okenn politisyen, swa okenn lo group, ke se swa pou okenn faver lapreferans, promes zis pou li kapab bouze e ganny sa ki i merite.

Wi Mr Speaker, premye parol ki vin dan mon latet, se sa slogan "Seselwa touzour premye." E nou Prezidan in fer nou konpran poudir nou bezwen komanse avek Seselwa premye.

Wi mon bann ser e frer, sa i sirman le vre pwen depar. Kontan e apresye ou lekor,

konn ou potansyel avek ou forte, e konnen ki ou lanbisyon e ki ou anvi akonplir koman en endividi i bann pwen ki vreman enportan pou en endividi.

Si Prezidan Ramkalawan in kapab analiz sa, i pronons li lo la, Mr Speaker, eski sa se pa en mesaz lespwar pou nou? Ki dezormen, nou pou fer sir ki Seselwa i ganny rekonnet dan son prop pei e o premye ganny tou loportinite pou devlope, e preferans lo okenn etranze.

Sa ti en promes dan nou konpanyan depi menm avan ki mon ti ganny nominen koman reprezantan pou Baie Lazare an 2016. E Prezidan pa'n bliye.

Kontrerman avek parti *SPPF/US*, ki atraver son *prononcement* touristik, 'You First', mon krwar zot a kapab mazin en bon pe letan pase e in kontinyen, kot zot ti fer piblisite deor e ti dir Seselwa e fors zot pou dir ki etranze zot devret pas premye.

Ki se zot ki premye dan nou pei e se nou Seselwa nou aksepte dezyenm plas. E nou aksepte vin zot serviter e sa in kontinyen ziska prezan. E sa in la baz bokou nou problem, kot nou kontinyen vwar nou vin sitwayen trwazyenm klas dan nou prop pei. Wi Mr Speaker, menm etranze ki pli mizer ki nou, ki pli vilnerab ki nou, in

apran e zot in kontinyen swete ki nou Seselwa nou reste zot soubalturn.

Zis ekout bann konsern e konplent, kot bann lotel e ou a ganny en lide lo ki mon pe dir. Seselwa pe montre travayer etranze, me se etranze ki ansarz.

Se etranze ki ganny pli bokou larzan e pli bon *package*. Vwala Leta nou Nasyon anba Gouvernman sortan ki serten *MNA* lot kote latab pe defann, e ki zot pa onte pou tap lanmen lo zot lestoman e dir san okenn lakanmizri "ki se zot ki'n lager e ki pe kontinyen lager pou defann zentere Seselwa!"

Ler Prezidan in fer referans avek en kales kase, Lopozisyon i ankoler. Akoz, se Prezidan Ramkalawan ki'n dir. Nou konnen zot pa kontan li e zot pou ankoler avek tou parol ki i pou dir. Depi 1977 ziska la, ziska 2020 i fer preski 43an depi ler zot ti pran pouvwar.

E mon'n menm tann en Onorab dir ki i pa konnen ki sa vedir en kales. Pli move i pa konnen ki savedir en kales kase. Be ki ou ti pe eksplike si ou pa konnen ki savedir en kales kase?

(APPLAUSE)

HON FRANCOIS ADELAIDE

Mr Speaker ki savedir en kales? Mwan dan mon pwennvi en kales set en keksoz ki vremen enportan. E pa tou dimoun ki kapab *afford* en kales. Se en privez pou annan enn. Be pou ou annan 1 ki kase, Mr Speaker, i pa akseptab. Sa dikton i fer ou konpran ki dan legzistans Sesel i date depi bokou lannen.

Menm si i sitan aze, sa pa en rezon pou abandonn li dan en tel fason, zis parey zot in fer pandan sa dernyen 43an. I tro presye. i tro presye e briz leker pou ou tande e trouv li dan sa degenn. Eski Seselwa zot pa sagren ler zot konnen ki Sesel e Seselwa nou ti prosede. Nou'n toultan annan konfyans ki nou pei e nou lekonomi i solid. Me ler movetan i tap nou, nou optimis ki nou sakrifis ava soutenir nou.

Me kan an realite nou kof in ganny demantibile e nou larzan in ganny gaspiye. Ki manner nou santi nou? "Sesel i pli gran ki nou tou," pou US sa ti zot lapriyer. Eski zot vremen fer sa ki zot ti'n prese? Ozordi mon krwar sa parol in trangle zot. E 1 antre zot pa'n oze e mazine ki ti zot vokasyon.

Wi Mr Speaker, sa ti zot baravan pou ki zot kontinyen vole, gaspiye e menm fer fize.

Eski ler ou, ou fer sa bann ran deklarasyon ki ou kontan Sesel, swa ki Sesel i pli gran ki ou e valoriz travay dir ou menm pas deryer e vol en loto e fer krwar ou ti pe al peye si nou pa ti'n dekouver ou?

Si Sesel i pli gran ki nou e nou kontan Sesel, eski ou misouk e diverti kontan dan son bann larises, san pran kont ki se en Nasyon antye ki pou soufer par ou negligans e ou aksyon endisiplin?

Eski i telman difisil pou nou konnen, si en Gouvernman pe pran swen avek son pep e son pei, ouswa si i pe abiz son pep ek son pei? Annou vin realistik mon bann frer ek ser. Nou bezwen onnet e fran. Ler i byen nou bezwen aksepte i byen. Letan i mal nou bezwen dir i mal. En Onorab in oule fer nou krwar ki dan kof ki *ex* Prezidan ti kite, ti reste plis ki \$500milyon.

Sa i fo, si larzan ti'n reste, si larzan ti'n reste *State House*, ni en Roupi, ni en *cash* nou pa ti pou trouve! Zis parey sa 88 loto ki'n disparet. Nou'n tann Prezidan dir ki en zour ler tranzaksyon ti'n fini pou lazournen, zot ti dan plis ki – plis ki R140milyon. Ki vedir en larzan envizib. An dot mo en det.

Dan mon analiz, mon'n fer referans avek en sanson ki *US* pa'n zanmen mank lokazyon pou sante, e lanmod koze, tou nou mesaz ti dan sa sanson. Me nou ki pa'n port latansyon lo zot bann Mosyon.

Sa sanson i, "Ar wi Sesel o mon Sesel, mon ava apiy ou pou ou pa tonbe!" Wi Mr Speaker, zanmen in deza zot lentansyon pou sa Gouvernman ki'n fek kit pouvwar, pou pran swen avek Sesel.

Ler larou kales ti kase, zot apiye dan plas boulonnen! Ler laport kales i kase, zot apiye dan plas repare! E tou bann lezot keksoz zot zis apiye pou li pa tonbe. Kan ofet zot devret repare.

Eski nou pei i parey en pye bannann kot nou bezwen apiy li pou li pa tonbe? Swa nou bezwen travay for pou kontinyen fer li progresse? Se sa la realite ki zot pa oule aksepte.

Kontan, pa kontan, *walk out, boycott*, fer Konferans De Pres, siny petisyon, fer tou sa ki zot anvi, zot pou bezwen ekoute e aksepte ki nou pou dir zot mannyer keksoz i ete, e nou pa pou kasyet nanryen!

Si zot pa kontan, lanmod zot Prezidan, avan ti dir, bato i pase, avyon i pase, gete zot menm. Mon konsey pou zot se ki profite, sa enn de zot ki reste

pou aprann ekoute, aprann e partisip avek nou mannyer pou transform sa pei.

La mon ganny enformen ki i annan en lager dan zot parti e byento *US* i kapab kas an 2. E *Leader* i kapab vwar li savire. Profite, aprann la diplomasi, retir sa bann lesPRI diktater ouswa teroris ki pe provok *incitement* ki kapab tre danzere pou pei.

Prezidan in koz lo lentansyon en *incitement*. Wi Mr Speaker, ozordi Onorab Loze in konfirman. Mon bezwen dir avek nou ladministrasyon, pran tou *threat* o serye. E mon pe espere ki i kapab sorti dan Lasanble, deor Lasanble e fer sa menm *pronouncement*. Akoz i konnen poudir la i annan iminite. Nou pe esper ou mon frer, fer sa komanter deor.

Mr Speaker tou lendikasyon i montre ki Lopozisyon i anvi vwar dezord dan pei. Nou tou nou kapab trouve ki enn zot azan in piblikman ekrir lo rezo sosyal e demann bann solda pou revolte.

Akoz zot ti pe spekile ki Gouvernman *LDS* pe fer lapliferans dan Lafors Defans. Mr Speaker sa i serye e nou pa kapab zis frenm lizye lo sa bann keksoz koumsa.

Mr Speaker sa sityasyon *COVID* zot in fer tou kalite trik mardaz zis pou senm konfizyon e anmenn lensertitid dan pei. Zot in kestyonn larive vaksen. Akoz pa ti espere? Menm ler nou Prezidan in met son prop lavi a risk, son prop lasante a risk pou li al deor e fer demars pou nou ganny sa donasyon.

Zot sitan dan en lespri demonik ki zot pa kapab konpran ki ler nou napa larzan ni en sereng, ni en vaksen nou pa pou kapab aste. E ler nou ganny en donasyon, akoz zot oule dir nou pa pran konmela.

Me nou, nou okouran ki fer pou bate ler i ankor so. E nou pa bezwen zot gidans pou nou fer sa ki byen pou nou pep. Seselwa i devret ganny met okouran, tou sa bann letalaz ki zot ti pe fer konmkwa zot pa ti ganny enformen, zot pa pou vin pran vaksen.

Kan ofet zot ti pas anba, anba e al pran zot vaksen, menm avan bann Seselwa ti komans gannyen. Sa i en fe e zot pou bezwen aksepte. Mr Speaker leta lespri nou bann zenn *MNA* dan Lopoziyon o sagrin mwan.

Ler ou gete ki menm teknik pe ganny adopte ozordi, zis parey sa bann lanperer ki swete ki zis zot ki kapab e konn dirize. Oparavan zot ti servi

dimoun vilnerab pou egzekit zot bann plan, tel parey levennman koudeta. E si sa bann dimoun ti ganny dekouver, zot ti pou ganny blanmen pou sa bann atosite. Ozordi menm teknik pe ganny servi. Zot pe servi sa bann zenn Onorab ki pa konn vre zistwar Sesel, andokrin zot, kasyet zot la realite, menm fer zot fase ek zot prop fanmir. Fer zot fann propagann zis pou destabiliz pei.

Sa bann zenn *MNA* dan Lopoziyon pa pe vwar sa tel devlopman. Akoz, se zot ki pe ganny servi koman veikil pou *stimulate* sa tel mannev *incitement*. Zot lespri i tro inosan politikman. E menm zot, zot pa tro konnen ki savedir *incitement*. Sa i pe *mastermind* sa, zot vremen *on top of the game*. Me mwan mon apresye ki Prezidan in anvoy en *warning* serye ki sa pa pou ganny tolere.

E i enportan ki tou Seselwa i konnen ki i annan en mannev dan sa laliny, e ki zot pa ava vwar zot pe ganny servi pou partisip dan bann tel pratik. Mr Speaker leta spirityel donasyon i vremen o.

Leta lasante mantal nou Nasyon i pozitivman. Seselwa in koze, in egzers zot drwa dan dernyen eleksyon. Realite eleksyon in konstat sa. Seselwa

i anvi konn vre leta lekonomi son pei.

E se sa ki nou dan Lasanble nou'n ganny mandate pou fer. Nou bezwen ekspoz tou bann ka koripsyon e move fason fer keksoz, viv dan realite, pou kontinyen demaske bann kriptep avek zot bann asosye.

Enn par enn, sakenn son tour, e dezormen, Seselwa pou reganny son dignite. Lidantite, linite e lazwa de viv ki lontan ti egziste, me preski disparet depi ler parti *US* in deside enterfer avek fason viv e lidantite Seselwa.

Mr Speaker lot konsern ki Prezidan in fer resorti i sirman ankor plis koripsyon. Koripsyon Sesel i enfiltre dan preski tou departman Sesel. Zis parey en lalyann anvaisan ki ou kapab vwar li menm lo pli o montan. Bokou bann proze ki ti kapab ed nou bann dimoun amelyor zot lavi in ganny retarde, anpese, swa pa abouti zis akoz bokou koripsyon.

Koripsyon in manifeste dan diferan laform, ki par ler i preski difisil pou idantifye e sa in vin en fason viv ki kontinyelman met bokou retar e koz bokou fristrasyon pou bann ki ganny afekte. E dan lot kote i kree bokou larises pou son bann *mastermind*. Me an realite pei i perdi bokou

resours, tel ki larzan, propriyete, *asset* e lezot loportinite ki ti a kapab amelyor lavi sakenn de nou.

Zis pou azoute Mr Speaker, tou sa bann aksyon pa'n ariv anba Gouvernman *LDS*. Nou fek vin dan Gouvernman apre eleksyon le 24 Oktob 2020. Lekel ki responsab alor? Lekel ki'n soutir koripsyon? Lekel ki'n bezwen, lekel ki pou bezwen rann kont? Eski ozordi bann Manm Lopoziyon i kapab onnetman get nou fran dan nou lizye e dir nou ki parti *US* pa responsab pou toler koripsyon Sesel?

Eski Onorab *Leader* Lopoziyon i kapab tap son lestoman, e get Seselwa fran dan zot lizye e dir ki son Gouvernman i kontan Sesel? Ler se son menm Gouvernman ki'n deside fer fize larzan ki'n ganny met dan Fon pou program *FA4JR* pou soulaz bann biznes e Seselwa an zeneral ki'n vreman ganny afekte.

Ler nou trouve ki biznes ki pa merite, zot menm zot ki'n ganny pli gro aprovizyonman. Menm si zot pa ti vreman merite. Eski i byen? Tou fason nou pou bezwen ganny sa lalis ki Gouvernman *US* ti'n kasyet

tou sa letan lo bann detay *FA4JR*.

Mon konpran ki pou annan bokou kestyon o tour sa bann alokasyon. E mon bezwen dir osi ki aksyon apropiye i bezwen ganny pran si i annan laprev labi ouswa koripsyon. Tou dimoun i bezwen delivre selon san manda.

E zot osi zot bezwen responsab pou zot aksyon. Esperon ki zistis ava ganny fer, e bann larzan ki'n ganny mal distribye ava retourn dan Fon e sa i ava ed ankor bann Seselwa ki dan bezwen.

Li size *Air Seychelles*, Mr Speaker mon'n fer li mon devwar pou kontakte enn de zabitans ek Seselwa an zeneral, pou rod zot pwennvi lo sa topik. Loportinite i divers lo sa size, me kantmenm, mon remarke ki mazorite Seselwa i an faver ki tou mwayen nesaser i ganny fer pou sov nou laliny aryen.

Seselwa in pey bokou larzan pou ki sa lakonpanyen i vin profitab e fer sikse. Be kote nou'n al mal? Eski pa nou bann pilot in demonstre, in demonstre ki zot parmi bann pli bon mondyal?

Eski nou bann *cabin crew* pa zot in *shine* lo nivo Nasyonal, menm enternasyonal? E sa in fre ki ler Seselwa i *travel*, i swete ganny en tyak lo *Air Seychelles*.

Eski nou bann enzenyer e lezot travayer *maintenance* pa'n demonstre ki zot konpetan e fer sir ki tou problem e konsern i ganny dil avek? E sa in fer ki *Air Seychelles* e lezot laliny aryen in touzour reste an sekirite, e lo bann bon standar enternasyonal.

Eski bann travayer *ground handling* pa'n delivre e fer sir ki servis i kontinyelman amelyore? E sa in kree plis konfyans. Eski bann Lazans Sekirite pa'n fer tou byen e fer sir ki *Airport* i reste an sekirite a tou priz?

E sa in fer, in fer nou vin en destinasyon repite, menm si nou en pti pei. Kestyon, kestyon ankor, akoz ki sa lakonpanyen pa'n kapab fer byen? Larepons i senp, move zesyon par *management Air Seychelles* i lakle.

Zot pa'n valoriz travay dir. Eski nou devret fer soufer sa bann travayer determinen ki'n debourye lizour aswar, menm dan bann sityasyon difisil e enposib?

Bokou ledikasyon i montre nou ki se gaspiyaz, move zesyon finansyel e bann desizyon iresponsab, in fer ki nou *Air Seychelles* i dan en det signifikan ki met nou pei dan en sityasyon difisil.

E se sa ki topik konversasyon ozordi. Mon pa devret pe ganny vwar pe pran okenn desizyon lo la, me mon ti a kontan ki en deba Nasyonal i ganny fer, kot tou lide e lopinyon ava ganny konsidere e ki pli bon desizyon ava ganny pran o tour sa size. Mon konvenki ki la deor i annan ase Seselwa kalifye e konpetan, ki kapab vwar sa pli bon solisyon pou sa problemm.

Prezidan in eksprim konsern lo leta servis piblik dan Sesel. Servis piblik i enn ki mwan koman bann nouvo *MNA* dan lepase mon'n sey konpran. Me mon ti bezwen navige mannyer mon kapab, zis pou sey ed mon bann ser ek frer. Mr Speaker pa'n fasil ditou.

Me nou'n kapab fer en pe, si menm mon ti bezwen anvoy latet par ler. Me sa ti sel fason pou navige dan sa servis piblik ki ti la. Mon vremen apresye ki Prezidan in azir fran e koz drwat lo sa size.

Menm ki bann *MNA* Lopozisyon pa'n apresye, nou konn zot tre byen. Me mwan mon konnen ki mazorite Seselwa i swete ki servis piblik i vin pli aksesib e pli efikas. Eski sa pa en siny lespwar ki nou Prezidan in montre? Menm si *Leader* Lopozisyon in dir i pa

war okenn lespwar dan sa diskour.

Mon kontribisyon lo servis piblik se ki mon anvai ki nouvo ladministrasyon i dir avek Lepep Seselwa, ki *timeframe* ki zot pe etablir, pou ki nou ganny en *acknowledgement*, swa en repons e en dele letan ki bann konsern i ava ganny aksyonnen lo la. Pou ki tou dimoun i a konnen ki zot ekspekte. Sa i ede redwir fristrasyon e ogmant prodiktivite e *l'inclusivité* e anmenn prosperite pou nou dimoun e pei an zeneral.

Mr Speaker Prezidan in koz lo linite e stabilite dan Sesel. Wi, sa i devret nou lapriyer e swe pou nou pei. Nou fason viv e nou fason fer, menm si nou annan diferan krwayans, politik, relizyon, menm diferan pozisyon e lanvi dan lavi.

Ler mon lo sa topik, byensir premye lenstitisyon ki vin dan mon lide se Lafors Lapolis. Tou dernyerman mon'n aprann ki menm avek bokou persyazyon par Departman Lapolis, pou zot ganny sipor nesaser pou moderniz sa lafors, i regretan ki zot demann pa'n ganny dil avek. E sa in ede pou anmenn bokou dekourazman dan sa lafors.

Bokou fwa nou'n kritik sa lafors san vremen konnen e

konpran bann defi zot pe pas ladan. E sa in ede afeblir zot pouvwar pou delivre parey zot ti a swete anvi. Mon konnen ki i annan bokou konsern ki vizib e ki devret ganny dil avek, e ki pa bezwen bokou lenvestisman, tel ki bann konportman par enn de zofisye.

Me mon kapab konfortableman dir, ki mazorite fanm ek zonn dan liniform, zot onnet, travay dir e pare pou donn plis, pou amelyor zot *ranking* e retourn lo standar zis parey avan levennman Koudeta an 1977.

La mon pe dir Mr Prezidan avek Minis pou Zafer Entern, pou silvouple, retir kasket, retourn sa kasket, retir sa kasket lo latet Pti Claude e retourn li avek Komisyoner, zis parey i ti ete avan Koudeta.

Donn li tou sipor posibil ki i a bezwen pou li fer son travay marse. Nou bezwen en Lafors Lapolis ki vreman en lafyerte pou nou pei. Kot bann zonn ek fanm dan liniform i vin bann zanmi pou la kominote. Kot nou a kapab travay ansanm pou en kominote e en pei prospere. Kot bann bon fason fer e bann bon savwar viv i a renye dan nou pei.

Mon pou ensiste ki tou demars ki Lapolis pe entervenir, ava ganny byen analize e tou

sipor neser ava ganny met a zot dispozisyon, ki zot a kapab delivre selon lekspektasyon.

I osi bon note ki nou bezwen ankor plis zofisye pou zwenn sa lafors, sa profesyon. Me avek bann kondisyon ki egziste, byensir sa pa pe atrakte bokou kandida.

Mon demande ki plis *incentive*, tel ki saler favorab, menm ankouraz en program lozman pou bann zofisye. Lozman ki a kit ansanm e zot a ganny plis konfidan, e zot ava rekonfort pou en kominote.

Mon konnen ki oparavan ti annan bokou bann bout later ki ti'n ganny rezerve pou fer barak. E si sa bann bout later i ankor la, si wi la i loportinite pou tou bann lazans konsernen avek Departman Lapolis, devlop sa bann later e met lozman abordab pou bann Lapolis ki dan bezwen.

Byensir sa i ava en motivasyon pou bann zenn zofisye, e sa i ava ede kree relev pou sa profesyon. Gouvernman i devret ankouraz bann zofisye Lapolis pou vin pli profesyonnel, atraver donn zot bann kour avanse, swa lokal oubyen enternasyonal.

I sitan annan bann karyer ki Lapolis i kapab met a dispozisyon, zot bann zofisye, afen ki zot a devlope e vin bann

azan egzampler dan tou domenn ki annan pou fer avek Lapolis. Wi Mr Speaker, nou kapab fer li pou nou Lafors Lapolis Sesel.

Mr Speaker bon kominikasyon kot nou ganny bon lenformasyon, e nou osi kapab ganny bann platform pou fer pase nou bann konsern e ede amelyor leta nou lasante lespri, i enn ki annan lenpak direk lo nou nasyon. Tro bokou letan Seselwa pe ganny *riffoff* avek bann lakonpanyen telekominikasyon. I pa akseptab, e aksyon pli serye i devret ganny pran pou regulariz sa sityasyon o pli vit posib.

I pa akseptab pou en lakonpanyen dir ou ki i pou bezwen vin get ou problem dan en semenn, menm si ou fer li konpran ki ou biznes i depan lo la. Gouvernman i devret ankouraz lezot lakonpanyen investir dan tel domenn, o pli vit posib, kot konpetisyon i ava vreman determin ki kalite servis ki Seselwa nou pe gannnen.

Lo size *COVID*, mon panse ki Prezidan in met ase lanfaz lo la, e mon bann koleg Onorab *LDS* in eksplik tre byen, ki sa se pa en topik politik. E nou annan tout konfidans ki bann zofisye Lasante i konnen ki zot pe fer.

Mon oule met lo rikord ki mon'n vwar 3 dokter dan en *Press Conference* semenn pase ki ti pe donn zot pwennvi, lo ki mannyer pou dil avek sa pandemik *COVID-19*.

Ler mon ti gete, mon pa ti tro, tro war non, selman mon ti war en Dr Herminie, en Dr Dugasse avek en Dr Pillay. Zot in sey tou, zot in seye pou fer zot nide pase. Me menm si zot in konfiz zot prop lekor, be mon kontan ki yer Onorab Rosie Bistoquet in eklersi sa bann pwen. Kot i ti pe sey fer nou konpran pli kler, ki mannyer ou kapab kordin en program vaksinyasyon avek en *lockdown*. Esperon ki sa bann dokter, zot in finalman konpran ki zot *show* tiket pa'n vann.

Mr Speaker nou bezwen aksepte ki Prezidan Ramkalawan in fer en prop *legacy* pou li menm.

Lo komansman bokou Seselwa pa ti konpran vreman son lentansyon, me avek letan bokou nou nou'n kapab konpran e menm anbras son bann bon lentansyon. Mon konnen ki lot kote latab zot pa kontan, menm *LDS* zot pa oule trouve.

I kler ler nou nonm son non zot grense, zis akoz zanmen zot in anvi donn li son sans ki i merite. I pa normal, me nou

konpran akoz ki zot anvoy tou sort salte lo li. Me sa ki zot pa'n realize, ki atraver zot bann kalonmni, ki zot in fer souvandfwa, zot bann salte ki zot anvoy lo li, in kree en iminite politik ki ozordi i asiz lo pli o sez dan pei Sesel!

(APPLAUSE)

HON FRANCOIS ADELAIDE

Mon konsey pou zot lo lot kote latab, se menm ki zot pe refize e kree konfizyon lo sa pandemik e sa programm vaksinasyon. Mon konnen zot pou sirviv lo sa kote maladi, me zot pou malad, menm mor avek maladi gro ker, swa depresyon.

Akoz pou 5 lannen zot pou kontinyen vwar li, ekout li, obeir li, respe li, salye li, menm ankor vey li. Konmans abitye avek sa nouvo normal, Wavel *State House*, 2tyer *LDS* dan Lasanble.

Zot kapab pran zot *annual leave* si zot oule, *LDS* i annan ase mazorite absoli dan Lasanble pou travay!

(APPLAUSE)

HON FRANCOIS ADELAIDE

Nou pa tro bezwen zot, me nou pe sey akomod zot. Zis 3 mwan dan Lopoziyon, mon vwar ki bann *MNA* Lopoziyon deza zot

in komans sey morde, wi zot annan tou drwa pou montre ki zot kapab ekspoz Gouvernman dizour. Me atansyon, sa detrwa pti ledan dile ki'n komans pouse, silvouple vey li byen! Lapo nou Prezidan i *tough*. Tasyon zot bann pti ledan dil pa sorti enn par enn. Laverite pou devwal sa. Apre Bidze nou pou gete kantite sa bann pti ledan dile i reste zot.

(laughter)

HON FRANCOIS ADELAIDE

Mr Speaker, Baie Lazare nou pa mank sans pou vot pou *LDS* e nou Prezidan Wavel Ramkalawan.

Nou'n donn li tou nou sipor, akoz nou konnen ki Sesel i bezwen en zonm fran parey li, ki adres keksoz dan tou son fransiz. Seselwa i en Nasyon ki kontan konnen ki pe pase.

Me malerezman dan lepase nou'n tro ganny anbete avek mansonz e ozordi ler nou tann mannyer keksoz i ete, nou pa kapab aksepté. Mon pa oule a sa moman mank loportinite pou remersi bann zabitan ki ti elekte mwan dan dernyen konpany eleksyon.

Mon konnen mon pa pou koz bokou lo Baie Lazare, me mon pou adres tou sa bann zafer dan Bidze. Nou annan

bokou bann keksoz pou nou fer, esperon ki mon ava ganny tou zot sipor.

Mr Speaker, parey mon'n toultan fer sak fwa mon'n ganny sans dan sa Lasanble, mon'n touzour fer en demann avek tou dimoun, premyerman avek Prezidan, nou bann Minis, tou bann o zofisyè, menm nou Lasanble e tou dimoun an zeneral pou nou adopte sa prensip *Saint François d'Assise*.

Kot nou fer en ve e nou vin bann lenstriman lape. Mon konvenki ki se menm lapriyer ki nou Prezidan pe presye e pe pratike e pe demann nou osi pou nou fer parey. Fason ki bann Manm *US* pe eksprim zot, zot in montre ki zot annan laenn e menm zot pe anplifye sa dan zot bann siporte.

Me mazorite Seselwa pou bezwen rod fason pou senm lanmour dan Sesel. Kot i annan blesir e mekontantman, nou pou bezwen pardonnen e met lanmour. Kot i annan bann dout parmi nou pep, nou pou bezwen anmenn lafwa e kouraz.

Kot i annan dezespwar nou bezwen met lespwar e konfyans. Kot i annan trou oubyen fernwanr nou bezwen met lalimyer. Kot i annan lenzistis nou pou bezwen met lazistis.

E kot i annan sagrinasyon, nou pou bezwen anmenn lazwa de viv. Wi Mr Speaker *LDS* napa baton mazik, me mon asire ki nou rekonnèt ki nou annan en resours imen manifik.

Seselwa i annan tou son zanfan byen kalifye dan diferan domenn. E si nou rod *the right men for the job*, Sesel sirman, pou sirman preski tou problem ki ozordi nou pe fer fas avek. Tro bokou letan ...

MR SPEAKER

... Onorab ou'n depas letan silvouple, ou a terminen *please*.

HON FRANCOIS ADELAIDE

Ok. Tro bokou letan Seselwa pa'n ganny apresye pou sa ki zot prosede. E avek sa nouvo normal e sa nouvo fason fer ki *LDS* pe ankouraze byensir i pou anmenn bokou prosperite pou nou Nasyon. Mersi Mr Speaker.

(APPLAUSE)

MR SPEAKER

Mersi Onorab. Mon apel Onorab sandy Arissol.

HON SANDY ARISSOL

Mersi Mr Speaker. Bonn apre midi tou dimoun.

Mr Speaker,

Leader Lopoziyon dan Lasanble Nasyonal,
 Mon *Leader* Zafer Gouvernman dan Lasanble,
 Manm Onorab,
Staff Sekretarya Lasanble Nasyonal,
 Zabitan distrik Bel Ombre,
 Lepep Seselwa,
 E tou dimoun spesyalman bann Seselwa ki pe ekout nou atraver lemonn.

Ozordi Mr Speaker i ava fer ki mwan Sandy John Arissol, mon pou reponn pou premye fwa diskour lo leta nou pti pei Sesel, prezante par nou Prezidan, ou Prezidan ek Prezidan Lepep Seselwa, sa se pa lot ki Wavel John Charles Ramkalawan!

Kontan, pa kontan, se Prezidan Ramkalawan ki pe *rule border*.

(APPLAUSE)

HON SANDY ARISSOL

Mr Speaker, mon kontan letan in annan 1 Manm ki'n koz zis lo latet zonnyon.

Sa i fer mwan mazin letan en bal zonnyon i sorti lo en bal diri i tonm ater e goni i ouver, tou zonnyon i roul anba kontwar. E ozordi en latet zonnyon.

Nou ti fer serman lo Konstitisyon pei, alors si mon lir byen mon Konstitisyon, preanbil nou Konstitisyon pa dir nou vole, fer koripsyon, viktimiz nou frer, fer li disparet, bril li ek lasid, koup son parti prive!

Pa sa ki preanbil nou Konstitisyon i dir nou Mr Speaker, pou mon *remind* Onorab Wallace Cosgrow dan nou Lasanble Nasyonal!

Letan ou annan en zenn Minis ki'n *fail* son Gouvernman, in *fail* son parti ek Lepep Seselwa apre ki in pran larzan ki i ti dir i pa pou pran e i re devret onte. Alor pa servi nou Konstitisyon koman en katalog. Si mon pa tronpe, i pa ti en Paster letan i ti Minis li, me i ti en *Master* zot dir mwan! Mon kit sa la.

Mr Speaker sa ki enportan pou *US* konnen, se ki nou'n fer sa 2 zour, se get leta nou pti pei. Leta nou distrik anba Gouvernman ki'n la, sanmenm sa Gouvernman koronpi, sa Gouvernman kales kase. Se la kot nou triy bann lenz sal, lekel ki al dan masin, lekel ki pou met tranpe, lekel ki nou pou zete, akoz napa fon oubyen fon in desire.

Sa se en pe sityasyon ki nou'n dil avek sa 2 zour. Prezidan pa'n kapab dir tou

keksoz dan 45 minit. Se pou sa rezon i annan Minis Finans ki pou vin dan Lasanble pou diskit finans.

Se pou sa i annan bann Manm Lasanble pou nou kontiny sa deba. Trou ki US in fouye pandan 43an zot ekspekte nou dan *LDS* ranpli pandan 85 zour! Mr Speaker sa zot sa, bann *US* ki'n degize. Me parkont dan 85 zour, Prezidan in fer sir ki tou sitwayen, enkli Onorab Vidot ki ti pe demande ki Prezidan in fer pandan 85 zour. In fer sir ki ou'n ganny ou vaksen Onorab Vidot, savedir ou bezwen rekonesan e dir li mersi pandan sa 85 zour ki in la!

(APPLAUSE)

HON SANDY ARISSOL

Mr Speaker *SPUP/ SPPF* ti annan en latitud, si ou pa kontan kit pei ale! Si i pa avek nou fer li vin fou ek bann lanpayaz ki zot ti annan. Letan Lopoziyon ti anvi travay pou son pei, zot ti dir, "Flit tou karya!"

Letan nou ti sant, "Nou tou nou la," zot ti konpoz, "Kile Lopoziyon!" Letan enn zot Manm *Senior* ti annan en lopinyon diferan, zot ti menase pou fer li sorti par lafnet!

Se sa ki Onorab Vidot ti devret dir sa gro fanm dan distrik Roche Caiman Mr Speaker.

La ozordi sa menm Lopoziyon divize, konfize e mal fonde ek en lavwa anwe, zot vini e dir nou ki kales kase i fer onte e *unparliamentarily*. Mr Speaker, be les mon a *remind* zot kwa kisisa ki ti *unparliamentarily*.

Letan zot ti konpar nou koman lisyen dan semen, tret nou Zika, apel nou Manm rasis dan Lasanble, e zot ti *remind* nou ki nou pou reste dan Lopoziyon! La mon'n fini war se zot ki pou reste dan Lopoziyon.

(APPLAUSE)

HON SANDY ARISSOL

Sa menm Lopoziyon ki vini e dir nou ki responsab pou logmantasyon *COVID*. Nou ki responsab si i annan en logmantasyon *COVID* dan Sesel ozordi.

Akoz nou ti fer *motorcade* ... nou Prezidan ti al dan Katyolo ... nou ti annan rasanbleman kanpany ... Sa ki zot devret dir avek Lepep Seselwa, zot osi zot ti fer kanpany! Zot osi zot ti zwenn an sou sekre dan en piknik ek

bann bwarer Takamaka e zot ti poste portre!

Au Cap bann dernyen aktivis ki ti reste, ti pe *standby* tou le Sanmdi pou vey zakasyon *LDS*! Anse Aux Pins zot ti sey fer en pe dan tou le 3. Me dan sonm zot ti fer li.

Bel Ombre nou ti vwar detrwa ayoyo pe fer letour. Eski ti napa siporter *US* kot *Orion Mall* letan zot bann kandida ti al anmenn bann dokiman? Eski dan bann distrik ti napa kanpany? Larzan ti ganny partaze dan Corgate dan en gro kannson kaki ek dan en *safety shoes*!

(laughter)

HON SANDY ARISSOL

Eski ou ti dan ou mas ou letan ou ti pe partaz larzan Corgate Estate?

(laughter)

HON SANDY ARISSOL

COVID ti *LDS* ki'n evante alor? Be si *COVID LDS* ki'n evante, zis met laliny, pran zot vaksen e fou en lape dan zot lekor.

Diferans avek nou Prezidan se vini vin donn en koudmen pou fer pei marse. An dot mo, Sesel pou tou son zanfan. Kit ou politik dan

lakour Prezidan i dir. Rann kont, bezwen delivre.

Bann zenn fiy ek bann zenn garson pa zis mazin fer zanfan, me konn zot lekor zot menm. Mwan sa bout mon kontan, ou konnen akoz mon kontan sa bout Mr Speaker, akoz apre se *MNA* ki pou bezwen donn napi, flannel, dile avek *pampers*.

Alor mon redir ankor bann zenn, mazin zot lavenir, travay, fer *savings*, okip zot lekor, pran letan pou viv, parey sanson i dir e pran letan pou zot grandi! Fodre ou leve al travay parey Prezidan in dir. Pou soutenir ou lekor ek ou fanmir ek ou lakour. Mr Speaker se sa bann gran laliny ki nou Prezidan in met devan nou. Fini sa bann zafer asize get dan lesyel e laman pou tonbe. Tap ros e delo pou koule, lev lanmen anler e nou ekspekte lanmer ant Praslin ek Mahe pou ouver akoz ou napa en tiket *Cat Cocos*. Fini sa bann letan Mr Speaker.

Me granmersi Prezidan in fran e onnet dan son lapros. Se pou sa rezon bann *US* zot pa kontan e pou zot sa i arogan. Akoz i arogan. Akoz nou Prezidan ki serye e fran i pa'n vin koz lo tinel, sistenm tren ki pou mont Anse Boileau, dezyenm lavil parey Onorab

Lemiel in espere pou plis ki 25an.

E mon konpran fristrasyon Onorab Lemiel, i pe esper son dezyenm lavil e zanmen in arive! In esper Stasyon *Fire Brigade* dan en pozisyon stratezik, e zanmen in arive! Malerezman Norma, napa *data* dan tata mon ser, kekwfa pli tar. Prezidan pa'n vin donn nou manrmoun, me in dir nou laverite ki pe pase dan nou pei.

Mr Speaker sa letan in fini! Kontan, pa kontan mon redir, se Prezidan Ramkalawan ki a pe *rule border*. Ou pou bezwen leve e sekwe ou. Sorti dan sa bann lakaz angrennyen ki *US* in met ou ladan. *US* kontan kit Seselwa anpandan li Mr Speaker, i enportan pou nou mazin byen sa. Zot kontan kit Seselwa anpandan e depandan. Si i met ou lo *URS* ou devret mor lo *URS*! Ou napa drwa sorti lo sa *Scheme* ou. Ou pa devret ganny en bon lanplwa ou ek en bon saler, me mor lo *URS* aköz *US* ki'n met ou lo sa *Scheme*.

E pa bliye Mr Speaker, bann zenn ki pe ekoute, sa i pa en lanplwa li, i en *Scheme*. E lo sa *Scheme* i annan plizyer labi, parey bann zenn ki pe travay dan *URS* kot Minister Lasante, zot travay egalman ek bann ners, bann *staff*. Be zot, zot pa

ganny bann lezot *incentives* ki vin avek. Aköz ki zot pa ganny anploye parey nou'n tande yer swar, si ou annan plis ki lan avek *URS* dan sa menm Minister? Eski sa i vedir ki sa Minister pa ti bezwen travayer, me selman i ti ganny forse pou pran ou aköz eleksyon ti a pe vini?

Oubyen eski ou, ou kontan lo *URS*, parske ou ganny plis ki bann ki anploye? Parey sa *carer* ki anploye, oubyen parey sa madanm ki travay dan korporativ e li i ganny 5600. Sa i bann refleksyon ki nou bezwen fer Mr Speaker letan nou pe koz lo *URS*. Si *US* i met ou lo en programm *methadone*, ou pa devret sorti lo la ou. Ou devret mor lo programm *methadone*.

Ou pa devret ganny dir aret servi drog. Koup sa *methadone*, rantre dan en lanplwa. Si *LDS* ki dir, nou pa kontan sa pep, ki'n arive avek Sesel pou tou son zanfan, e nou pe fer Seselwa mizer.

Alor nou zenn, si *US* ki'n met nou lo *methadone*, i bezwen mor lo *methadone* Mr Speaker. Sa *mindset US*. Si ou ganny en lasistans sosyal, ou devret mor lo ou lasistans sosyal, ou pa devret leve sekwe ou e ganny en plas travay pou sonny ou fanmir. Me ou devret mor lo lasistans. Pa bliye, i pa en saler

sa, i en lasistans. Lasistans ou gannyen pou ed ou pou ou kapab bouz devan.

Labi kot ASP, lekel ki ti CEO laba pou 2an 3 mwan? Konbyen larzan ki'n perdi laba? Lekel ki ti ganny asiste, fanm oubyen galan, oubyen plizyer lezot dimoun ki pa ti bezwen?

Mon poz sa la, parey pou Naddy ti ganny poz la taler. Si zot dalon pe donn bal dan nou larzan, pran *loan* e refize pou peye, parey plizyer bann Manm Lasanble US, fer tou kalite gaspiyaz, viktimiz Seselwa dan travay, pa delivre dan louvraz.

E osi zot dir ek ou, sa latitud pa akseptab, sa i viktimizasyon e Gouvernman napa plan pou Sesel e Sesel nepli pou son zanfan. Nou pou nepli sant "*Hakuna matata*" Mr Speaker.

Mon krwar nou ava sant "*Kumbaya My Lord, kumbaya.*" Me parkont nou pa ekspekte ki tou dimoun pou kontan Prezidan Ramkalawan. I pou en gou anmer dan zot labous pou 5an. Nou pa ekspekte ki zot kontan son ladres. Pa tou dimoun ki kontan son ladministrasyon, i *ok* ek sa, nou'n abitye avek sa.

Akoz si ozordi i annan tou sort divers lopinyon, zot anvi ensit vyolans dan sa pei, zot konn zot drwa, zot annan en

nouvo Lopoziyon, tou sa se gra sa Ramkalawan ki'n anmennen ozordi, pou zot kapab koz for e koz bon labous!

En lepok zot ti per e zot ti vin zis parey bann *La Sainte Enfance* e zis dir wi. Ozordi i gou get zot pe lev zot lavwa, gras a Prezidan Wavel Ramkalawan!

(APPLAUSE)

HON SANDY ARISSOL

Kontan, pa kontan se li ki pe *rule border*. Pa akoz ou pa kontan li ki ou pa bezwen respe son lofis, ou pa respe lofis Speaker, ou pa respe ou bann koleg Manm Lasanble, ou mank respe pou ou prop *Leader* Lopoziyon avek pou parti ki'n donn ou en pti plas *rebate*.

Gran malelve parey nou granmoun i dir nou lontan! Prezidan in dir nou solider me pa zwe soliter dan biro.

Mr Speaker mon anvi dir avek Mr Prezidan, *State House* i annan solidarite, e akoz in felisit tou son *staff*, koman Prezidan. Lasanble Nasyonal i ranpli avek solidarite. Nou koman en, lo kote *LDS* nou respe bann *staff* e nou partisip ek zot dan travay dir e osi dan bann aktivite sosyal ki *US* i kontinyen refiz-e pou partisipe.

Dan *LDS* i annan solidarite. Si nou'n an parti

ozordi, nou annan en melanz parti politik dan *LDS*. Menm bann ki nou'n pran dan zot ta, ozordi avek nou Mr Speaker. Sanmenm sa ki apel solidarite.

E nou'n menm osi annan bann dimoun, bann sitwayen avek abilite spesyal parey nou frer Naddy, ki zot, zot in kit ater! I annan en melanz relizyon ozordi dan *LDS*, en melanz dan ras ki ti demark Sesel 250an pase. Sa Naidu ki asiz la devan, ki plizyer zot i gonfle ler zot war li.

(APPLAUSE)

HON SANDY ARISSOL

Me parkont Mr Speaker, dan *US* napa solider, me zot pe zwe soliter, kot zot pe sanz kart, les sa enn vin Sef, sa enn ava anvi vin dan Lasanble.

Pe dir sanz Konstitisyon pou zet sa enn ater e met sa lot. Bann ki pa dan pake kart, i an deor i ofanse. Sa kart ki zot konsider li desire, sal li lo latib, e lir ankor anba latib apre ki in dan pake kart pou plizyer lannen.

I annan en kart zis pe rod privez, pozisyon, drayver ek sekirite. I kontan koumsa li. E bannla i apel li sa gro garson dokter.

(laughter)

HON SANDY ARISSOL

E li menm li ki mont lo televizyon, i ganny toupe, i mont lo televizyon i dir nou, nou pe donn R25 mil bann Ziz.

Be Mr Speaker mon anvi dir avek sa gro garson dokter la, be letan Lalwa pou R25mil pou bann Ziz ti pase, kote i ti ete sa gro garson dokter? Pa i ti asiz isi anler dan Lasanble Nasyonal?

Pa li ki ti ansarz Lasanble Nasyonal ansanm avek Onorab Pillay ...

(APPLAUSE)

HON SANDY ARISSOL

... avek Onorab Ghislain ki ankor la dan sa Lasanble? La ozordi zot ganny lodas e toupe vin dir ek nou, nou pe donn Ziz R25mil *housing allowance*?

Mr Speaker zot in vin en kales kase e zot fer onte, *comme* dir zot in aksepte zot menm. Nou'n tann dir par zot Mr Speaker, ki fodre bann *allowance* i ganny koupe dan Lasanble Nasyonal.

Mr Speaker mwan mon anvi *remind* tou bann Manm *US*. Si zot anvi pa pran zot *allowance*, si zot anvi pa pran zot saler, sa i zot problem! Nou lo kote sa latib nou pou pran

tou sa ki apel pou nou, parske nou, nou pe travay pou Lepep Seselwa e nou aksepte sa ki nou gannyen!

(APPLAUSE)

HON SANDY ARISSOL

Mazin byen, poudir avan eleksyon, *LDS* nou ti fer kontribisyon pou *Red Cross*, nou ti fer kontribisyon atraver sa ki nou gannyen pou *NARS*. Nou ti fer kontribisyon pou Sanniter avek sa ki nou gannyen. E la ki nou'n fer, nou'n donn en donasyon R100mil. Mr Speaker nou *happy* ek sa ki nou gannyen, e nou pe fer kontribisyon sa ki nou gannyen avek lasosyete, *plus* bann dimoun ki dan nou distrik e nou pe travay.

Alor ler ou travay, ou pran ou saler. Bann ki pa travay, pa bezwen pran pou zot, anvoy kot Lakrwa Rouz!

(APPLAUSE)

HON SANDY ARISSOL

Letan napa solidarite, sa i fer ki zot mank respe pou pei, Prezidan, Speaker e pep Seselwa. Sa i fer ki zot komans refiz-e met palto. Zot refize pran vaksen, zot refiz boutey delo ki Lasanble in donner dan lespri prekasyon.

La en pe zot in komans vin avek kont lakanmizri. Zot refize pran paviyon, wi zot ti refize. E Onorab Aglae ti dir poudir "Paviyon se *DA* ki devret partaze!" Selman li ki *MNA* Elekte, li ki ti pas devan laport dimoun, la i zet sa travay lo *DA*.

Zot refiz en Lopital dan sa moman ki sitwayen i pli bezwen sistenm Lasante ki pe, apre zot vin dir nou zot in fer karyer dan Ledikasyon. Be kwa ki zot in ansenny nou zanfan, *boycott, boycott ek boycott?*

Dan sa napa solidarite, Onorab Ghislain i oule fer nou krwar ki ti annan linite anba *SPUP/ SPPF* ozordi in vin *US*.

Me i bliye Mr Speaker Onorab Ghislain, si ozordi i annan en Komisyon, ki apel Komisyon Laverite ek Rekonsilyasyon Nasyonal, sa set aköz ti napa linite anba parti *US* en bann letan pase.

Se pou sa rezon, nou, nou pe anmenn sa linite ozordi dan sa pei. *Too little too late* Onorab Ghislain! Refer ou *homework*. Rezilta tousala i fer zot vin en kales kase parey nou'n *remind* zot e nou ankor pe *remind* zot. Me pa zis kales kase Mr Speaker. Zot in defonse!

Ozordi zot in konfortab dan pozisyon koman Lopozisyon. En pos ki zot ti maltret nou pou 20an, la setaki

i anvi sa pos dan sa kales kase e i annan i komans *walk out* tou.

Letan zot *walk out*, pa bliye, zot pe anbaras bann Manm ki'n ganny elekte, parey Onorab Rocky, parey Onorab Gabriel, parey Onorab Audrey, parey Onorab Churchill Gill avek Onorab Aglae. Zot pa kontan *walk out* zot, parske zot annan zot dimoun pou defann. Tou bann ki pe fer dezord dan Lasanble, se bann ki'n ganny en plas *rebate*. E zot ki pe ensit dezord dan Lasanble e zot pe ensit dezord dan pei. Fodre nou dil avek zot sa bann dimoun Mr Speaker!

I annan pe anpandan e i annan pe trenn ater dan zot kales kase.

Lot pe kale, lot pe gele, lot zis i flate, lot i gonfle e larestan pe zis transpire, pa konnen ki pou arive avek li. En bann i war bef dan lasenn, sakenn vey son disab. Travay i la mon bann zanmi!

Sa ki Prezidan in donnen dan son diskour se fini, vini in dir zot, koste, pa rat sa sans pou donn en koudmen pou fer marse nou pei. Nou pe esper zot avek lebra ouver, nou bann ser ek frer *US*.

Mr Speaker mon rapel sa parol bann gro madanm ki ti pe danse avek Mr Faure anba

lavarang *Maison Du Peuple*. Mon krwar Onorab Audrey ti la i osi. "Prezidan ki nou pou fer si ou ale?"

Prezidan in ale, mon anvi dir avek sa bann gro madanm. Prezidan Ramkalawan ki pe *rule border!* Kontan, pa kontan! "Danse, bwar la manze in fini" parey sanson i dir nou. Prezan nou bezwen pey det ki zot bann gro madanm *US* in fer avek zot Prezidan, avek zot parti kales kase!

Mr Speaker zabitan Bel Ombre avek Lepep Seselwa nou'n fatigue fer sakrifis, nou'n ganny koup saler, zot in fer fas avek depar forse, pa ganny louveraz aköz *security clearance*. E nou pare pou siport tou desizyon ki Gouvernman i pran pou benefis nou pei. Me an menm tan nou dir avek Gouvernman, sa ki pa koupab pou bezwen pey lepokase.

Tro bokou letan Mr Speaker, letan Prezidan i vini i dir ek nou ki i annan koripsyon partou kote, soutire par bann gro zofisye dan Gouvernman, mon dir avek Prezidan, sa bann dimoun pou bezwen ale dan sistenm. Pa soutir zot, si zot reste la savedir nou Gouvernman pe soutir koripsyon! Mwan mon krwar zot pou bezwen ale dan sistenm!

(APPLAUSE)

HON SANDY ARISSOL

Koripsyon dan lapwentman, mon a donn zot en koripsyon enteresan Mr Speaker. Koripsyon dan lapwentman Konsil Onorer *Ethiopie*. In donneren ziska \$450mil pou sa pozisyon.

Pou li ganny nasyonalite Sesel avek en paspor Diplomatik. Kestyon mon demande, kote Minis Cosgrow ti ete sa bann letan, letan sa bann dil ti a pe pase? Se sa bann kalite dimoun ki'n fer nou pei andete Mr Speaker.

GOP ki'n ganny fer anba latatab kot *Airport*, *hampers* ek *whisky* tou le Desanm, bann travayer ilegal ki annan dan pei, ki antre koman touris.

Apre ou tande pe travay e pe reste dan bann gro, gro lakaz *Eden Island*. Olye vin depans larzan koma touris, pei i bezwen donn zot en saler an *forex*. Tousala soutire par ansyen Gouvernman!

Bann travayer ki antre koman zardinyen, aswar ou war li pe servi lo latatab, kan i bar plas en lot nou Seselwa. Bann ansenyan etranze, ki pa prodiktiv, la mon repete. Bann ansenyan etranze ki pa prodiktiv dan laklas!

Selman apre lekol pe lager pou fer *extra class*, pou li ganny plis larzan pou anvoy se li. E i annan pe vin an retar, akoz i bezwen al delivre gato bannann ek gato piman avan vin dan laklas.

Sa osi nou pou bezwen gete anba nou Gouvernman. I annan en pe etranze nanryen fer dan sa pei, ki pe zis monte desann lo semen. Fodre Imigrasyon i sekwe li e komans fer travay pou nou netway nou bann etranze ilegal dan sa pei.

Bann pos travay ki ganny *advertise* zis pou bous lizye, selman travayer in fini antre dan pei. Seselwa i ganny dir, ou *interview* pa'n en sikse, akoz son dalon in antre atraver *COE*.

Sa osi fodre nou gete sa *COE* la, *Certificate of Entitlement* ki lotel i gannyen pou soutir zot fanmir vin travay dan nou pei. Bann zofisy Lanplwa, olye al ekout travayer Seselwa ek zot soufrans dan zot travay, zot al manz pli bon pla, bwar pli bon diven pli ser, donn *interview* ki tou keksoz i *ok* apre.

Wi tou keksoz i *ok* pou ou! Ou ki'n bwar diven, ou ki'n manze! Me sa travayer li i kontinyen soufer. Minis Cosgrow ti la li Mr Speaker, i konnen li. Mr Speaker tousala i bon fer remarke ki plizyer *MNA*

Lepep i konnen, sa bann travayer in dir zot. Me zot ti refize aksepte e koz pou sa pep. Letan *LOTO* ozordi i vini i dir ek nou i ganny let, mon kontan i ganny let, depi lontan i ganny let li, i pa ti reponn, i pa ti lir, akoz li i ti dan Gouvernman. La nou donn li sa posibilite pou li lir bann let ki vin kot li.

Kot *HFC* Mr Speaker, mon krwar i devret annan en bon lodit pou bann *loan* ki'n ganny donnen. Spesyalman dan letan eleksyon e osi an relasyon ek bann rediksyon dan *loan* avan eleksyon, oubyen bann *write-off* ki'n ganny arive.

La nou'n ganny dir, i pa rantab e sa in kout pei milyon lo bann desizyon ki Gouvernman *US* ti pran avek bi, pou zot ganny eleksyon.

E sa ki pli sagrinan, letan sa bann *CEO*, sa bann lorganizasyon i vini e i *endorse* tel desizyon bankal ki sa Gouvernman i fer, olye met son lipye ater koman en profesyonnel.

Mon repete sa bann kalite zofisye pa responsab, ki fer sa bann kalite *statement* e zot kout pei plizyer larzan e kof i vid parey Onorab Loze in dir. Selman zot kontinyen tous en gro saler. Sa pa akseptab Mr Speaker.

Ler mon sorti kot *HFC*, mon desann en kou kot lakaz. Lakaz i annan en bann ki'n gannyen, zanmen in fer fout kontribisyon li. I annan in ganny son lakaz me in ganny en lot lakaz.

I annan ki'n ganny posibilite pou li vann son lakaz prive e i ganny en flat *Perseverance* e i pas devan en zabitan Bel Ombre ki li i ankor lo lalis espere. I annan *PS* dan Gouvernman ki'n ganny posibilite pouli lwe en lakaz pou son manman lo *Perseverance*, selman son manman i annan son lakaz.

Selman enn zabitan mon distrik Mr Speaker, en madanm aswar son lakwizin i form parti son lasanm pou li dormi avek son garson. Sa i mal e devret pa ganny tolere ankor dan nou pei!

Sa bann zofisye zot pa devret dan sistenm, parske zot ki fer lepep soufer e lepep fristre. Bann zofisye Gouvernman ki pe reste dan bann Lakaz Dokter, oubyen ki pe lwe sa bann lakaz dan distrik Bel Ombre, i annan ki annan zot prop lakaz Mr Speaker.

Me li menm li ler in ganny en lakaz ankor dan Fisherman's Cove Estate, i ganny en kare later ek Gouvernman. E

zabitan Bel Ombre i kontinyen espere *vitam aeternam*.

Letan nou dir, bann *US* i dir, be ki'n arive avek moto 'Sesel pou tou son zanfan', pa egziste? Mr Speaker i egziste, lenzistis i bezwen ganny tire dan nou pei.

Mon desann dan *part rental* prezan;- *part rental* i annan ki gannyen ziska R10mil par mwan. Selman saler minimonm Sesel i 6500. Bann ki lo *Scheme URS* zot ganny R7mil an montan. Be ki mannyer en endividi i kapab ganny R10mil pou lwe lakaz? I annan endividi ki sorti Mahe Mr Speaker, i al Praslin, zot lwe zot lakaz lo Mahe, zot anmas en larzan.

Selman letan i Praslin laba dan sa lakaz i rod *part rental* ek Gouvernman pou li lwe son lakaz Praslin. La dan menm i rod lasistans sosyal pou li ed son piti lo Praslin. Selman li i pe lwe son lakaz lo Mahe. Be si nou dir poudir sa i apel labi, zot pou dir Ramkalawan i arogan e nou pa kontan Seselwa, napa 'Sesel pou tou son zanfan?'

Tro bokou labi anba Gouvernman *US* Mr Speaker. An menm tan Seselwa i bezwen konnen ki si i ganny R8mil koman en saler, i pa kapab lwe en lakaz R22mil, zis aköz i

annan en *swimming pool* avek en baro elektrik, zis pou fer son fanm, son dalon kontan.

In plis ki ler pou nou sekwe nou, leve dan sa bann rev Mr Speaker. Ler ou ganny en *part rental*, konmsi nou pe donn ou, tou Seselwa pe donn ou lanmen lwe ou lakaz, menm si nou pa reste avek ou.

Be sa i mal! Ou pou bezwen koup ou kannson dapre ou latwal. Si nou dir sa, Onorab Audrey Vidot pou dir ek nou, be ki'n arive avek Sesel, i nepli pou son zanfan? Fodre *SPPF* zot in byen donn bal dan sa pei, zot in met sa pep lo son zenou. E se sa ozordi ki apel leta nou nasyon.

Mr Speaker nou pa kapab annan en pei kot en pti group dimoun i donn bal dan nou larzan, fer sa ki zot anvi, krwar ki zot par lao Lalwa, ekspekte ki zis kontinyen mars labraget ouver parey Kreol i dir, e nou, nou pou zis koz lo zot.

La i la ki'n vole, li menm li ki annan 75 morso later li, sanmenm sa enn ki'n fer biznes drog e nanryen pa arive avek zot Mr Speaker.

SRC, zot pou bezwen sekwe zot, aköz se zot ki responsab pou anmas nou larzan. Nou ti ganny dir ki 77 poursan bann biznes pa pe pey *tax*, depi Gouvernman avan. Ki

zot pe fer pou anmas nou larzan?

Letan zot pe lour pou anmas nou larzan lepep, zot in taye Desanm pou zot pran zot *End of Year Gratuity*, menm Finans ti'n donn en lord pou zot pa pran.

Mr Speaker mon ava termin mon lentervansyon anvi ki letan i kont mwan, lo en pti pwen lo *Air Seychelles*. *Air Seychelles* letan mon'n ekout tou bann dimoun dan mon distrik, zot annan zis en sel keksoz kler Mr Speaker. Travayer i ankoler, ou konnen akoz zot ankoler Mr Speaker?

Akoz letan zot, zot in donn zot kouraz, zot in donn zot lavi, zot in donn zot lenerzi pou travay pou sa lakonpanyen onnetman i annan *staff* ki'n laba pou 30an servis e la ozordi ler zot tande poudir *Air Seychelles* i dan problem, zot santi zot malere.

Parske letan zot in kontribye pou anmenn en kantite larzan, letan zot in kontribye pou anmenn touris dan nou lekonomi, se zot normalman ki ganny pini koman travayer.

Parey ti arive 2012, letan plizyer travayer *Air Seychelles* ti perdi zot plas travay. Me sa ki enteresan Mr Speaker, *CEO* li i

sanze, *Board Members* li i sanze li.

E la letan nou pe fer fas avek difikilte lavi, zot, zot kontinyen annan bann benefis, menm anba bann move *management* ki ti annan avan. Labi i kontinyen, transpor, *fuel*, lakaz e apre lekel ki pou ganny targete? Se sa pti travayer, li ki leve e fer son travay onnetman e in donn son lavi pou 30an e plis dan sa laliny aryen. Me sa diskisyon i kontinyen Mr Speaker, pou ankore annan desizyon lo la.

IDC pa kapab an konpetisyon avek *Air Seychelles a mon avis*. Nou bezwen les *Air Seychelles* rantre lo nou bann zil, pou nou kapab anmenn plis touris laba e ouver laport pou Seselwa.

Olye al *Maurice*, mon ava al depans mon larzan Sesel, mon ava al rod en lotel *Desroches* dan mon pei. Sa i bann laliny kot nou bezwen konsidere Mr Speaker.

E pou fini, leta nou pei i annan plizyer size Mr Speaker, me letan i kourt. Me pa bliye Lepep Seselwa nou annan ankore diskour pou nou fer. Sa pou lo Bidze pei, bann proze dan distrik, semen, lakaz pou mansyonn detrwa.

Alor mon pe dir ek zot. Reste *tune* pou plis

lenformasyon lo ou pei ek distrik. Pou Bidze ki pou enteresan, parske nou pou al en pe plis detay, pou ou ganny plis lenformasyon dan lakour.

Ler mon konklir Mr Speaker, mon ti a kontan remersye tou bann zabitan dan mon distrik Bel Ombre, sa bann zoli dimoun, tou dimoun i annan zoli distrik. Me zoli dimoun i Bel Ombre! Alor mon remersye tou bann zoli dimoun dan distrik Bel Ombre. Mon dir zot mersi pou zot sipor, mersi pou zot kontribisyon, mersi pou zot ki'n byen pile pou nou ariv kot nou ete ozordi.

Me pa bliye, si ti napa COVID, nou ti pou pil plis ankor! Pa bliye SPPF in al ziska kot Lepap avek sa mo 'pile,' me Lepap in demisyonnen. Mr Speaker pile pou kontinyen annan.

E mon ti a kontan demann Senyer, Bondye nou Papa pou kontinyen beni, premyerman mon bann zoli dimoun dan nou zoli distrik Bel Ombre, Lepep Seselwa, nou tou isi avek nou fanmir, pou nou sorti dan sa COVID-19 ki'n debark lo nou pei.

Mr Speaker avek sa detrwa mo, mon ti a kontan dir ou mersi pou donn mon la plas koze.

(APPLAUSE)

MR SPEAKER

Mersi Onorab e mersi tou bann Manm Onorab pou zot repons lo mesaz Leta Lanasyon. Avan nou terminen pou ozordi, nou annan en lot *item* lo nou *Order Paper*.

Madanm Deputy, nou annan en *First Reading*. Pardon, mon'n dir en remersiman pou tou dimoun. Apre mon'n apel Madanm Deputy pou pas lo *First Reading* en *Bill* ki nou annan.

MADAM DEPUTY CLERK

Mersi Mr Speaker. *This Act may be cited as the Public Health (Amendment) Act, 2021.* Mersi.

MR SPEAKER

Mersi Madanm Deputy. Nou pou pran sa *item*, kontinyen avek demen bomaten. Alor mon a swet zot tou bonn sware, mersi bokou ankor e nou a zwenn demen bomaten 9er.

(ADJOURNMENT)

